

((((((((((((((((\_\_\_\_\_

## المجنونة

تأليف: نسيم مجلى

تقديم: جلال العشرى

162p

## جلال العشرى

يقول الكاتب السويسرى العالمى فريدريش دورينمات ملخصا  
روح العصر:

"إننا نعيش فى اللامكان يحيط بنا ما لا جوهر له ولا معنى،  
هناك الدولة والدين والفن، ولكنها غير مرتبطة معا بصلة: بل هى  
أشياء مجردة طغى عليها التكنيك، وطغت عليها الصورة، صورة  
ما لا جوهر له "

ومن هنا رأى دورينمات أن الكوميديا هى أنسب الأشكال  
الدرامية لتصوير هذا العالم وأكثرها تعبيرا عن روح العصر.

فالكوميديا تعمق احساسنا بالتناقض، وتجعلنا ننفجر بالضحك،  
ومن انفجارات الضحك هذه تتبدى لنا الأزمة فى صورة جديدة،  
صورة مأساوية قابلة للحل، لأن العقدة الكامنة فى طيات العالم،  
أصبحت الآن مشكلة طافية فوق السطح، وهذا ما عبر عنه ذلك  
الكاتب الشهير بقوله " أن الكوميديا هى النوع الوحيد الذى يتفق  
معنا، لقد انساق عالمنا الى المهزلة انسياقه الى القنبلة الذرية "

ومن هنا ظهرت عبارة "إن الكوميديا لم تعد كوميديا بحق،  
ولا التراجيديا هى التراجيديا " لأنها فى النهاية الكوميديا الدامعة  
أو الكوميديا السوداء أو بالأحرى الكوميديا المسيلة للدموع.

وليس أدل على هذا من أننا لا نكاد ندرى من " المجنون " فى هذه المسرحية، هل هى ناهد الفتاة الجميلة التى لم تتجاوز الثامنة والعشرين وتحلم بالزواج والحياة الطبيعية، أم هم أخوات " ناهد " من أخيها الأكبر حامد الى أخيها الأصغر محمود، الى شغالة البيت حسنية، أم هو سعيد واخواته د. سعاد أخته العانس، ومديحة أخته السيدة، وزينب التى تعمل شغالة عنده هى وابنتها شادية وابنها كمال أم هى سامية جارة ناهد وزوجها فريد، وصديقهم كريكو طبيب الأسنان اليونانى. فالجميع يعملون من أجل هدف، ولا أحد يعرف ما هو هذا الهدف؟ وبالتالي فنحن لا نكاد نعرف من هو " المجنون " فى هذه المسرحية المجنونة؟

أو على حد تعبير أحد اشخاص هذه المسرحية، ولعله حسين الذى يقول فى دهشة وحيرة " مش عارف أقول إيه احنا فى حلم ولا فى علم ".

وهذا هو مفتاح تلك المسرحية التى كتبها الأديب المسرحى نسيم مجلى، الذى يعد واحدا من كتابنا المثقفين الذين جمعوا بين ثقافة النقد وموهبة الإبداع، وبحثوا فى الأسس الفكرية والجمالية لأهم مدارس الأدب والمسرح والنقد فى القرن العشرين، وقارنوا بين النظرية والتطبيق عند رواد هذه المدارس الأدبية من أمثال ت. س . اليوت وبرتولد بريخت وجان انوى وطه حسين وصلاح عبد الصبور. وناقشوا واحدة من أعنف المعارك الأدبية فى تاريخنا الحديث، وهى المعركة التى نشبت بين العقاد ومحمد كامل حسين حول كتاب الأخير " وحدة المعرفة "

وهكذا جاءت مسرحية المجنونة مرآة عاكسة للتغيير الاجتماعي الذي حدث في مصر ما بعد العبور، فلم تعد مصر هي الدولة الاشتراكية التي تؤمن بمبدأ الكفاية والعدل وملكية الشعب لوسائل الانتاج، وتحالف قوى الشعب العاملة، وحق الجميع في مؤسسات القطاع العام. كما لم ترتد رأسمالية يتحكم في اقتصادها أصحاب رؤس الأموال. ويتصرف في مقدراتها تحالف قوى الأقطاع، وتتدخل في شئونها دولة استعمارية وان تخفت في صورة الاستعمار الجديد.

لا هذا ولا ذاك، وانما اتجهت مصر نحو سياسة الانفتاح، لا الانفتاح الانتاجي الذي يعطى أكثر مما يأخذ، ولكنه الانفتاح الاستهلاكي الذي يأخذ دون أن يعطى شيئا على الاطلاق. مما أدى الى قيام مجتمع توفيقى لا هو اشتراكي ولا هو رأسمالي ولكنه أقرب الى ما يسمى بمجتمع الرخاء الوهمي أو الزائف حيث تقدم الدولة الخدمات العامة للشعب، دون أن يكون هناك مساس بالتكوين الأساسى للمجتمع. والذي يعنينا من هذا كله، هو أن الطبقة المتوسطة في مصر، نسيت دورها او فقدته، وتحولت بأحلامها وتطلعاتها الى طبقة بورجوازية صغيرة وايضا حقيرة، يهتم كل فرد فيها بمصالحه الشخصية. الفردية والأنانية ... وبزيادة المكاسب الهزيلة التي يسمح بها الانفتاحيون.

لقد فقدت الطبقة الوسطى ثورتها، ورمت سلاحها في منتصف الطريق، وتحول معظم أفرادها الى بورجوازيين صغار، لا يهتمون بغير مصالحهم المباشرة، ولا يدركون إن كانوا يعيشون في حلم أو في علم، كما عبر عنهم أحد أبطال هذه المسرحية.

فأبطال هذه المسرحية يدركون فى وضوح أن هناك شيئاً خاطئاً فى المجتمع، ولكنهم لا يدركون بنفس الوضوح ما هو هذا الشيء، ولا ماهو الأسلوب الذى يعالجون به هذا الخطأ.

والصورة الملحة فى هذه المسرحية هى صورة البطلة ناهد، الفتاة الجميلة التى لم تتجاوز الثامنة والعشرين من عمرها، والتى تحلم بالزواج. وبناء عش الزوجية السعيد، ولكننا نراها دائماً ساخطة على كل شىء.. على أخويها حامد ومحمود، وعلى خطيبها سعيد وأختيه سعاد ومديحة، وعلى جاريتها سامية وزوجها فريد، بل وعلى قريبها حسين الذى سنتزوجه فيما بعد. ولا أغالى إذا قلت إنها ساخطة حتى على نفسها وعلى اليوم الذى جاءت فيه الى الحياة.

ولكنها فى ذات الوقت عاجزة عن تحويل هذا السخط الى فعل إيجابى، أو حتى عن تحديد أسباب هذا الغضب، لأن السخط أو الغضب يمكن أن يكون وقوداً فى معركة الحياة. ولكنه لا يشكل موقفاً من المجتمع، أو قراراً فى مواجهة الآخرين.. فهو مشروع قرار، ولكنه ليس قراراً فى حد ذاته!

" لازم أشوف مصلحتى، من النهاردة لازم أديرأمورى أسويها، ماله لما أفكر مع حسين، وأتعاون معاه، أنا ضايعة، غلبانة، وهو غلبان برضه، خلاص، نكون فريق الغلبة.. أنا وهو ... لازم أعرف كل حاجة...وأعرف رأسمال التجارة كلها "

وإذا كانت كل هذه المعانى التى توحى بها المسرحية، يمكن أن تكون مفتاحاً لعالمها الفكرى، ومضمونها الاجتماعى، فإن كل

شئ فى مسرحية " المجنونة " ينبع من بنائها الفنى، لا من تصريحات الشخصيات ولا من مواعظ الكاتب.

وتتلخص المسرحية، إن جاز تلخيصها، فى أن ناهد الفتاة الجميلة التى تقف على أهبة الاستعداد للزواج، تتنازل عن نصيبها فى الميراث لكل من أخويها حامد الصيدلى، البالغ من العمر أربعين عاما، ومحمود. خريج التجارة وصاحب الصيدلية والبالغ من العمر خمسة وثلاثين عاما، وينجح مشروع الصيدلية، حتى ينجب صديقات أخرى . .

ويعيش كل من حامد ومحمود فى سعة من العيش وبذخ من الانفاق، دون أن يعود شئ من هذا كله على أختهما ناهد، التى قنعت ببقائها فى البيت، ترعى شئونهما وتسهر على راحتيهما، ولو كان ذلك على حساب سعادتها هى.

وكلما تقدم لها عريس عمل الاثنان على إبعاده، بدعوى أنها مجنونة، ولا تصلح للزواج، وهذا ما عبر عنه محمود بقوله: " هبلة ومجنونة ... وهتهلبنى معاكى ... كل واحد يقول لك كلمة حلوة تقولى هيجوزنى ... حتى الطبيب النفسانى اللى بيعالجها مجرد أنه يلاطفها شوية أثناء العلاج عشان يرفع معنوياتها ... تخرج من عنده تقولى اسمع يا محمود ... الدكتور معجب بى وعايز يجوزنى ... كفاية تعبتينى ... يا بنت الحلال فوقى بقه ... بلاش فضايح. أنا ها سيب البلد عشانك "

ويرتج على ناهد، فلا تدرى إن كانت مجنونة حقا أم عاقلة، حتى تقنعها جارتها سامية وزوجها فريد، بأنها سوية ولا يشوب عقلها أو جمالها أى شىء على الإطلاق.

" مش حاسين بى يا مدام اللى معذبنى ... يوم ما أقع من المرض يجرونى عالدكتور ويوم ما يخلص العلاج وأعود لحالتى الطبيعية ينتهى كل شىء ... ما فيش اهتمام. ما فيش كلمة تريح ... عمرهم ما واحد منهم فاتحنى فى كلمة تخصنى. ما بيفهموش انى أنا بنت زى باقى البنات عايزة تتجوز وتفرح "

تلك هى شكوى ناهد ، شكوى الشعور بالوحدة والاغتراب ، فهى وحيدة رغم كل من حولها ، وهى مغتربة حتى فى داخل البيت وبين أفراد الأسرة ، وهى تريد أن تفعل شيئا ولكنها مشلولة الرجلين لا تتحرك ، مكتوفة اليدين لا تتصرف ، معصوبة العينين لا ترى ، ولا تجد من يساعدها على الحركة أو التصرف أو حتى الرؤية ، فالكل مشغول بذاته ، غارق فى أنانيته ، سابح فى مصالحه الشخصية ، وربما كان الوحيد الذى يشعر بها دون أن تشعر به ، هو حسين ، قريبها ، الذى يعمل فى الصيدلية ، ولم يحصل بعد على شهادته الجامعية ، ولكنه لا يستطيع أن يعبر عن حبه لها لشعوره بالدونية ، فهو دونها مالا وجمالا ، ودون أخويها شهرة ونجاحا ، فأين يروح الصعلوك بين الملوك !!

وتشعر ناهد بألم فى الأسنان، فتصعد الى جارتها الدكتور كريكو، صديق أخيها محمود فى ذات الوقت، والمتعاطف معها على طول الخط. ويرشح لها سعيد صديق الشلة، مدرس الثانوى

الذى لم يتجاوز الأربعين من عمره، وتوافق ناهد على أن يقوم الدكتور باقناع أخيها محمود بالعريس الجديد.

وينجح كريكو فى اقناع محمود ، بمعاونة فريد زوج سامية ، ويتقدم سعيد للزيارة وتنتهى الزيارة بتحديد موعد الخطوبة ، وفى الموعد المحدد يذهب سعيد هو وأختاه ... سعاد ومديحة ، ومن ورائهم سامية وفريد ، وبعد مناقشة تبدأ هادئة وتنتهى صاخبة ، حول الزواج ، ومفهوم الحياة الزوجية ، ودور المرأة فى البيت والمجتمع ، والطريقة المثالية لتربية الأولاد ، وأسلوب التفاهم بين الزوج والزوجة فى مواجهة ظروف الحياة ، بعد هذه المناقشة التى تتعدد فيها الآراء ، وتختلف وجهات النظر ، تحتد الدكتورة سعاد أخت العريس ، وتنسحب من الجلسة ، تاركة الخيار لأخيها سعيد فى أن يبقى أو ينصرف .

وبالفعل ينصرف سعيد مع أخته سعاد ومديحة، وينفض السامر وتفشل هذه الزيارة كما فشلت زيجات أخرى من قبل، وتعود ناهد لكى تدخل فى محارة أحزانها وهواجسها، وترتد الى شرنقة اللوم والأحزان، وكأنما تؤكد مقولة أخويها حامد ومحمود من أنها مجنونة، لا تصلح للزواج، ولا تقدر على تحمل مسئولية الحياة الزوجية!

وفى الأفق الملبد بالغيوم بين السحابات الداكنة المنذرة بالمطر، يظهر حسين على مسرح الأحداث، وكان قد أعد لابنة عمته الوحيدة ناهد أغنية لكى يغنيها فى حفل الزفاف، تحية لها فى ليلة العمر، ولكنه سرعان ما يعرف من أخويها حامد ومحمود، بفشل المشروع، يبدو عليه التأثير العميق والأسى الأعمق، فحلم حياته

بين يديه، ولكنه لا يجروُ على الإمساك به، أو القبض عليه، إنها في حياته كالسراب، إذا ابتعد عنه رآه، وإذا أقرب منه لم يشعر بوجوده، فهو القريب البعيد، الغائب الحاضر.

إنه يدرك تماما حقيقة وضعه الطبقي، وهو يشعر بعاطفة قوية نحو ناهد، وهناك شعور جارف نحوها، العلاقة الصادقة الوحيدة في حياته. ويستدرجه محمود في الكلام حتى يعترف بهذا كله، فيعده بالموافقة على زواجه من ناهد إن هي وافقت أصلا " لا ... مش هزار و حياة أبويا باتكلم جد ..... بس توافق ناهد . والشبكة موجودة والحفلة بكره فى موعدها "

ويؤيد حامد هذا الاقتراح، ويباركه، مشجعا ابن عمته حسين على التقدم الى أخته ناهد: " أنا ما عنديش مانع ... على الأقل يبقى زيتنا فى دقيقنا ... انت ابن عمتنا واخونا الثالث "

وتوافق ناهد على مرأى من الجميع، ويكاد حسين أن يطير من الفرح، بعد أن جاءت فرصة العمر، وابتسمت له الحياة، وكان يراها غابه مخصبة بالدماء نابا ومخلبا: " وفعلا دى فرصة العمر بالنسبة لى ... أنا طول عمرى باحب ناهد ... واتمنى اسعدها "

وهكذا تنتهى مسرحية " المجنونة " مؤكدة أن الجنون فى روح العصر ، وليس فى طبيعة أبناء العصر ، وهو جنون التكالب على المال، والتهافت على النجاح ، جنون الكسب السريع بأقل الجهود وأرخص التكاليف ، جنون " الأنا وحدية " عندما تسيطر على الجميع ، فيشعر الفرد بأنه انما يعيش هو وحده ، رغم الزحام الشديد فى كل مرفق من مرافق الدولة .

وليس معنى هذا أننا هنا بازاء مسرحية أفكار مباشرة. تهدف اساسا الى مناقشة طائفة بعينها من الآراء، مع عرض الآراء عرضا دراميا عن طريق التعارض والتقابل، أو التناقض والتضاد، ولكننا فى الحقيقة فى عالم المسرحية الواقعية بأحداثه المتطورة، وشخصياته المؤلفه، وذروته المرسومة، وكل ما من شأنه أن يشعرا بنبضات قلب الواقع.

ومع ذلك فقد استطاع المؤلف بحساسيته المسرحية المرهفة، التى تبدو فى أبسط الأمور حتى فى ارشاداته المسرحية، أن يطور من صياغته الواقعية، مقدا اضافة جديدة الى الفن الدرامى، وهى الإضافة التى تبتعد عن التجريبية الساذجة التى تفتق الى النضوج، بقدر ما تبتعد عن الواقعية المباشرة التى عانى منها مسرحنا أكثر من معاناته من التجريبية، فالواقعية هنا مشحونه بالمعنى والدلالة، حيث يجدل الواقع والرمز فى نسيج واحد. وحيث تومىء الشخصية المتفردة المرسومة بكل دقة وعناية الى معنى أكبر منها دون أن تتردى لحظة واحدة فى هوة الرمز أو التجريد.

وتتمثل الإضافة الأخرى التى يقدمها المؤلف فى هذه المسرحية، فى ذلك النهج شبه التشكىلى الذى يتوزع فيه الاهتمام بين أكثر من موقف فى المشهد الواحد، مع التفاعل المستمر بين هذه المواقف بحيث يطور بعضها البعض داخل كل فصل على حدة ثم داخل فصول المسرحية كلها مرة واحدة.

ومن هنا جاء تعدد المشاهد فى البناء المعمارى للمسرحية، حيث يقع الفصل الأول فى أربعة مشاهد، والفصل الثانى يقع فى خمسة مشاهد، أما الفصل الثالث والأخير فيقع فى ستة مشاهد.

وتتبع أهمية هذا الأسلوب فى أن كل مشهد مسرحى يكتسب عمقا جديدا بتفاعله مع بقية المشاهد الأخرى، دون أن يكون لهذا الأسلوب علاقة بالمنهج المألوف عن تطوير المشاهد فى شكل جزئيات تؤلف كلا متكاملا.

وتتصل بهذه النقطة نقطة جوهرية أخرى، تتعلق برسم الشخصية، ونمو هذه الشخصية نموا دراميا، يؤدى الى تطور الحدث، فإذا كانت الشخصية الدرامية تتكشف اساسا من خلال علاقاتها بالشخصيات الأخرى، كان لزاما أن تكون الشخصيات جميعا حية ومكتملة، وليست مجرد أنماط مجردة

ولذلك كان من الطبيعى أن تفقد المسرحية هدفها حين تتخلى عن الشخصية، وخاصة إذا كانت المسرحية ... مسرحية شخصية رئيسية أو محورية كما فى حالة " المجنونة " وهذا ما جعل الكاتب يحرص على البعد الدرامى فى رسم شخصيته المحورية ... حتى لا تكون مجرد شخصية موجهة لابرار فكرة بعينها أو معنى بالذات.

ولقد تجلى هذا البعد الدرامى فى جعل الشخصية خاضعة للصراع الداخلى، وليست عرضا لأحداث خارجية. فالصراع الداخلى يعمق الاحساس بدرامية الشخصية، وبالعلاقات المتفاعلة

مع الشخصيات الأخرى، على العكس من الأحداث الخارجية التي تبدد جوهر الشخصية وتحيله الى كلمات تذرؤها الرياح.

وهذا أساس من أسس الإبداع المسرحي، حين تكون الوسيلة الفعالة لتطور الفكرة هي تطور الشخصيات الحية، وتطور العلاقات فيما بينها، على نحو يحقق لنا فى النهاية ما يعرف بالتطوير.

وتأسيسا على ذلك فان كثرة الشخصيات التي لا دور لها يعد عيبا أساسيا فى المسرحية لأن تعدد الشخصيات يؤدى الى تشتت الحدث فى المسرحية، وتوزع الفكرة الرئيسية، من ذلك مثلا شخصية عاطف بطرس وصلاح، وهما زميلان لسعيد فى المدرسة، أحدهما مدرس كيمياء والأخر مدرس تربية رياضية، ومن ذلك أيضا شخصية زينب التي تعمل عند سعيد، وحسنية التي تعمل عند ناهد، وفاطمة التي تعمل عند الدكتور كريكو، وكلها شخصيات ثانوية، هشة أو هامشية لا تثير اهتمامات خاصة بها أو بما تقوله، وان أدت الى تشتيت الحدث وتمزيق الفكرة.

على انه بالرغم من أحكام بناء المسرحية، فان مشاهد بعينها كان يمكن حذفها دون أن يتأثر هذا البناء، أو يختل ذلك الأحكام، وبخاصة الأغنية التي أعدها حسين، واختتم - المؤلف بها المسرحية، والتي جعل اسمها: ( من أمتى كان اللى انكوى بالحب تاب ).

وبالرغم من سلامة حوار المسرحية وسلاسته فى أكثر الأحيان حيث وفق الكاتب فى استخدام اللهجة العامية. استخداما

فنيا ملائما لطبيعة الشخصيات التي تتكلم هذه اللهجة، إلا ان بعض الجمل الحوارية ، جاءت حائرة بين عامية اللهجة وفصحى اللغة . وكان ينبغي على الكاتب ان يمسرحها اعنى لغة المسرحية بلون واحد.

وان كان لنا أن نشيد بجهد المؤلف فى نسج الحوار، والذي جاء معبرا عن لسان حال الشخصيات، وليس عن فكر الكاتب، بحيث تتحول الشخصيات الى أبواق تردد كلمات المؤلف وأفكاره، من ذلك مثلا قول البطلة، ناهد فى نهاية المشهد الأول من الفصل الأول: " أدى أول خطوة سليمة.. مدام سامية مدرسة، وجوزها كمان مدرس، وناس طيبين ... يمكن الحظ يضرب والسنارة تغمز.. لكن ده مش كفاية حتى لو جه العريس المناسب.. اخواتى هيطفشوه. هيقولا مريضة ومجنونة زى كل مرة ... انا لازم ألعب بعقلهم وأجننهم لحد ما يفهمونى صح "

فهذا نوع من حوار الجامع بين البساطة والسلاسة ، والمعبر عن لسان حال الشخصية وليس عن رأى الكاتب أو فكرة ، وقد ينحدر هذا الحوار البسيط السلس ، فى بعض الأحيان الى بلاغة لغوية أو مسرحية ، مما يسىء الى لغة العمل ككل ، ولكن المسرحية كما هو واضح تتجنب الألفاظ الضخمة ، والكلمات الرنانة ، والشعارات البراقة ، لكى تحقق أقصى قدر من الصدق والعمق بأبسط الكلمات ، وأسلس العبارات .

وليس أدل على ذلك من أماكن أدراج هذه المسرحية، تحت ما يسمى ب " دراما الأسرة " وهو اللون المسرحى الذى افتقدناه زمنا طويلا، وليس أكثر من حاجتنا اليه الآن، على أن نضع فى

الأعتبر انه لا يمكن أن يثير فينا الاهتمام ما لم يقنعنا بصدقه، فالصدق وأنا أعنى به الصدق الفنى وليس الصدق الواقعى، هو مفتاح هذه المسرحية أو هذا اللون من الفن المسرحى!

اننى بالرغم من ايمانى بأن أى فن حقيقى لابد أن يكون بالضرورة فنا ملتزما، إلا أن الالتزام عندى لا يعنى الخروج بالفن من نطاقه الخاص الى أفاق الوعظ والأرشاد أو الخطابة والمباشرة، وبذلك يصبح الصراع الحقيقى صراعا بين الفن واللافن.

بين المسرح الذى ينطوى على الفرجة والفكر، وعلى المتعة والرأى، وبين المسرح الذى يعتمد على النكتة والقافية ومشاهير النجوم.

وعندما ينبذ الجمهور تلك المسرحيات التى تظهر متنكرة فى هيئة فن ، يجد نفسه فى قلب الفن الحقيقى ، وفى رحاب المسرح الجاد .

واننا فى بحثنا الجاد عن أعمال فنية تمتع الروح والعقل والبصر، وفى تطلعنا الى كل ما هو مشرق وجميل وأصيل، لايسعنا إلا أن نضع هذا النص المسرحى " المجنونة " فى عداد هذه الأعمال التى تنطبق عليها تلك المواصفات، الامتاع والإشراق، الى جانب الأصالة والجمال.

(نشر هذا المقال فى العدد 88 من مجلة القاهرة بتاريخ 15 اكتوبر 1988 بعنوان " إنها حقا مجنونة " وقد اخترته ليكون مقدمة لهذه الطبعة الجديدة)

## رأى المخرج حسن عبد السلام في هذه المسرحية

قرأت نص مسرحية المجنونة فسعدت بها لأنها أعادت للمسرح المصرى نوعا مسرحيا افتقدناه وهو مسرح العائلة التى هى نواة المجتمع ولها وبين سطورها الكثير من العبر والعظات والإنذارات والكشف والتعزية والصدق الكامل فى الرسم والنحت والتشكيل والبحث فى الأغوار الإنسانية. المجنونة عمل طيب صياغة فنية راقية

هذا رأى فى العمل الذى أحب أن أخرج به بإذن الله مع شكرى.  
المخرج حسن عبد السلام

1997-6-17

ومع ذلك رفضت الدكتورة هدى وصفى، وكانت تتولى إدارة المسرح القومى، رفضت الموافقة على قيامه بخراجها بحجة إنه مريض وتعبان صحيا.

---

---

## رؤية رجل لعالم المرأة

بقلم: ناهد نجيب

(هذا حديث أذاعته الأستاذة ناهد نجيب بالإنجليزية فى البرنامج الأوربي)

لقد أصبحت تيمة المرأة الوحيدة أو غير المتزوجة موضوعا للكوميديا فى العالم كله. والمصطلحات التى كانت تستخدم لوصف هذه المرأة هى، عانس أو بنت فاتها قطار الزواج، هذه الألفاظ باتت مهجورة الآن.

لكن تغيير هذا المفهوم أخذ وقتا طويلا، ومصر لم تكن استثناء فى هذا الحال. فقد ظلت المرأة غير المتزوجة موضوعا لإثارة الضحك والقهقهات فى مسرحيات الريحانى والفرق المسرحية الخاصة الأخرى وكانت السيدة مارى منيب شريكة للريحانى تقوم بهذه الأدوار التى لاتنسى وهى ممثلة قديرة يستعصى على اى ممثلة أخرى تقليدها..

كان هذا منذ خمسين عاما او يزيد ومع ذلك فهذا التقليد لايزال مستمر فى أعمال قدمت فيها المرأة الوحيدة أو غير المتزوجة كمدرسة أو ناظرة كشخصية معقدة، وفى هذا تقليد كامل من قيمة النساء المكرسات اللأئى تركزن لإعالة أسرهن باغتيالهم

المصدر الوحيد لكسب العيش، مضحين بفرص الزواج من أجل تربية أخوة أو أخوات صغار.

لقد حدث علاج لهذا الوضع أخيرا عن طريق السينما والتلفزيون إذ بدأ الاهتمام بالتعمق فى دراسة شخصية المرأة غير المتزوجة. إحدى هذه الحالات رواية " ليلة القبض على فاطمة " للكاتبة سكينه فؤاد، وهى الرواية اتى تحولت إلى فيلم ثم إلى مسلسل تلفزيونى فكانت هذه الرواية ضربة معلم. هذه المرة إمراة تكتب عن عالم المرأة.

أما المسرحية التى نتحدث عنها هذا المساء " المجنونة" فإنها تتناول نفس الموضوع أيضا. ولكن الكاتبة هذه المرة رجل، هو نسيم مجلى، وبطلته هى ناهد، والمفترض أنها مجنونة. وكما يشير فى الحوار وفى مواقف كثيرة للرجال بأنها ظلمت من جانب أخوتها. فقد باعت نصيبها من الأرض لكى تساعدهم على فتح أجزاخانة، وقد كبر المشروع والإجزاخانة الواحدة صارت إثنين، لكل واحد منهما إجزاخانة، ولم تحصل هى على شىء. وقد أحست بالضياع خصوصا وأنها لم تكمل دراسة المرحلة الثانوية بسبب تفرغها لرعاية أمها المريضة التى توفيت منذ سنين، وهى الآن تعيش فى رعايتهما، وعلى هذا فهى ليست مؤهلة لطالبي للزواج..

مع ذلك، فإن أخزيها مازالا مستمران فى رفض الخطاب القليلين الذين يأتون من وقت لآخر يطلبون يدها على أساس إنها مجنونة ولاستطيع أن تتحمل أعباء الحياة الزوجية هذا هو الوضع : الشخصية مألوفة ، الفتاة غير المتزوجة المصابة بالعقد..

والكاتب بغوص فى أعماقها باحثاً عن عقدها وعن الهواجس التى تدفعها للإلحاح فى طلب الزواج.. إنها تذكر أخويها بأنها باعت قطعة الأرض التى كانت تملكها لكى توفر لهما المال اللازم لمشروعهما، إن نجاحهما كان بسبب أموالها والأخوان جرى تصويرهما كشخصيات مادية لاتحس بمشاعر هذه الأخت ولاتفطن لاحتياجاتها كفتاة فى سن الزواج. فقط يسرعون بها إلى الطبيب حين تقع مريضة.

هناك شخص واحد فقط هو حسين الذى يحبها ويتعاطف معها ولا يقدر على شىء آخر، لأنه مجرد عامل يشتغل فى صيلية أحدهما. هناك صداقة قوية تربط بين ناهد وحسين، لكنه لا يستطيع أن يتقدم لخطوبتها ولا يجرؤ على هذا، إلا أنه يقدم النصيحة والعطف ويكتب الشعر. وفى هذا بعض العزاء لناهد ولكن كما يريد الكاتب، ناهد لديها حاجة ملحة لطب الزواج. ومن أجل هذا يتطوع بعض أصدقاء العائلة بالبحث عن عريس لتاهد ويقع اختيارهم على صديقهم سعيد، وهو مدرس تربية فنية فى المدرسة الثانوية ويشبه ناهد فى بعض حالاته النفسية وقد حاول الإنتحار ذات مرة.

وبعد كثير من الأحداث التى تجرى ضمن حبكة مجدولة بإحكام بحيث يتعذر علينا أن نرويها هنا بالتفصيل، يوافق أخوها على قبول خطبة سعيد لناهد وتتظاهره بالقبول. لكن هذا ليس هو الحل الذى يصر عليه المؤلف. الحل الصحيح فى رأيه هو أن تتزوج ناهد الشخص الذى متحها الحنان والفهم والصداقة وأحفى حبه المبرأ من الأنانية. هذا الشخص هو حسين ابن عمته الذى يعمل عند أخويها..والنهاية السعيدة هى أن يتزوجا .

كان اختيار الكاتب لموضوعه مسألة فى غاية الأهمية لأنه يتحدى واحدة من المفاهيم الإجتماعية السئدة التى تقوم على أساس أن المرأة غير المتزوجة هى إمراة مغقدة. لهذا فإنه يصف بالتفصيل المواقف الكثيرة التى ضحت فيها من أجل هذين الأخوين دون أن تفكر فى نفسها، وهما الآن لايهتمون بمشاعرها، لكن الكاتب يبدو فى كثير من الأجزاء وكأنه يقبل هذه الفكرة ويتحداها فى نفس الوقت ، ومن ثم فإنه ينهى الصراع فى المسرحية بالزواج. وفى أجزاء أخرى يظهر بصيرة ثاقبة وعمق، عندما يصر على حق المرأة الوحيدة فى ان تخرج ألى المجتمع حينما تريد، كما يصر على حقها فى الحرية واختيار الزوج الذى يناسبها..

زد على ذلك أن الحوار فى المسرحية يتميز بالسلاسة والدهاء. تصويره للشخصيات يتراوح بين التصوير الكركاتورى كما فى رسمه لشخصية الخواجة كريكو كاتونيللو طبيب الأسنان، الذى يحاول الكاتب من خلاله أن ينطق ببعض المفاهيم التى مازالت غريبة على مجتمعنا، وكذلك تصويره لشخصيتى أخويها تصويرا خارجيا مختصرا، كل هذا مقابل تصويره الشديد العمق لشخصية حسين. أما تصويره لشخصية ناهد فإنه يتصاعد من التصوير من الخارج وتصويرها من الداخل ومحاولة استيطان أعماقها ومشاعرها الداخلية، التى تكشف عن حقيقتها كفتاة أسوء فهمها بقسوة من المجتمع المحيط بها والبدات أخونها

المسرحية جزء من المسرح الواقعى الذى كان رائده الأول والمدافع عنه الأستاذ نغمان عاشور. رغم إغراقها فى الواقعية

فإن هذه المسرحية تعكس افكارا جديدة وكما قلنا إنها تتحدى مسلمات مقبولة اجتماعيا إلا أن الأمر لا يزال هو عالم المرأة كما يراه الرجل، وقد يبدو من الغلظة أن نلومه على ذلك. ومن ثم فإنه من الممكن للمستمعين الممهتمين بهذا الموضوع أن يقرأوا قصة "عمة رفيق" للكاتبة العراقية ديزى الأمير. وهى قصة قصيرة سنقراها فى البرنامج الأوربى الأربعاء القادم بإذن الله. utc. فى هذه القصة نجد سيدة محترمة كرست حياتها لقضية أخيها المناضل لكنها تستيقظ بعد فوات الأوان لتجد ان الأسم الذى أعطاه لها المجتمع هو "عمة رفيق" أو "أخت الرجال" وليست زوجة أحد من الناس. كان القصد من ذلك تكريمها، إلا أن المؤلفة لم يفوتها أن تشير إلى تلك المرارة التى تختزن فى الأعماق. لكل كاتب وجهة نظره الخاصة وفى الأحاديث القادمة سوف نقدم مسرحيات أخرى تلقى مزيدا من الضوء على هذا الموضوع أو غيره.

هذا كل ما لدينا هذا المساء. نشكركم على حسن استماعكم وانتظرونا فى السبوع القادم.

## الشخصيات :

- 1- ناهد: ( المجنونة ) فتاة جميلة فى الخامسة والعشرين .
- 2- سامية: سيدة جميلة فى الثلاثين من العمر. ( جارة ناهد)
- 3- فريد: زوج سامية . مدرس فى حوالى الأربعين
- 4- حسين: شاب تعدى العشرين بقليل . قريب ناهد ويعمل عندهم.
- 5- حامد: صيدلى فى الأربعين . الأخ الأكبر لناهد.
- 6- محمود: فى حوالى الخامسة والثلاثين. الأخ الثانى لناهد. خريج تجارة وصاحب صيدلية
- 7- كريكو كاتونلو: طبيب أسنان يونانى فى حوالى الستين. جار وصديق محمود
- 8- حسنية: فتاة فى حوالى الرابعة عشر تعمل عند ناهد .
- 9- نوال : سيدة فى حوالى الخامسة والعشرين جميلة وممتلئة .

- 10- سعيد: مدرس ثانوى فى الأربعين خطيب ناهد.
- 11- د.سعاد: أخت سعيد الكبرى. أنسة فى الخمسين ممثلة جاحظة العينين تميل إلى السمرة.
- 12- مديحة: أخت سعيد. سيدة فى الخمسين ممثلة الجسم.
- 13- صلاح الجنائى: مدرس تربية رياضية زميل سعيد فى حوالى الثلاثين.
- 14 - عاطف بطرس: مدرس كيمياء زميل سعيد فى سن صلاح تقريبا
- 15- فاطمة: سيدة جميلة فى حوالى ثلاثين. تعمل عند الدكتور كريكو
- 16- زينب: سيدة جميلة سمراء خميرية اللون فى الأربعين من العمر تعمل عند سعيد.
- 17- شادية: ابنة زينب. طفلة جميلة تبلغ من العمر عشر سنوات.
- 18- كمال: طفل فى حوالى السابعة.. ابن زينب.
- 19- اسعد الفقى: شاب فى الثلاثين من عمره.

## الفصل الأول

### المشهد الأول:

صالة فسيحة الى حد ما.. باب الشقة فى مواجهة الجمهور الى اليمين بحيث نرى الداخل والخارج. الى اليسار يوجد انتريه مفتوح على الصالة والى جواره حجرة المائدة وهى مفتوحة على الصالة من ناحية وعلى الأنتريه من ناحية أخرى بحيث يظهر كل شىء للمتفرج.

الأثاث حديث ويدل على الثراء الطارىء. عند رفع الستار تظهر ناهد فتاة جميلة ناضجة ممثلة في حوالى الثامنة والعشرين. لاتكاد تتقدم لى تغلق المذياع الموجود فوق اليوفيه على أغنية

(ودع هواك وانسأه لعبد المطلب) حتى تلتقط صورة كبيرة لعريس وعروسة. فتقلبها على وجهها.. ثم تنادى.

ناهد: بت يا حسنية .. مين اللي جاب صورة نجية هنا  
حسنية: سى محمود يالليل. عايز يعمل لها برواز ويعلقها.  
ناهد: اسمعى الصورة دى لازم تختفى .  
حسنية: لكن دى مرة أخوكى الكبير ويمكن ياخذ على خاطره.  
ناهد: اللى مايعجبوش ينفلق. كفاية عليه يعلقها فى رقبتة  
حسنية: وسى محمود.

ناهد: ( بصوت غاضب) كلمة واحدة قتلتك . أنا لما باشوقها  
ببركبنى ستين عفريت. وانتى عارفة طبعاً .  
حسنية: سلامتك ياستى. انشالله ع قبالعذلك . نفسى  
أغمض عينى وأفتحها وأشوفك جنب ابن الحلال.  
ناهد : كان زمان وجبر المهم شوفى مكان ادفنى فيها  
صورة المخفية دى والمحروس بتاعها تتجه الى داخل  
(الشقة)

حسنية: امرك ياستى ( تتأمل الصورة ) والنبي صورتك تبقى  
قمر يا ستى. نفسى افتح الباب القى ابن الحلال قدامى  
( تلف الصورة فى ورقة وتضعها فى البوفية . وفجأة  
يدق جرس الباب فتسرع نحوه، ولا تكاد تفتحه حتى  
يندفع الى الصافة شاب متوسط القامة يغطى رأسه شعر  
طويل منكوش تعدى الثلاثين من العمر. يندفع الى الصالة  
وهو يتكلم)

الشاب: فين سيدك. فين ستك؟  
حسنية: ( تتراجع فى خوف ) ايه ده ؟

الشاب: ( يتوقف عند منتصف الصلاة ويتلفت حوله فى انبهار )  
يا صلاة النبى  
حسنية: يا فتاح يا عليم.  
الشاب: ايه يا بت بعبع .. وشى مش عاجبك ؟  
حسنية: ( بصوت مرتفع ) انت عايز ايه ؟  
الشاب: عايز شقة .. فهمتى ؟ شقة وبس.  
حسنية: اسما لله عليك يا أستاذ السكة غلط  
الشاب: ( صارخا ) نهارك زى بعضه .  
حسنية: أعوذ بالله – انت ايه اللى حدفك علينا النهاردة ؟  
الشاب: حدفنى الهوى .. عارفة يعنى ايه الهوى؟  
حسنية: ( تنظر فى صمت ثم تبتسم ) ايوه .. ايوه يا أستاذ  
الشاب: نفسى فى شقة حلوة وجميلة زيك كده.  
حسنية: نعم يا أستاذ . ؟  
الشاب: مش ده بيت الدكتور محمود صاحب التجارة والعمارة  
اللى هناك؟  
حسنية: ايوه بيته يا أستاذ يلزم خدمة ؟  
الشاب: ( بخفة روح ) ما تقولى كده من الأول .. كان لازم  
تقطعى نفسى.  
حسنية: أسفة يا استاذ.. أصل خضرتك دخلت البيت كده  
محدوف زى القضا خلتنى اتلخبط.  
الشاب: أنا اللى متلخبط على الآخر. خمس سنين داير على شقة  
كل مرة ألقى عروسة وتنفق على الجواز ما نلقاش الشقة  
( يقرب منها ) تصدقى ثلاث عرايس زى المانجة طاروا  
منى واحدة ورا الثانية لما عقلى قرب يطير.  
حسنية: ( وهى تنسلى بمنظره ) وبعدين يا أستاذ؟  
الشاب: قلت أضمن الشقة أولا وبعدين اشوف العروسة.

حسنية: ( فى خشونة ) واحنا مالنا يا استاذ ؟  
الشاب: مالك ازاي؟ العروسة عايزة الشقة والشقة عندكم.  
فى العمارة الجديدة.  
حسنية: أنا ما أعرفش حاجة عن الشقة .دى.  
الشاب : انده لى حد كبير اتفاهم معاه .  
حسنية : ( بغضب ) انده لك ست ناهد ترد عليك .  
( وفى هذه اللحظة تأتي ناهد من الداخل وهى تتادى  
بصوت عال)  
ناهد: بت يا حسنية .  
الشاب: ( وقد أخذته المفاجأة ) ياه ... يا صباح الفل  
والياسمين.  
ناهد : ايوه يا أستاذ ؟ ( وهى تبتسم)  
الشاب : ( ينظر اليها باعجاب شديد ) أيوه . أيوه أصل أنا  
عايز أجوز وجيت عشان.  
ناهد : ( بفرح ) أهلا يا أستاذ  
الشاب : قلت أضمن شقة عشان العروسة ما تفتش منى .  
ناهد : ( فى تردد ) انت خاطب يا أستاذ ؟  
الشاب : ثلاث مرات وحياتك .. اخطب وتستمر الخطوبة سنة  
أو سنتين .. وبعدين يجى واحد تانى ويلطشها.  
ناهد: ولقيت عروسة نانى ؟  
الشاب: أنا أمى راضية عنى خالص النهاردة .. عشان يظهر  
انى لقيت الشقة والعروسة (يشير اليها)  
ناهد: ( بفرح ) ألف مرحب يا أستاذ ( تلتفت الى حسنية )  
الحقى اندهى محمود .. ثم تقترب منه وبلهجة رقيقة)  
ايوه يا أستاذ.. كنت بتقول ايه؟  
الشاب: بأقول عايز أتجوز.

ناهد : تجوزنى . أنا يا أستاذ؟  
الشاب: ياريت يا ستى .. تعرفى لو حصل أبقى أسعد انسان  
على وجه البسيطة.

ناهد: أنت شفتنى قبل كده يا أستاذ  
الشاب: كفاية انى شفتك الوقت، أنا لو اصطحب بوجهك البشوش  
ده كل يوم مش حأعرف الزعل تانى.  
ناهد: ( فى خجل وسعادة ) شكرا يا استاذ .

الشاب: صدقيني يا آنسة. ثلاث مرات أخطب ما حسيتش أبدا  
بالفرحة لكن أول ما شفتك انفتح قلبى فى الحال.  
ناهد: ( تستعذب الكلام " وتسرح معه " ) أه يا أستاذ

الشاب: (يقترب منها أكث) كل حاجة فيك بتشدنى وتخلى  
قلبى يدق ولسانى ينطق صدقيني يا آنسه.

ناهد: مصدقك والله يا استاذ .. بس عايزه  
الشاب: عايزه تعرفينى .. اسمى أسعد الفقى. مدرس علوم  
بمدرسة الزراعة الثانوية. أه – والللة طيب وغلبان وابن  
ناسى كويسين أوى ... بس شكلى كده زى ما انتى شايفه  
ياترى يعجبك.

ناهد: أوى .. أوى يا أستاذ.  
أسعد: مش باقولك قلبى انفتح لك من أول نظرة .  
محمود: (يأتى مسرعا من الداخل فى حالة غضب شديد) ايه  
ياجدع انت اللى جابك هنا ؟ هى وكالة من غير بواب.  
مافيش أدب ما فيش أخلاق؟؟؟

أسعد: أسف يا استاذ .  
محمود: ( يدفعه من أكتافه الى الخارج ) اتفضل مع السلامة

- .. البيوت لها حرمة يا محترم.  
اسعد: لكن أنا ما تعدتس على بيتك .. أنا قصدى شريف والله العظيم.
- محمود: (يواصل محاولات دفعه للخارج ) يحنن عليك ربنا  
الشاب: انتظر يا أستاذ ( بصوت مرتفع ) أنا جاى اطلب ايد أختك.
- ناهد: استنى يا محمود ( تتحرك ناحيته) اسمع شوف الأستاذ بيقول ايه.
- محمود: (لا يهتم بكلامها) ما كانش ينغز (يدفعه) بره ما عندناش بنات تتجوز  
اسعد: ( عيناها متعلقتان بناهد وكأنه يستجد بها )  
ناهد: (تنظر الى اسعد بلهفه وتمسك محمود تحاول منعه) ايه ده يا محمود ما يصحش كده! (ثم تصرخ فيه) خلى الأستاذ يكمل كلامه.
- محمود: ( يحاول التخلص منها) اسكتى بلاش هبل يا مجنونة  
اسعد: ( يقاوم محاولا البقاء فى مكانه) مش كده يا أستاذ . أدينى فرصه اشرح لك.
- محمود: ( يدفعه ) كفاية تشرح للتلاميذ بتوعك فى المدرسة.  
ناهد: ( تحاول الخروج لتمسك بأسعد لكن محمود يدفعها ويضع الباب خلفه بغیظ) لا .. لا مش كده. معقول ده ليه كده تكسر حظى فى كل مرة.
- محمود: (يضعها على وجهها بقوة) استكتى يا مجنونة عايزه تفضحينا.
- ناهد: لا ، لا مش معقول كده ( تنخرظ فى البكاء حتى تنهار ثم تسقط على الأرض.)

محمود: هبلة ومجنونة وتهبلىنى معاكى . كل واحد يقول لك كلمة تقولى بيحبنى. وكل واحد يضحك لك تقولى هيجوزنى. حتى الطبيب النفسانى اللى بيعالجها مجرد انه بيلاطفها شوية أثناء العلاج عشان يرفع معنوياتها بعدين تخرج من عنده (وهو يتحدث الى الجمهور) تقولى اسمع يا محمود الدكتور معجب بى وعاييز يجوزنى. كفاية تعبتينى (بنيرة حزن) يا بنت الحلال فوقى يقه. يلاش فضايح. أنا هاسيب البلد عشانك (يخرج ويصفع الباب خلفه بقوة )

ناهد: (بحقد وتشنج ) طيب يا محمود ان ما وريتكم

النجوم فى عز الضهرية. (تواصل البكاء)

حسنية: كفاية. كفاية ما تقطعيش قلبى.

ناهد: ( تسترد تماسكها ) انا لازم أعمل حاجة تقلب حالهم.

لازم انتقم منهم . أنا هاحرق البيت واحرق نفسى كمان.

حسنية: يا مصيبتى يا ستى !وهتسبىنى لمين؟

ناهد: ايوه يا حسنية. أمال أعمل ايه عشان يحسوا بى.

حسنية: تفكرى فى حاجة تانية .. عشان تتجوزى وتفرحى

بشبابك

ناهد: آخذ بعضى وأروح ورا العريس ؟

حسنية: وهتروحى فىن اذا كان مالوش شقة .

ناهد: طيب أعمل ايه تانى .. الحال ده مش ممكن يستمر.

اخواتى أطاح. أطاخ ما عندهمش احساس ولا

مسئولية.

حسنية: مش قال انه مدرس فى الزراعية. يبقى الأستاذ فريد

- يعرفه ومدام سامية صديقتك وبتحبك خالص.  
 ناهد: مدام سامية هي الست الوحيدة فى العمارة اللى بتحبنى  
 وتخاف على.
- حسنية: خلاص نفول لها تخلى جوزها يشوف العريس ده  
 ناهد: ( تضحك فى هيسستيريا ثم تتوقف فجأة ) لكن اخواتى  
 هيمنعوه..كل واحد يجى يطردوه ويقولوا على مجنونة..  
 أنا ها جننهم
- حسنية: ناوية تعملى ايه؟  
 ناهد: ما فيش غير حاجة تقلب حالهم وترىحنى ( تبدأ تمسك  
 بالكراسى وتقلبها على بعض ) لازم أخليه كوم تراب.  
 ناولينى صفيحة الجاز بسرعة.
- جسنية: ( تصرخ بصوت عال ) يا مصيبتى ( تجرى نحو الباب  
 تفتحه ) الحقينا يا أبله سامية .. الحقونا يا ناس ( تعود  
 تمسك بناهد تحاول منعها لكن ناهد تدفعها بقوة فتسقط  
 على الأرض وبعدها تتعثر ناهد وتسقط ايضا )  
 ( وفى هذه الأثناء تدخل مدام سامية وهى فى حوالى  
 الثلاثين جميلة وعطوفة تتأثر بحالة ناهد فتحنى عليها  
 وتربت على جسمها ووجهها وهى تحاول تهدئتها )
- سامية: كفالله الشر .. جرى ايه يا ناهد؟  
 ناهد: قال أنا مجنونة يا أبله سامية ؟؟  
 سامية: ( تضحك بصوت مسموع ) فشر .. مين قال كده؟  
 ناهد: المضروب فى قلبه محمود .. طرد العريس وقاله دى  
 مجنونه ما تتفعلش
- سامية: هو ده كان جاى عشان يخطبك  
 ناهد: كان جاى يسأل على شقة ولكن أول ما وقعت عينه على

ناهد: كان جاى يسأل على شقة ولما شافنى عينيه اتلقت بى  
وقال عايز أجوزك ...

حسنية: (بعد أن رتبت الكراسى المقلوبة) هو مدرس فى  
الزراعية وفريد بيه لازم يعرفه

سامية: خلاص .. ولايهمك يا ناهد.. نجيبه. أو نجيب غيره.  
ألف عريس يتمنوا يجوزوا واحدة زيك..

ناهد: أنا ؟ .. (وهى تهز رأسها فى مراره) مش منظور .

سامية: مين قال كده (تمسك يدها وتربت على جسمها

وشعرها فى اعجاب) الجمال ده كله . الشفايف اللى

زى الورد. والخدود الحمرا اللى زى التفاح الأمريكانى

(تفرد شعرها) يا وعدى على الشعر الحرير. كل

الأوصاف اللى بيتناها الشبان.

ناهد: تهز رأسها كمن لا يصدق) الكلام على الحظ .

والفرص بتيجى مرو واحدة بس ما بنتكرررش.

سامية: (تبتسم باستغراب) بقى ده كلام تقوله واحدة حلوة زيك

. الفرص قدامك كثيرة انتى عملتى ايه لسه. سنك كام

سنة عشان تياسى كده.

ناهد: ثمانية وعشرين سنة .. ثلاث أرباعها غلب. سجن مع

الأشغال الشاقة. قعدونى من المدرسة من سن اتناشر

سنة عشان أخدم أمى أول ما أصابها المرض. ثلاث

سنين وربنا افكرها. وابتديت انتقل معاهم من

المنصورة لاسكندرية. لحد ما خالصوا الجامعة. الكبير

طلع صيدلى كبير. والثانى واخد بكالوريوس تجارة وأنا

بس اللى طلعت فشوش، لاشهادة ولا ميراث فى ايديا.

سامية: ( تضحك ) فشوش ؟ ازای تكونيش بتخذى العين  
عندك الخير ده كله والمكاسب والتجارة وهتطلى  
فشوش ازای؟

ناهد: (بغیظ وحسرة ) مش ضامنة حاجة. أنا كان نفسى اتعلم  
واخذ شهادة زى اللی اتعملوا وبقى لى شغلة اعتمد  
عليها.

سامية: روقى . خدنا ايه من التعليم والشغل – من الشغل للبيت  
زى البقرة اللی فى الساقية طول اليوم. كنس وطبخ  
وغسيل يعنى ايه زايد علينا – ستات البيوت أفضل ألف  
مرة – والشبان يفضلوهم عن الموظفين.

ناهد: تعرفى خطيبة الدكتور حامد نجية بنت عمى ؟ ما  
تعرفش الألف من كوز الدرة، شكلها تحفة، لاجسم ولا  
وشكل صبوح وقال بيموت فيها . وهى بتكرهنى موت  
وهو يقول ما اخدش غيرها . مش بقولك حظ.  
بكره حظك يضرب وتتجوزى زى نجية .

سامية: ناهد: مش باين .. انتى عارفة يا ست سامية ايه اللی حصل  
أمبارح؟ خدونى الشهر العقارى وقعت على بيع  
الأرض. آخر ما أملك فى الدنيا.

سامية: (تتأثرتكاد تبكى) وبيعملوا كده ليه؟ همه عايزين ليه  
ياخدوا أرضك؟؟

ناهد: ما خدوهاش . دول باعوها..

سامية: ازای ده هم يبيعوا ولا يشتروا . اجزخانتين وتجارة  
واسعة وبيعوا أرضك كمان.

ناهد: الحكاية قديمة يا أبله سامية. من ايام مادخلوا الجامعة  
كانوا بيضيعوا فى الفلوس بهبل، وابتدوا يبيعوا الأرض

فدان ورا فدان. ما خلوش غير فدانين بتوعى. ولما فكروا فى عمل اخزاخانة ما كانش معاهم فلوس.. قالوا نبيعهم. الكبير كان تعبان فى شغله والمضروب فى قلبه محمود ما كانش لاقى شغلة بشهادة التجارة... قالوا نبيع الفدانين بتوعك ونفتح أخزاخانة قلت بيعوهم. الكلام ده كان من تسع سنين. الأجزاخانة كبرت بقت اجزاخانتين وكمان تجارة الكسب والسماذ وعينك ما تشوف الا النور بقى عندنا أربع عربيات نقل وكل واحد عربية ملاكى وامبارح بس جه المشتري عشان يسجل الأرض فى الشهر العقارى.

سامية: آه فهمت . لكن طبعا هيعوضوكى عن الأرض. يكتبوا لك نصيب فى أجزاء منهم.

ناهد: مش اصول كده والنبي ؟

سامية: طبعا يا حبيبتى أمال ايه ؟

ناهد: لحد الآن ما فيش حد كتب لى حاجة ولا طمنى حتى

بكلمة . وأنا عايشة زى واحدة خدامة أدى البيه الكبير بيتجوز، والتانى بكره يعملها وأفضل أنا زى المقاطيع أشحت منهم (تحتد فجأة) لا ده مش هيحصل أبدا. ومن النهاردة لازم أعرف مصلحتى وأدور على حقوقى.

سامية: برافو عليكى . اهو ده الكلام السليم. كلميهم بالراحة،

حاولى تكسبى عطفهم بدون زعيق ولا خناق. بس فرفشى وانسى الهموم خسارة جمالك وشبابك.

ناهد : غصب عنى يا أبله سامية . اخواتى مش حاسين بى

غمرهم ما فكروا فى مستقبلى.

سامية: معلش . فاتحيهم ودورى على حقوقك. وأنا بأعتقد

انهم مش ناسينك. باين انهم مش بخلانين عليكى

بالفلوس بيودوكى للدكاترة فى مصر واسكندرية ما  
بيقصروش.

ناهد: دول مجرمين. أطاخ . هم اللي جابولى المرض والغم  
بيودونى عند دكاترة الأعصاب بعد ما بوظوا أعصابى  
ونكبونى ووقفوا حالى

سامية: يا ناهد يا أختى بتاع ربنا وهمه ما لهم ؟

ناهد: أ بدا ( تبيكى ) المنكوب الصغير هو اللي ضربنى على  
راسى لحد ما فقدت عقلى ( تتأثر وترتمى على الكنب )  
سامية: ( تميل عليها وتشدها من يدها ) كان امتى ده – وسببه  
ايه ؟ !

ناهد: الحب يا أبلة سامية ( الدموع تخنفها ) هو الحب عيب  
يا أبلة ؟ هو ده السبب.

سامية: ( تربت على خدها ) امسحى دموعك يللا واحكى لى  
احكىلى على المفاجآت الجديدة دى ( تضحك وتحاول  
أن تخرجها من حالة الحزن ) كان فين الحب ده ؟ ومين  
المحظوظ ده اللي استولى على قلبك ؟

ناهد: ربنا ينتقم منه . الوغد الجبان. خدعنى وغدر بى. حببت  
المجرم بكل احساسى. كنت أقف بالساعت فى البلكونة  
انتظره، وكان يقف قبالى فى الشباك. يفضل يشاور لى  
واشارو له. وفى يوم لقيت نفسى رايحة له.  
وبعدين ؟ ما تسرحيش.

سامية: ناهد: خبطت على الباب فتح . أول ما شافنى اتخض واتلجلج  
اصفر واحمر. كنت فاكره انه هيفرح بى. وياخدنى  
بالحضن. لكنه طلع ندل وجبان. وقف فى الباب وقاللى  
ليه كده يا ناهد؟ جاية هنا ليه؟ بصيت له مستغربة. انت  
مش بتحبنى. مش انت بتشاور لى. قال آه . آه بس أنا

وطب سكت. وبعدين لمحت الدبلة فى ايده اليمين  
وعقلى طار. رحت ماسكة فى خناقه وشديته من شعره  
. ازاي يعمل فى كده. وشوية اتلمت الناس على الخناقة  
، وجه أخويا محمود وفضل يضرب فى لما فقدت وعى  
ما دريتش بالدنيا فين ( تنهار وتجلس على الكنبه -  
المشهد السابق يمكن تقديمه بالانتميم )

مسكينة ! تحملتى كتير. ربنا يشفيكى. لكن انتى لازم  
تساعدى نفسك.

سامية:

( بصوت مرتفع ) ازاي دلينى ؟

ناه:

تسامحى أخوكى . سامحيهم وانسى اللي حصل. انتى  
عندك حقد مكتوم ومتعاظة خالص. وده اللي تاعب  
أعصابك. سامحى أخوك وما تنسش انه كان معذور  
انتى عارفة الناس ما بتسكتش.

سامية:

مش حاسين بي يا مدام ، اللي معذبني يوم اقع من  
المرض يجرو بية عالدكتور و يوم ما يخلص العلاج  
وأعود لحالتى الطبيعية ينتهى كل شىء، ما فيش اهتمام  
– ما فيش كلمة تريح . عمرهم ما واحد فاتحنى فى  
كلمة تخصنى.

ناهد:

ما بيفهموش انى أنا بنت زى باقى البنات، عايزه  
تتجوز وتفرح. الدكتور حامد أهو كبير وطيب عمره  
ما ضربنى وبيشققلى لكن ما فتحش قلبه يوم لى  
ماشعرتش انه فاهمتى ابدأ . ليه ما بيحسوش بي. هو أنا  
برضة مش زى نجية المفعوة اللي هيجوزها.

انتى متأثرة خالص يا ناهد وأنا مضطرة أسيبك شوية  
ترتاحى . لما اخلص من شغل البيت ها جيلك، لكن  
لازم تساعدى نفسك، دبرى من مصروف البيت

سامية:

واعملى حاجة تنفعلك , يعنى حوشى قرش ورا قرش  
تعملى ثروة وما تحتاجيش لحد أبدا . وبلاش قلق عشان  
تحافظى على صحتك وجمالك . بكرة يجى عريس  
العفلة اللى يسعدك .

ناهد: معقول يا أبله سامية مين يرضى يجوزنى ؟ الكل  
عارف انى مريضة وبيقولوا على مجنونة .

سامية: ( تضحك ) يا ريت فيهم نص عقلك . انتى بس حساسة  
أكثر من اللازم وبتفكرى كثير فى الماضى . انسى  
وبلاش تعكتنى على روحك .

ناهد: أعمل ايه بس فى بختى .. كل ما يجينى عريس بيطفشوه  
. عايزين أقعد كده أخدمهم

سامية: ما تقوليش كده . يمكن العرسان ما عجبوش اخواتك .  
تلقاهم فلاحين مش قد المقاقم .

ناهد: ( تصدم ناهد ويبدو الشحوب على وجهها وتتحرك  
سامية نحو الباب وبعد ان تخرج سامية يدق جرس الباب  
فتسرع حسنية لفتحه ويدخل شاب فى العشرين من عمره  
ثم يضع كتبا على الحائط الذى يفصل بين الصالة وحجرة  
المائدة )

حسين: ( بتردد ) صباح الخير يا ناهد .

ناهد: ( يشرق وجهها بابتسامة ) حسين تعال قرب ( تمد يدها

للسلام وتسده للجلوس ) أقعد شوية ما لك ؟

حسين: أقعد ؟ أنا اتأخرت فى النوم . الساعة حداثر ولازم

افتح الأجزاء بسرعة . محمود لو عرف هيتخانق معايا  
ويبهدلنى .

ناهد: اطمن محمود ما عداش فاضى من السرمة رايح جاى .

- حسين: ازای ؟ هو ما رجعش من اسكندرية؟  
 ناهد: لآ رجع بالليل وسافر من شوية.
- حسين: سافر ليه تانى ؟  
 ناهد: أنا اللي عايزه أعرف منك بيعمل ايه فى اسكندرية ؟
- حسين: بيحبيب أدوية طبعا.  
 ناه: ( بصوت عال ) حسين ! ها تلف على (تمسك بيده  
 وتضع يدها الأخرى على كتفه ) أنا بنت عمك برضه  
 وعايزاك تصارحنى لأن سفره زاد عن الحد.
- حسين: ( تاخذه الحيرة ثم يضحك ) أقول ايه بس !  
 ناهد: تقول الحقيقة. انت رحى معاه اسكندرية مرات كثيرة!  
 حسين: حصل طبعا.
- ناهد: مرة قضيتم أسبوع هناك.  
 حسين: آه انتى فاكراه؟  
 ناهد: هو أنا بأنسى حاجة ( بابتسامة ) قوللى يا حسين قضيتم  
 الوقت ازای ؟ مين معاه رجالة أو ستات.
- حسين: رجالة طبعا .  
 ناهد: (تضربة على صدره بمرح ) ولد انت بتخبى على ؟ بقى  
 راىخ اسكندرية عشان يسهر مع رجالة؟ شفت مين ؟ وكم  
 واحدة ؟
- حسين: ( يتلفت حوله ويحاول رفع يدها من على كتفه ) لا . لا  
 أنا يا ستى ماليش طبعا فى الحاجات دى.  
 ناهد: ليه يا متنىل . ما انتش راجل زيه؟  
 حسين: لا راجل طبعا بس مفلس .  
 ناهد: ( تقفز ضاحكة ) وهو الافلاس يمنع .  
 حسين: يمنع طبعا . الافلاس يمنع كل حاجة كويسة 9 يمنع  
 روقة البال وراحة الجسم كله.

- ناهد: لكن البية كان معاك وبيصرف عايز فلوس ليه ؟  
حسين: جبتى اللى فيه الفائدة. أنا موظف عنده. آه ماشى معاه صحيح. بس فى خط تانى.
- ناهد: فهمت ( بنظرة تأمل ) بتحب يعنى .  
حسين: (يضحك فى سخريّة) وأنا مين بس هيحبنى ما هو ده عايز فلوس برضه وأنت عارفة الحال.
- ناهد: مسكين يا حسين شايل الهم زى بنت عمك .  
حسين: أنا فين وأولاد عمتى فين . أنا شغال عندهم. افتح يا حسين الأجزاخانة – روح يا حسين هات دوا . روح افتح المخزن وسلم كسب وسماد ومهريات وسوق سوده. همه يقبضوا الآلاف ولو كبس البوليس على هيقولوا لى سد يا حسين، واروح أنا فى داهية.
- ناهد: ( بشفقة ) كفالله الشر . وبتحط نفسك ليه فى الحاجات دى . وما بتاخدش حقك ليه .  
حسين: بيدونى ملايم. ويلهفوا الآلاف. ربنا يغنيننا ويتوب علينا من الذل.
- ناهد: معلش يا حسين خليك زى أنا لكن اسمع ؟ احترس وابعده عن السكك الخطرة انت موظف فى الأجزاخانة وبس مالکش دعوة بالباقي.
- حسين: ( تدخل حسنية معها الشاي باللبن وتقدمه له فيحيها ) الله يفتح عليك يا حسنية .  
ناه: هاتى كيك لحسين يا بت ( تمسك كوب اللبن وتناوله )  
حسين: زى بعضه لكن ايه اللى حصل ، ايه الكرم اللى حاطط عليكو النهاردة .  
ناهد: ( تقدم حسنية الكيك وناهد تناوله بالقطعة ) شايفاك غلبان زى حالاتى .

- حسين: بس أنا اتأخرت.
- ناهد: ايه اللي أخرك
- حسين: (يمد يده يأخذ الكتب) كنت سهران وراحت على نومه
- ناهد: (تضحك وتضربه) سهران تعمل ايه يا مضروب انت
- ومع مين يا ولد قول؟
- حسين: (يهز الكتب) أنا ودول. باذاكر هامتحن الثانوية العامة بعد ثلاث شهور.
- ناهد: كده مرة واحدة ما قلتش قبل كده
- حسين: أقول لمين . خفت أقول يطردونى ويقولوا ده مش فاضى للشغل.
- ناهد: للدرجة دى بتخاف منهم ؟
- حسين: طبعاً ، كل واحد ما يهموش غير مصلحته .
- ناهد: (تقترب منه ) صحيح يا حسين بتفكر فى مين ؟
- حسين: بأفكر فى مستقبلى
- ناهد: (تصطدم لكنها تتماسك) ما تشلش هم شد حيلك
- أنا معاك وان عزت حاجة قول لى.
- حسين: ما اتحرمش ، كلام ما قالوهش الرجالة .
- ناهد: همه الرجالة حاسبين بينا .
- حسين: لكن ها أقولك ايه . هتشرح لى انجليزى. هو ده اللى مغلبنى
- ناهد: الأستاذ فريد جارنا اخليه يدريك درس.
- حسين: كده لوجه الله ؟
- ناهد: لا طبعاً أنا هادفع .
- حسين: (بمرح ) الله يكرمك والله بقالى ضهر فى الدنيا .
- ناهد: (تنظر اليه بعطف وسعادة ) بس عايزاك تفتح عينك وتاخذ بالك كويس

حسين: تحت أمرك اللي تطالبه ( يهم بالخروج فتستوقفه من كتفه وتتنظر اليه في حب )

ناهد: فهمت أنا عايزة ايه ؟

حسين: طبعا ودى عايزة ذكاء .

ناهد: تقترب منه أكثر وتربت على كتفه ( ها استتناك على

الغداء . تيجي هنا.

حسين: لما أشوف الظروف .

ناهد: مش ها كل لحد ما تيجي .

حسين: (ينظر بحنان ويهز رأسه ثم يسحب يده من يدها بهدوء )

باى . باى.

ناهد: باى ( تسير وراءه حتى الباب ثم تعود الى مقدمة

المسرح وترقص في خفة ) لازم اشوف مصلحتي . من

النهاردة لازم ادبر أموري. اسويها ماله لما أفكر مع

حسين. وأتعاون معاه. أنا ضايعة علبانه وهو غلبان

برضة . خلاص تعمل فريق الغلابة. أنا وهو. لازم

أعرف كل حاجة حتى راس مال التجارة كلها.

واحسب نصيبي واطلب حقي. ليه استنى لما حد تانى

يفكر لى. برافو عليكى يا مدام سامية. أيوه كلامك صح

لازم أوفر من مصروف البيت وأعمل ثروة (تتوقف

عن الحركة) كده نبدأ أول خطوة. (تضحك فجأة ثم تفتح

الراديو. تنبعث منه موسيقى راقصة مرحة فتبدأ ترقص

وتدندن وحينئذ يرن جرس الباب فتتوقف) افتحى الباب

يا حسنية (تدخل نوال سيدة شابة ممتلئة الجسم. تحمل

طفلا غلى ذراعها)

نوال: صباح الخير يا ناهد

ناهد: (لا ترد بل تنظر اليها فى تمعن) تتحرك نوال فى الصالة فى دهشة وخوف . تدور ناهد حولها وهى تحاول الاقتراب منها وعيناها تحمقان فى وجه نوال)

نوال: ايه ده ؟ مالك؟ يا نهار زى بعضه.  
ناهد: (تواصل ناهد الدوران حولها وفجأة تضحك فى هيسستيريا ثم تقف مكانها )

نوال: يا مصيبتى .. بتضحكى بعد ما نشفتى دمي. (ناهد تستمر فى الضحك) يا شيخة خضيتينى. هو الهزار يبقى كده

ناهد: (تعود الى هدوئها ) اسمعى يا نوال، انتى نمتى كويس الليلة ؟

نوال: نمت كويس خالص. أول ما أحط راسى على المخدة بأروح فى النوم على طول.

ناهد: جوزك بيسهر مع مين ؟  
نوال: أنا عارفة بقه . بيسهر مع أى حد؟

ناهد: بتحبيه يا نوال ؟  
نوال: أمال . احنا لنا حد غيره.

ناهد: وهو بيحبك ؟  
نوال: ( تضحك ) باين عليكى فايقة خالص وعايزة تتسلى على .

ناهد: مش أحسن ما تتسلوا أنتم على.  
نوال: احنا مين ؟

ناهد: انتى وغيرك من الجيران.  
نوال: كده برضه يا ناهد. احنا بنزعل عشانك ونفسنا نشوفك سعيدة مبسوطة.

- ناهد: ( تضحك ) وايه رأيك فى النهاردة ؟
- نوال: ( محتارة ) انتى ؟ انتى كويسة بس هزارك يخوف .
- ناهد : ( تنظر اليها بنفس الطريقة السابقة وتتقدم نحوها . تبدأ نوال تتراجع أمامها ويدوران وراء بعضهما نفس الدورة الأولى ) ما قلتيش جوزك بيحبك؟
- نوال: بيحبنى خالص .
- ناهد: هو موجود فى الشقة دى القوت ؟
- نوال: آه . آه موجود
- ناهد: قاعد مع مين . مع أمك
- نوال: وفيها ايه؟
- ناهد: مش أحسن تقعدى انتى معاه فى يوم راحتته وتسليه .
- نوال: ( تتحرك نحو الباب وتفتح بسرعة ثم تقف فى الباب ) اما صحيح مجنونة (وتغلق الباب )
- ناهد: عجيبة !قال بتنام وتشبع نوم . أنا أفضل اتململ طول الليل، ، أفكر شوية وأبكي شوية، ودى بتنام الليل كله . ايه بيخلى واحدة زيها تنام وتشبع نوم . يكونش الجواز فيه سر بيهدى الأعصاب ويخلى الستات تنام . غريبة . لكن دى جوزها عاشق عليها كمان وهى عارفة . وبتنام – أول ما تحط دماغها على المخدة تروح فى النوم . ما فيش حاجة بتشغلها . حكمتك يارب . حتى اللى جوزها مجوز عليها، واللى جوزها بيحبها نص نص، وحتى اللى جوزها عاشق واحدة غيرها بتنام كلهم لاقيين حاجة تخليهم يناموا ويشبعوا نوم . وأنا بس اللى غلب حمارى . جربت الأدوية والحبوب وكل الوصفات البلدى والأفرنجى وما فيش فايده . قرئت فى المجالات

والقصص ساعات طويلة وما فضلش غير الجواز. بنت  
يا حسنية.

- حسنية: ( تخرج الى الصالة) نعم يا ستى  
ناهد: ( تنظر لحسنية) ليه أنا ما أجوزتش؟ وحشة . كتعة؟  
(تنظر فى المرأة)  
حسنية: فشر مين قال كده يا ستى . ده انتى قمر منور ما فيش  
جمال بعد كده.  
ناهد: ما فيش حد غيرك فاهمنى يا حسنية وبتحسى بى . يمكن  
من غيرك كنت انتحرت.  
حسنية: ( تضحك وتجرى نحوها وتحضنها) سلامتك يا ستى يا  
حلوة ياللى كلك حنية.  
ناهد: صحيح أنا حلوة يا حسنية ؟  
حسنية: انتى أحلى واحدة فى الدنيا.  
ناهد: وفى العمارة، الناس بيقلوا على ايه ؟  
حسنية: بيقلوا ما فيش حد فى جمالك . وشها أبيض منور  
وشعرها فاحم زى الليل (تممص شفيتها) لكن مالهاش  
حظ .  
ناهد: طيب واعمل ايه مع الحظ ده ؟ ايه ناقصنى عشان أمسك  
الحظ والوى رقبته. شهادة، فلوس ووظيفة؟ ما بيقلوش  
على مجنونة؟  
حسنية: فشر يا ستى . تقدر واحدة تقول كده قدامى.  
ناهد: لكن ده اللى بيقلوه اخواتى وبتقوله نجية – وأنا لازم  
أنتقم منهم كلهم . لازم يبطلوا الكلام ده – لكن ازاي؟  
أشوف عريس طيب وبعدين. هأقوله اجوزنى. هيقول  
مجنونة. طيب ليه، اشمعنى الراجل يروح للواحدة ويقول

لها أجوزك – والبنت ما تقدرش على كده – ليه؟ ما لناش  
نفس زيهم؟ . (صمت حزين) يوه طيب ما أنا عملت كده  
الأول وأخذت نصيبي من العقاب. لا .. لا. إلا الطريق ده  
. أنا لازم أجبرهم على انهم يجروا ورايا. لكن ازاي؟ ده  
هو المهم . حسنية ازاي يا حسنية؟

حسنية: (تنظرا ليها بشفقة ) أنا عارفة يا ستى . جمالك كفاية –  
وطيبة قلبك.

ناهد: (بصوت عالى ) بس انتى جيتى الفايده . الطيبة دى هى  
الى ضيعتتى وهضيعنى. الطيبة فى البلد دى ما لهاش  
نصيب ولا بد (صمت)

حسنية: هتعملى ايه ؟

ناهد: اعمل اللى ما اتعملش. اخليهم يشهدوا كلهم ان أنا أعقل  
منهم. أنا طاهرة ونقية. اتحملت كثير – خدمت أمى  
واخواتى. وبأحب الناس وأعطف على الغلابة اللى  
بيفجروا وبيعلموا البدع بتغفر لهم الناس وانا ما  
غفروليش غلطة!! اللى قلت باحب كأن الحب عا.  
النجاسة الخفية حلوة ومقبولة ومغفورة. لكن الصراحة  
وحشة . جنون والمرض عار ومصيبة.

حسنية: ما يهمكيش يا ستى . ربنا مش هيسيبك وهيبعت لك ابن  
الحلال

ناهد: ونعم بالله. هو ابن الحلال موجود ز ازاي افاتحه. أنا  
لازم أفكر عشان ما أكررش غلطتى.

حسنية: فكرى برضه اعلمى زى الناس ما بتعمل

ناهد: حسنية . اندهيلى مدام سامية. هى الوحيدة المخلصة فى  
الحتة دى.

( تخرج حسنية ) عجائب يا زمن طيب ليه . ليه  
الواحدة تلف وتدور . ايه اللي كان يحوجنى لكده لو فيه  
حد بيّفهم ويقدر (تمسك شعرها وتنظر فى المرأة ثم تبتسم  
) خلاص . ما دام المساواة انعدمت يبقى ما فيش غير  
التدبير والنضال لتحقيق الهدف زى ما بيقولوا فى  
الراديو . أيوه النضال لتحقيق الهدف . لكن أناها أناضل  
وحدى؟ ما ليش أم ولا أخت . معلّش أبلة سامية تساعدى  
فى التدبير وحسين لازم يخش فى الخية ويساعدى .  
(تجلس على الكنبه وتمسك مجلة تبدأ تقرأ فيها)

سامية: ( تدخل من الباب ) أيوه يا ناهد

ناهد: عندكيش واحد فلاح يجوزنى

سامية: ( تضحك فى حيرة ) وده كلام ايه يا ناهد . يا حبيبتى أنا

مقصدتش از علك وأنا لما قلت فلاحين كنت أقصد انهم  
مش مناسبين لك . وعشان كده اخواتك طردوهم .

ناهد: أنا ما يهمنيش . أنا نويت أجوز وعايضة عريس . يا ريته

يكون فلاح هو الفلاحين وحشين؟

سامية: ( تضحك ) أجوزك بلبل ابنى

ناهد: والنبي يا أبلة سامية تفهمينى . أنا باتكلم جد . شوفى لى

عريس فلاح ، عامل أو موظف أو أى حاجة .

سامية: الجمال ده كله ياخذ أى حاجة برضه . ده يستحق أحسن

عريس . (تربت على خدها) الحكاية دى خليلها على الله

وعلى . بس أوع تزعلى منى .

ناهد : ورينى شطارتك يا أبلة

سامية: عن اذنك الطبخ عالنار .

ناهد:  
( تودعها عند الباب ) ثم تعود الى مقدمة المسرح ( أدى  
أول خطوة سليمة . مدام سامية مدرسة وجوزها مدرس  
وناس طيبين. يمكن الحظ يضرب والسنارة تغمز. لكن  
ده مش كفاية؟ حتى لو جه العريس المناسب اخواتي  
هيطفشوه – هيقولوا مريضة ومجنونة زى كل مرة أنا  
لازم ألعب بعقلهم واجننهم لحد ما يفهمونى صح.

( ستار )

المشهد الثانى:

(شقة الأستاذ فريد تشبه شقة ناهد. فريد وزوجته سامية جالسين وأمامهم ترابيزة وعليها اكواب الشاي)

سامية : أدي الحكاية بتاع ناهد .. وايه رأيك؟

فريد : ناهد يلزمها الزواج فعلا ... وده اللي قالته مدام عفاف امبارح . واحدة زيها تعمل ايه بس. شباب وجمال تستنى ايه؟ تفتكرى انتى لو مكانها تسكتى؟

سامية : مش معقول . جسمها فاير بتتفجر حيوية. والله لولا اختلاف الدين لجوزتها لجر جس اخويا.

فريد : ناهد ما لهاش غير سعيد يجوزها هو اللي يحل عقدتها.  
سامية : ازاي ؟

فريد : ( يضحك ) كانت بتجيله حالات جنون زى كده.  
سامية : ( بلهجة حادة ) بس ناهد مش مجنونة.

فريد : سعبد برضه مش مجنون .. لكن بتجيله حالات غريبة (يضحك كأنه تذكر شيئا) فى مرة حاول ينتحر لولا لحقناه كان رمى نفسه من الشباك.

سامية : وده هيحل عقدتها والللا هيخلص عليها.

فريد : هو خلاص صحى وبقى عادى جدا . أصل الانتحار انتهى بمغامرة عاطفية طلعت الجنون من نافوخة. عقده الوحيدة الآن انه يلقي واحدة ترضى تتجوزه.

سامية : أنا مش فاهمة حاجة ... ازاي انتحر وازاي اتعالج ؟

فريد : ( يضحك ) اشرح لك الحكاية بس ركزى معايا ( يقف ويتحرك ) فى ليلة كنت راجع للبيت عند الغروب ولقيته مرمى على الشباك والنصف الأعلى من جسمه مطوح فى الشارع وصلاح وزينب ما سكنيه من الخلف زينب ماسكه فى رجليه وقاعدة على الأرض . وصلاح ماسكه بقوة من وسطه ويحاول يمسك ايده ويشدها. ( يتغير المشهد بالفلاش باك ).

أماننا صالة تمتد يمينا ويسارا، فسيحة الى حد ما لكن أثاتها بسيط عبارة عن بضعة كراسى وطاولة صغيرة إلى اليسار .. وسجادة مفروشة على الأرضية. يواجه المتفرج فى خلفية المسرح شباك، وسعيد منحنى فى الشارع لا يظهر منه الا مؤخرته وهو يحاول أن يلقي بنفسه الى الشارع. يمسك به من الخلف رجل وامرأة هما صلاح وزينب)

فريد : ( يفاجأ عند دخوله بالمشهد فيصيح بصوت مرتفع ) ايه ده يا مجنون .

سعيد : ( يفيق بفعل المفاجأة ويلتفت الى الخلف بعينون زائغة ثم يقع على الأرض منهارا )

فريد : ليه كده . أنا افكرتك بتهزر!  
زينب : ( بعيون باكية وصوت متأثر) لا حول ولا قوة الا بالله  
الجدع كان هيضيع فى شربة ميه .  
صلاح : سيبوه شوية لما يرتاح . قومى يا زينب هاتى كوباية مية  
أو لمون,  
سعيد : ( يسترد أنفاسه. يرفض تناول المشروب فى البداية.  
لكن زينب تلح عليه وتقدم له الكوب مرة بعد مرة حتى  
يقبل فى النهاية ويمسك بالكوب)

فريد : اعملى قهوة كمان يا زينب ( يقدم له سيجارة) خد يا  
سعيد اعدل دماغك .  
صلاح : كان هيضيع نفسه .  
سعيد : ( بغيظ ) عايز ارتاح من الدنيا .  
صلاح : ده بعدك ( يضحك ) عايز ترتاح حضرتك ونسيبنا لوجع  
الدماغ .  
سعيد : يعنى خايف على نفسك بس!  
صلاح : طبعا ، يمكن يحسبوك علينا نفر ويقولوا قتلوه.  
فريد : لكن أنا سايبك فى أمان الله بترسم وتتفنن ( يتلفت حوله )  
فين اللوحة المنحوسة دى؟ (وفجأة تقع عينه عليها)  
فوق رأس سعيد ياه! هى دى؟  
سعيد : ( يهز رأسه موافقا ) آه .

(اللوحة معلقة فوق رأسه الى اليمين. الجميع يتأملها  
باستغراب شديد. لوحة كئيبة بالألوان – أرضيتها  
حمراء داكنة فى قلبها طفل جميل مزعور الوجه وحوله  
ثلاث نساء شعرهن منكوش وعيونهن مفتوحة بشراهة

يكاد الشرر أن يتطاير منها فى شكل سهام مصوبة نحو  
الطفل. أفواههن مفتوحة أيضا والأسنان بارزة بشكل  
مخيف)

فريد : ( يتأمل الصورة باهتمام كبير ثم يستدير نحو سعيد) لكن  
دى صورة غريبة ! ستات دول والا وحوش؟  
صلاح : (بلهجة ساخرة ) دول ام شوشة وأخواتها ( لسعيد)  
أقولك ولا تزعلش .. دول زوجات المستقبل اللى  
بيطلعوا له فى الكوايبس

زينب : ( تخرج عن صمتها ) سعيد بيه يتجوز الوحشين دول.  
صلاح : أمال كان بيرمى نفسه من الشباك ليه ؟ أول ما  
وقعت علينه عليهم عقله طار وقرر يختصر  
الطريق.

فريد : فعلا كان فيه حاجة مضايقاه، وكان المفروض انه  
استراح بعد ما انتهت الصورة .

صلاح : ما تتكلم يا أخ وتشرح لنا فنك اللى يجيب الغم .  
فريد : قول لى يا سعيد بجد .. الفكرة دى جات لك زاي ؟  
سعيد : ( يعتدل فى جلسته ) دى فكرة قصة قصيرة كتبتها وأنا  
طالب فى أولى ثانوى اسمها " الحقد " والطفل  
المزعور عبارة عن الولد الوحيد اللى بتحاصره ثلاث  
بنات أكبر منه.

فريد : ثلاث بنات أخوات أكبر منه .. ده يبقى حظه من السما.  
زينب : يبقى الدلوعة بتاعتهم بالليل والنهار.  
سعيد : ( بانفعال ) أبدا . ده مش حب ده حقد.

صلاح : ( بتهكم شديد ) الله يفتح عليك .. ده العلم واسع يا جدعان. قول كمان قول نورنا من فائض علمك. قول هيقعدوا عليه ليه يا فنان النحس والكرب العظيم!  
سعید : ( بصوت حاد منفعل ) لا، بيحقدوا عليه لمجرد انه ولد يقدر يخرج ويدخل زى ما هو عايز.

فريد : يهز رأسه فى حيرة ثم يتكلم بصوت هادىء) أنا عايزك تخلع النظارة السوده دى، وما تلبسهاش تانى . عشان بتوريك أحلام مزعجة

سعید : دى مش أحلام . ده واقع أنا عشته بنفسى.  
فريد : ( بسخرية ) ولا يهملك، بتحصل فى أحس العائلات .  
صلاح : وخصوصا فى عائلة أبو جلمبو ( يمد يده محاولا العبث بشنب سعید) قوم أغسل وشك عشان تخرج معانا .  
سعید : أنا مش خارج الليلة . عايز استريح .

فريد : لو تيجى معانا النادى يكون أجسن لك. تيقى فرصة أغلبك عشرة طاولة تفوقك.

سعید : لا ، أنا قايم آخذ دش بارد وأنام ( ينهض مسرعا نحو الحمام )

فريد : على راحتك .. وأنت يا زينب خليكى معاه لما نرجع.  
صلاح : خلىنا لما نشرب الشاى يمكن يغير رأيه.  
فريد : يستحسن طبعاً، أو نفضل جنبه ؟  
سعید : ( يعود من الحمام فى حالة استرخاء .. يجلس على الأرض، على سجادة ويتكىء على وسادة مسنودة على

الحائط. فوقه الشباك واللوحه) ما فيش داعى تعطلوا  
أنفسكم. أنا هاشرب الشاي أوقد على السرير.

زينب : ( تدخل حامله صينية عليها ثلاثة أكواب مملوءة بالشاي  
.. تضع الصينية على الترابيزة أمام فريد وصلاح ثم  
تأخذ كوبا على طبق وتقدمه لسعيد وتجلس بالقرب منه)  
أجيب لك عشا الأول.

سعيد : ( فى نيرة عتاب رقيق ) ليه كده يا أستاذ سعيد .. يهون  
عليك عشرتنا؟

سعيد : تعبت يا زينب .. تعبت من حقد اخواتى ومن دسائس  
الزملاء المناققين.

زينب : يا خويا ما تدقش .. انت ايه يهملك من اخواتك أو من  
الناس ؟ أنسى وريح بالك.

سعيد : مش قادر .. (بغیظ) مش قادر انسى الحقد مش قادر.

زينب : ( سيبك ، مش كفاية احنا بنحك واللا احنا ما ننفعش ؟

سعيد : ( ينظر اليها ثم يبتسم ولا يتكلم )

صلاح : ما ترد على الكلام اللي زى العسل ده واللا انت مش  
شايفه؟

فريد : النضارة هى السبب ( يضحك الجميع )

:اسمعى يا زينب .. سعيد ده حياته فى ايدك وموته فى  
ايدك.

زينب : يا ساتر يا رب .. وأنا بايدى ايه بس يا أستاذ صلاح

فريد : ما تتخضيش كده يا زينب .. صلاح بيهرج.

صلاح : لأ مش تهريج أنا باتكلم جد . انتى تقدرى تنتشليه من  
حالة البؤس لو بتحببيه بصحيح --

- زينب : ( تضحك ثم تتكلم بخجل وحياء ) عايزنى أعمل ايه وأنا أعمله .
- سعيد : تتجوزيه .
- زينب : ( ترتبك قليلا ) وأنا قد المقام برضه .
- فريد : ده انتى مقامك على جدا يا زينب .. ودى فكرة هائلة
- زينب : ( تجمع أكواب الشاي الفارغة وتحمل الصينية وتتحرك الى الداخل )
- صلاح : ( يقف فى طريقها ) استنى بتهرى ليه .
- فريد : المفروض ان سعيد هو اللى يتكلم .
- سعيد : ( يبتسم ولا يتكلم )
- صلاح : وسعيد موافق طبعاً . يتكلم يقول ايه .. هيلقى فين فرصة زى دى .
- زينب : الأستاذ يأخذ واحدة من توبه وارثه أو موظفة لكن أنا فين وهو فين .
- فريد : لعلمك سعيد معقد من الموظفين .
- صلاح : والوارثة هتاخذه على ايه .. تكونيش مغشوشة فى شنبه المدلدى زى شنب عبد الرحيم بيه كبير الرحمانية قبلى .
- زينب : فشر الأستاذ راجل كامل وسيد الرجالة ( تسرع بادخال الصينية والعودة )
- (فريد وصلاح يضحكان)
- صلاح : وقعتى بلسانك .. بيقى اتفقنا .
- زينب : ( تضحك ) مرة واحدة كده
- فريد : هى عايزة سعيد ينطق الأول ، وسعيد لا يتكلم
- صلاح : هينطق يقول ايه . هيلقى فين واحدة جميلة فى أخلاق زينب . شوف بقالنا سنتين مع بعض ما شفناش منها الا كل خير .. وزيادة على ذلك هى بتحبه وتخاف عليه .

فريد : فعلا .. كل الصفات الطيبة، وسعيد فنان لايهمه الا جوهر الانسان وروحه.

زينب : يا جماعة كفاية تريقه أنا فين وسعيد فين بس؟

صلاح : وحياة أمى ما هيلقى زيك لو عمل ايه لأنه عرفك وعرفتيه معرفة حقيقية وسبيك من الكلام التانى . الحياة مش منظره.

زينب : لكن لازم ياخذ واحدة من توبه، وتتناسب مع مكانته ..مش ياخذ شغالة

صلاح : الانسان ساعة ما يجوز عايز انسانة نضيفة وشريفة تفهمه وتشاركه حياته على الحلوة والمره .ما يهموش تبقى درجاتها ايه .. بالمقياس الحقيقى انت أفضل من موظفات ياما .. تدخل بيوتهم ما تطقيش تشوفى منظرها ولا تشمى ريحتها. يا زينب الناس قيمتها فى عملها اللى بتعمله باخلاص -

فريد : أنا عمري ما شفت صلاح يتكلم بعقل وحكمة زى الليلة لكن الكرة عند سعيد ولازم يتكلم .

سعيد : ( بنوع من اللامبالاة ) هاتكلم أقول ايه ما نتم بتتكلموا كويس .

صلاح : المهم زينب توافق . هي مترددة خايفة على أولادها. لكن سعيد طيب ويحب أولادك وطول الوقت بيلاعبهم. وبدل ما تفضلى عزبه تلقى جنبك راجل يونسك، وهو صحيح مش ولابد لكن أحسن من بلاش.

فريد : يمكن منتظره ترجع لجوزها.

صلاح : مش ممكن.. لأنه طلقها مرتين قبل كده ودى الثالثة، وعشان ترجع له لازم تتجوز واحد غيره.

سعيد : ( يضحك ) عايز تشغلنى محلل يا خبيث .  
صلاح : ان نفعت وعجبتها الله يسهلكم . ما نفعوش مع بعض يبقى تتطلق هى وترجع لجوزها وانت ربنا يرزقك . كده تتحل مشكلتك ومشكلتها.

فريد : والعصمة تبقى فى إيد مين؟  
صلاح : تبقى فى إيدك. شرع الله شرع العدل عشان تحمى أولادك ، وما حدش يتحكم فيهم ولا فيكى ..مش كده والللا ايه يا فريد؟

فريد :الرأى لسعيد.  
سعيد : ما تفرقش ،أنا ما تحكمتش فى حاجة أبدا حتى أخص خصوصياتى . العصمة دايمًا ما كانتش فى إيدى . ثلاث مرات أخطب وتتنفق على الزواج ونحدد الموعد وييجوا الهوانم اخواتى ويفسدوا كل شىء فى آخر لحظة.

فريد : ازاي يا أستاذ تسمح لهم يتدخلوا فى أمورك الشخصية ؟

سعيد : من غير علمى فجأة ابص القاهم راحوا عند العروسة خبطوها كلمتين وبوظوا كل حاجة .

زينب : يا حول الله يا جدعان . ازى ده يحصل؟

صلاح : ( يقهقه ) زينب ما يتخافش عليها --- هى الوحيدة اللى تقدر تشكهم .

فريد : فعلا .. زينب تعرف توقف كل واحدة عند حدها. وانت لازم تتحرر من سيطرتهم بأى طريقة وبأسرع ما يمكن.

- احنا بنادى بحرية المرأة وانت بتضيع حرية الرجالة.  
 اتحرك يا أستاذ وحرر نفسك قبل ما تجر علينا العار.  
 صلاح : قلها .. خليه يتحرك ويفضها سيرة .  
 زينب : لا يا جماعة ما تضغطوش على الرجل بالشكل ده .  
 صلاح : خلاص احنا نطلع منها ومنكم لبعض .  
 زينب : وده كلام انتوا برضه الخير والبركة ( تضحك )  
 فريد : أعتقد أن دورنا انتهى لحد كده .. وان كان على الشقة  
 صلاح هيسيبها من بكره والسكن على قفا من يشيل.  
 زينب : ازاي .. هي حدوته كده وانتتهت.  
 صلاح : الباقي ناقشيه مع عريس الغفلة .. واحنا جاهزين  
 نجيب المأزون فى أى وقت.  
 فريد : خير البر عاجله . عشان تقطعوا الطريق على التتار  
 قبل ما يعرفوا وييجوا يفسدوا كل شئ  
 صلاح : ده الكلام السليم .. واحنا خارجين فريد يتحرك  
 ( نحو الباب )

انتظر شوية (يخاطب سعيد وزينب) حطوا ايديكم فى ايدين بعض. قدمى يا زينب ومدى ايديك (تعد يدها لسعيد)  
 أمسك ايدها أمال وانهض.. قف ياراجل أوع تقصر رقبتنا  
 (زينب تمسك يده اليمنى وصلاح يمسك باليسرى يشد  
 سعيد) شدى يا زينب جامد. قوم أقعد على كرسى عشان  
 نتقاهم معاها. شد حيلك متبقاش رمة. سعيد يترك يديه  
 ممدودة دون محاولة جادة للوقوف وصلاح يحث زينب  
 فتمسك بيديها الاثنتين وتشد بقوة حتى يتحرك سعيد  
 ويعتدل استعدادا للوقوف على قدميه وهنا يسحب صلاح  
 يده فجأة فيقع سعيد الى الخلف وتقع فوقه زينب ويرتبكان  
 ربة كبيرة وينفجر صلاح وفريد فى الضحك. وفى جو

الارتباك يحولان النهوض فتحدث بعض الأخطاء والحركات المتوقعة في مثل هذا الظرف المثير الباعث على السخرية والضحك وفي النهاية يتملص سعيد من التضارب وتشابك الأيدي والأجسام ويتمكن من الوقوف أولاً بسرعة يحاول أن يأخذ بيد زينب فيشدها بقوة فلا تكاد تقفز من مكانها حتى يختل توازنها نتيجة لشدها بقوة فترتمى على صدره وبغير وعى منه يحاول أن يسندها بيده الأخرى من الخلف فيضمها إليه. وهنا يضحك صلاح وفريد ويصفقان تصفيقا عالياً)

- صلاح : نحن هنا يا أخ .  
 فريد : يظهر إنه استحلى اللعبة ؟  
 صلاح : كفاية ( لسعيد ) يا مراهق.  
 زينب : ( تتصنع الغضب ) كده برضه يا استاذ صلاح ؟  
 صلاح : تعيشى وتاخدى غيرها.  
 فريد : ما عدش لنا مكان هنا بعد كده .  
 صلاح : يلا بنا عالنادى. وهناك نسأل على سكن آخر.  
 فريد : وجب .  
 ( يخرجان ويتغير المشهد وتضاء الأنوار مرة أخرى في شقة فريد )  
 سامية : أما عالم مجانيين .. عايزين تجوزوه الشغالة!  
 فريد : مش أحس من الانتحار .. كما ن هي اللي أنقذته ولولاها كان نزل اتكسرفى الشارع لا طال الموت ولا طال الحياة  
 ---  
 سامية : وأتجوزته ؟

- فريد : يا ريته حصل .. اليوم التانى كانوا منسجمين جدا. قلنا  
نتقل عليهم لما يتكلموا هم الأول، وفجأة ودون مقدمات  
حضرت أخت سعيد الكبرى وراسها وألف سيف لازم  
تاخده عشان يشوف الكارثة اللي حاقت بالأسرة العريقة.
- سامية : وايه كانت الكارثة اللي حصلت ؟
- فريد : أختهم الصغرى ، عقب العنقود هربت مع واد بتحبه  
وراحت تجوزه بعيدا عن بيت الأشباح . لكن أختها  
الكبرى مصرة تاخذ سعيد عشان يمنعوها.
- سامية : وجوازة زينب ؟
- فريد : ما فتحوش الموضوع أبدا قدامنا والحال على ما هو  
عليه . لكن الشيء المؤكد انه رجع متغير خالص. أصبح  
أكثر مرحا وتفاؤلا. يمكن جوازة أخته فكت عقده وفتحت  
قدامه بابا للخروج من العزلة.
- (هنا يدق جرس الباب فيسرع فريد لفتحه) اتفضل يا  
دكتور.
- حامد : ( فى الأربعين مكتئب الوجه .. عيناه محمرتان تكاد  
تطفرف منهما الدموع) أنا. أنا جاى.
- فريد : أهلا يا دكتور. خير انشالله.
- حامد : ناهد طبعا !
- سامية : ( بلهفة ) عايزانى فى حاجة --
- حامد : هى ما تستغناش عنك أبدا .. لكن جيت اتغدى لقيتها  
راقدة متكدرة على الآخر.. ومش عايزة تتكلم.
- سامية : قالت لك حاجة مزعلاها منى ؟
- حامد : عمرها ما زعلت منك أبدا .. دى ما تحبش فى العمارة  
كلها غيرك.

- سامية : وأنا باحبها زى ما تكون أختى وما برحش عندها كمان  
الا لما تطلبنى .
- حامد : احنا عارفين شعورك ناحيتها ومقدرين موقفك تمام .  
لكن أرجوكى يا أبله بلاش تجيبى سيرة الزواج قدامها
- سامية : الحقيقة هى اللى نادتنى وفتحت معايا الموضوع .  
فريد : لكن ازاي يا دكتور تتجاهلوا مشاعرها بالشكل ده ؟ أنتم  
ناس مثقفين ومبسوطين . ازاي ما تفكروش فى زواجها  
وراحتها؟
- حامد : ما تنفعش . دى مريضة واعصابها تعبانة ازاي عتعيش  
مع راجل غريب .
- فريد : مش يمكن الزواج يحل مشكلتها .
- حامد : ولو ما تحلتش هنتعقد أكثر .. ويمكن تخلف عيلين تلاثة  
وتبقى مصيبة .
- سامية : يا ساتر يا رب ، ليه التشاؤم ده كله ؟
- حامد : لا يا أبله .. الزواج مش لعبة .
- سامية : انا شايفة ان الزواج هو الحل .. أختك عقلها سليم . بس  
شاعرة بتوع من الظلم وعايزة تحس بالأمان .
- حامد : أرجوكى عشان خاطرنا .
- سامية : لا اطمئن خالص . ودى أختكم وأنتم أدري بها منا .
- حامد : ( يقف ويستأذن فى الخروج ) شكرا يا أستاذ فريد ..  
شكرا يا أبله سامية .
- فريد : مع السلامة ( وتطفأ الأنوار )

المشهد الثالث:

(تضاء الأنوار فى شقة ناهد) نجية زوجة حامد تقوم بإعداد الطعام وترتيب الأطباق على المائدة. ناهد تجلس على كرسي متحفزة وعيناها على الباب. تقف فجأة وتقفز بسرعة نحو الباب حيث تظل خلفه تتصنت على حامد عند الأستاذ فريد جارهم ثم تعود الى مكانها الأول.. يدق جرس الباب. حسنية تفتح ويدخل حامد)

حامد : الأكل جهز يا نجية ؟

نجية : خلاص .. هيا (ترص الأطباق)

حامد : ( يتجه نحو ناهد ) ناهد قومي نتغدى ؟

ناهد : كتر خيرك .. اتغدى انت والهانم بتاعتك وسيب ناهد فى حالها.

حامد : ازاي ، وده كلام برضه ؟

ناهد : ( تصرخ فيه فجأة ) اسمع .. كفاية لف ودوران (تنهض) انت كنت فين؟ رحى عند الأستاذ فريد ليه؟ رحى تقول لهم ما يجوش عندى؟ عاوزين تفلوا على الببيان والشبابيك وتجنونى.

حامد : ( بهدوء ) لا يا شيخة . ما تقوليش كده أنا

ناهد : ما تكذبينش .. قلت لمدام سامية ايه؟ قتلها ما تجبش سيرة الجواز قدام ناهد عشان ناهد هبله وعبطة ومجنونة ومش فاهمة حاجة. هو الجواز علم وفلسفة يعنى أنا ما حصلتس التحفة دى اللى انت جايها من ورا الجاموسة؟

نجية : ( تفاجأ وهى تضع الطبق على الترابيزة وتقف مترددة برهة ) كده كده ..يا ناهد الله يسامحك .

- ناهد : الله لايسامحك انتى وجوزك . انتو واقفين فى سكتى ليه؟ مش عاوزينى أجوز ليه؟ كتعة معرقة زيك؟
- نجية : أنا ما ليش داعى . منك لأخوتك واللا عاوزة تطلعى جنانك على؟
- ناهد : (بغيط وبصوت عال) طيب ..يعنى أنا مجنونة. شفت التحفة اللى انت جاييها عشان تكيدنى (تصمت برهة تلتقط أنفاسها) لا ، والنبي لأوريكى الجنان على أصله .. وحياة أمى لأجوز غصب عنكم وأغيظك انتى وأمك!
- نجية : بس لما تلقى اللى يرضى يجوزك!
- حامد : اسكتى يا نجية .
- نجية : (تقف وهى تنتفض من الغيظ ) طيب ، استاهل أنا اللى جيت هنا.
- حامد : (يلتفت ناحية ناهد ) عيب يا ناهد تقولى كده ونجية ضيفة عندك.
- ناهد : (تضحك فى هيسستيريا ) والله سلامات يا حضرة الضيفة .دى مش ضيفة يا فهميم .. دى عزول كيااد. جاية عشان تعيظنى وتشمت فى.. مش لقيت مغفل زيك يعملها سعر؟
- نجية : (تكايدها بحركة يديها من خلف ظهر حامد ) أمال زيك يا مجنونة .. ما فيش بينى آدم راضى يهوب ناحيتك؟
- ناهد : (تزداد هياجا وتحاول الهجوم على نجية ) طيب استنى لما أوريكى الجنون بصحيح (تمسك نجية من شعرها وتوقعها على الأرضية لكنها سرعان ما تنهض وتهرب بعيدا عنها . فى نفس الوقت نجد حامد يمسك ناهد محاولا ان يمنعها لكن ناهد تمسك طبقا

وتقذف به نجية فيخطئها ويصطدم بالحائط وينكسر ثم  
تبدأ فى تقليب الأطباق على التراييزة)

حامد : كده تقلبى الأكل. كده برضه يا ناهد. عشان ما تتغداش  
عندك؟

ناهد : ( تصرخ بحدة ) مش عايزاكم .. مش عايزة أشوف  
المجرمة دى أبدا. مش قادرة أشوفها (تنهج بالبكاء ثم  
تسقط منهارة على الأرض. يرتبك حاحد أيضا  
ويجلس على الكنبه وهو يبكى. نجية تقترب منه  
مزعورة باكية)

حسنية : أنهه لها مدام سامية؟

حامد : هاتى سامية تفوقها الأول .. روى بسرعه.

نجية : أنا ماشية وخليك انت معاها.

حامد : استنى شوية لما نفوقها.

نجية : هى مش ها تفوق الا لما أمشى أنا ( تمسك حقيبتها  
وتستعد للتحرك ) ابقى حصلنى ( ينفتح الباب وتدخل  
سامية مندفة نحو ناهد وورائها حسنية . تجلس  
سامية بجوار ناهد على أرضية الصالة وتربت على  
وجهها ) ناهد .. فوقى. جرى ايه. كفالله الشر.

حامد : لو سمحتى يا مدام خليكى معاها لحد ما أبعت حسين  
بالعربية يودبها للدكتور ( ثم يخرج خلف زوجته )

ناهد : ( تعتدل فى جلستها وهى تهددهم ) طيب يا حامد انت  
ونجية .. ان ما وريتكم النجوم فى عز الضهرية.

سامية : قومى يا أختى روى بالك .. أغسلى وشك وروى  
انغدى.

ناهد : آه يا نارى من البنبت نجية .. كان نفسى أرقعها علقة سخنة وأشفى غليلى، لكن ما سا بنيش عشان استفرد بها.

سامية : ( تضحك بقهقة ) يوه انتى باين عليكى شرانية خالص . معقول واحدة حلوة زيك تقول كده؟

ناهد : ( بغيظ ) ها طق منها ومنه.

سامية : يا شيخة المسامح كريم.

ناهد : مش قادر اسامحهم .. مش حاسبين بى أبدا ولا عاملين لى أى حساب.

سامية : اطمنى ربنا مش ها ينساكى أبدا ( تقف سامية ) يللا يا حسنية رتبى التراييزة ( لناهد ) قومى اتشطفى واتعدى.

(تنجيه ناهد نحو الحمام . وتتحرك سامية نحو باب الخروج وتبدأ حسنية تجمع الأطباق وتنظف المائدة وفجأة يدق جرس الباب قبل أن تصل اليه مدام سامية فتسرع حسنية بفتحه وتخرج سامية أولا ثم يدخل حسين فيجد ناهد قادمة من ناحية الحمام وهى تجفف وجهها. يتجه نحوها فتبتسم له)

حسين : أنا جبت العربية عشان أوديكي للدكتور.

ناهد : ( تضحك ) انت صدقت ؟ أنا عملت كده مع حامد عشان بيعتك تنعدى.

حسين : صحيح ؟ ده قال انك راقدة متكدرة وحالتك بالبلا.. وقال الحق الحالة رجعت لها وديها بسرعة للدكتور!

ناهد : شفت أنا بقيت هايلة ازاي ؟ مثلت الدور وخال عليه. لازم أتعبهم أكثر وأكثر لغاية ما يفكروا يفهمونى

ويحسوا بى . وانت يا حسين عايزاك تفتح مخك معايا وتفهمنى.

حسين : طيب أدينى فتحت مخى .. عايزة ايه؟  
ناهد : استنى لما ألبس هدومى ( تختفى دقائق معدودة )  
حسين : ( يتحرك فى الصالة .. ينظر للمرأة يمشط شعره. يعود الى مقدمة المسرح) قال فتح عينك يا حسين .. فتح مخك يا حسين ا افهمنى يا حسين. والله العظيم ما حد فاهمك غير أنا .. دواكى معايا أنا بس. يا ريت أخواتك يفتحوا مخهم ويفهموا ان الطب أنواع لكن يفهموا ليه ! أمورهم ماشية والمكاسب بالكوم يفكروا ليه؟ ويفهموا؟ (فجأة) بت يا حسنية ما عملتيش شاي ليه؟

حسنية : ( خارجة من المطبخ ) لأ، ماحدث قال لى  
حسين : فتحتى مخك معايا انتى كمان .. انتى عارفة أنا ما بأخلصش أكل الا اذا شربت الشاى.

حسنية : عنية ياسى حسين .. ثوانى والشاى يجهز (تدخل)  
حسين : ( يقف ينظر فى المرأة ويضع يده على جانب رأسه ) يا نفوخى اللى هيطير.. ها أسد على مين ولا مين.  
روح يا حسين .. فتح يا حسين فى هذه الأثناء تخرج ناهد فى منتهى الشياكة والجمال

ناهد : ( تضربه على كتفه ) بتكلم روحك ليه .. اتطسيت فى مخك انت كمان؟

حسين : ( يلتفت فيفاجأ بالمشهد فيظل يتراجع الى الورا ) ايوه أه أنا أصلى مش واخذ بالى

ناهد : ( تقف بطريقة استعراضية ) ايه رأيك ؟ حلوة؟

حسين : هو انتى حلوة بعقل .. ده انت الحلوة كلها. ده انتى منورة زى البدر.. لا ده مش كفاية.. انتى زى شمس النهار بتاع ألف ليلة وليلة.

ناهد : ( تستعذب الكلام ) أيوه كده .. أمال كنت ساكت ليه من زمان، ما سمعتنيش ولا كلمة زى الكلام الحلو ده شاطر تروح تألف وتغنى لنجية المفوعة المسنكة.

حسين : لا يا ناهد. أنا كنت باغنى للدكتور حامد ونجية دى عروسة حامد. ده أخوكى ولازم أفرح له.

ناهد : طيب قولى لى .. ايه حكاية شمس النهار دى؟

حسين : دى أميرة جميلة .. رفضت كل أمير اتقدم لها. وما قبلتش تتجوز غير واحد من أبناء الشعب قدر يحقق اللى هى عايزاه.

ناهد : وكانت عايزة ايه ؟

حسين : لأ - دى قصة طويلة مش وقتها .

ناهد : أنا لازم أعمل زى شمس النهار واطرد كل الخطاب اللى ما يفهمونيش صح.

حسين : برافو عليكى .. وناوية تروحي فين دلوقت؟

ناهد : أروح السينما.

حسين : ( ينظر لها ويضحك ) سينما ؟ تعملى ايه فى السينما؟

ناهد : أمص قصب .

حسين : ( يحملق فيها باستغراب ) تعرفى تهزرى.

ناهد : هم اللى بيروحوا السينما بيعملولوا ايه .. ما نتش عارف - مش قلت لك فتح مخك.

حسين : ( يتتحم ) ! نسيت افتح مخى. وقبل ما يقفل تانى افضل اننا نمشى.

- ناهد : ببساطة كده ؟ تحت أمرك أنا؟  
 حسين : أمال عايزة ايه تانى .  
 ناهد : عايزة أعمل زى شمس النهار.  
 حسين : وفين الخطاب... والملك وبقى الحاشية ؟  
 ناهد : ما يهمنيش من دول .. مش كان فيه شاعر أو مغنى  
 ووصيفة بتخدمها.  
 حسين : طبعا.  
 ناهد : كفاية دول . بت يا حسنية. تعالى امسكى المروحة  
 الريش وهويلى زى اللي بنشوفهم فى الأفلام. وانت  
 تقف تغنى أجمل قصائد الغزل.  
 ( تقوم وتعدل الفستان .. تضع رجل على رجل. تغير  
 الكرسي تمثل العظمة الملوكية)  
 حسين : وانتى فاكرة ان أنا .. فى موهبة شاعر الزمان اياه  
 ناهد : حسينة .. الجدع ده كان بيغنى فى الفرح ولا لآ؟  
 حسنية : ( تهوى لها بالمروحة ) طبعا يا ستى .. أغانى حلوة ما  
 حدش سمعها قبل كده.  
 حسين : ده حنة موال حلمنتيشى ... حاجات من اللي يحبها  
 الفلاحين .  
 ناهد : أنا من الفلاحين وباحب الفلاحين هى شمس النهار  
 مش عاشت مع الفلاحين برضه ؟  
 حسين : بعدين لما نيجى بالليل فى السهرة .. بعد الفيلم .  
 ناهد : أوع تتحرك .. ما فيش ليل ولا سهرة ولا فيلم. الوقت  
 تغنى.  
 حسين : حتى الغنى بالأمر يا ربى ( صمت ) أمرك ( يبدأ  
 يغنى بصوت جميل لكن فيه غمزة كتقليد ساخر  
 لمحمد عبد المطلب ) .

يا زهرة الفل ميلى عالفؤاد واشفيه  
واشفى فى قلبه مرض حار الاطبا فيه  
ساكن قصادكم وشايف من سنين لسنيين  
بده يشاور لكم والعين تلاقى العين  
لكنه شايف وخايف من عيون الناس  
والفكر عنده وقف حتى الفؤاد احتاس  
بده يبوس الهوا هو الهوا ينباس؟  
صعبان عليه

ناهد : ( تقف مسحورة بصوته ) يا ابن الإيه ! مين دى اللى  
بتقف قبالتها؟

حسين : أمى .

ناهد : ما تستعبطش ( تضربه على صدره ) لازم أعرف  
اللى بتألف لها الأغانى . مين قول يا حسين. مين اللى  
بتحبها دى؟

حسين : يا ستى وأنا مين هيحبنى ؟ والحب ده عايز امكانيات..  
عايز فراغ وروقة بال .

ناهد : فيه واحد يكتب الكلام ده وما يكتش بيحب .. معقول من  
غير ما تحب.

حسين : لأطبعها، بأحب . بأحب أمى وأخويا الصغير اللى  
بأربيه بعد وفاة والدى.

ناهد : بس ؟

حسين : وبأحب اخواتك برضه عشان مشغليني عندهم .

ناهد : وهو ده حب ولا بتستعبط ( تمسكه من يده ) مين هيه  
اللى بتشاور لها دى؟ تكونش البنت سكىنة المكعبرة  
اللى ساكنة قبالك.

حسين : يا ستى وأنا مين هيحبنى

قلنا لك انشاء الله تكون ست أبوها الهيلة. ده كلام عايز  
فلوس .. وانتى عارفة. عشان كده با حب لحساب  
غيرى وبأغنى عشان أبسط أخوكى ومرات أخوكى  
وهكذا.

ناهد: وامتى هتغنى للى بتحبها  
حسين : لما آخذ الشهادة فى إيدى .. وألقى وظيفة وألقى اللى  
ترضى بحالى.

ناهد : وانت مين يرضا بيك يا واد انت ( تمشى نحو الباب  
تساور له )  
(يخرجان )

( ستار )

## المشهد الرابع:

كازينو على النيل بالمنصورة ... الوقت عصرا  
والشمس مائلة الى الغروب. ناهد وحسين جالسين  
على ترابيزة.

حسين : ناويه تقعدى كثير هنا؟

ناهد : بارتاح أوى فى الكازينو ده يا حسين ! آه. نفسى فى  
شقة على النيل هنا أعيش فيها مش عارفة ليه أول مأ  
أقعد هنا بأحس بالسعادة والصحة.

حسين : يعنى ما فيش سينما خلاص.

ناهد : لا ، لا سينما ولا مسرح – خلىنا هنا نتكلم على راحتنا.

حسين : عملتى خير حتى أنا عايز أقول لك خبر يبسطك.

ناهد : ( يفرح ) صحيح ! وساكت ليه ما تقول.

حسين : هفيت خمسميت جنيه فى ساعتين النهاردة.

ناهد : هفيتهم ازاي ؟

حسين : كسبتهم فى خبطة واحدة.

ناهد : خمسميت جنيه حته واحدة !

حسين : أمال حنتين . ما تفتحى مخك بقه ولا لسه مش فاهمة  
حسين!

ناهد : وجت ازاي دى يا مضروب ؟

حسين : لعبة بسيطة من غير شيل ولا حظ .

ناهد : لعبت قمار ؟

حسين : أيوه لعبة . لكن فى السوق . تصريح كسب وسماد من

الجمعية التعاونية اشتريته من واحد وبعته لواحد

تانى، وأنا قاعد فى الأجزاخانة على الكرسى.

ناهد : على كده محمود ما علمش بالحكاية دى ؟

- حسين : لا محمود ولا حامد .دى انتهت فى ساعتين ما فيش غيرهم .
- ناهد : المبلغ ده تجيب أنا أشيله عندى وما تجبش سيرته لبنى آدم منهم .
- حسين :ليه كده ؟
- ناهد : فلوس جبنتها بشطارتك يا خدوها هم ليه ؟ تضحك بدلع ( مش قلت لك فتح مخك . الفلوس دى تفضل لنا نعمل بها حاجة للمستقبل
- حسين : ( ينظر اليها فى حيرة ) وبعدين ؟
- ناهد : ولا قبلين . فتح عينك وفتح مخك وأعمل حساب للمستقبل. تربت على خده) فوق .. فوق الجارسون وصل.
- حسين : بس لو عرفوا أقول ايه ؟
- ناهد : ما تخافش . قول الفلوس وصلت ناهد. انت ناسى انى بعت الفدايين اللى حيلتى عشان يفتحوا الأجزاخانة.
- حسين : بس .. بس.
- ناهد : ما بسش ولا حاجة . أنا مستعدة لو حد زعلك أديك كل الفلوس تشتغل بها
- حسين : ( يهز رأسه ) خلاص أمرك .
- ناهد : فيه حاجة تانية عايزاك تعملها.
- حسين : تانى ؟
- ناهد : أيوه تانى . مش اتفقنا تفتح مخك (تضحك)
- حسين : آه. صحيح ! الواحد مخه عامل زى الأسفنجة. يفتح وبسرعة يقفل .. يفتح وبسرعة يقفل.
- ناهد : ( تضحك بصوت عالى ) لآ بقه . انت مش أسفنجة . أنت من النهارده ورايح هتبقى الشاطر حسين .

- حسين : قصادك الشاطر حسن !  
 ناهد : زى بعضه الشاطر حسن بحق وحقيق مش كلام  
 حواديت.
- حسين : خلاص يا ستى . فاضل حاجة واحدة .  
 ناهد : ايه تطلب ؟
- حسين : ( يقف ) نققى على الترابيزة دى وتعلنى الآتى : أنا  
 الأميرة شمس النهار، حفيدة الأمبراطور شهريار .  
 أعلن باسمى وباسم الشعب الشهر مانى كله تعديل  
 اسم العبد الفقير حسين بن عبد الجليل الى الشاطر  
 حسن. ورفع من وظيفة مساعد صيدلى أرزقى الى  
 وكيل ومنفذ لخطة السنوات الخمسة القادمة التى  
 تهدف الى شراء شقة جميلة تطل على النيل .وعلى  
 كازينو الشجرة بالمنصورة .
- ناهد : هايل. هايل . ( تصفق بيديها )  
 حسين : ( ينحنى ) شكرا ... شكرا ( يضحك ) بدمتك مش أنا  
 دى خفيف ؟
- ناهد : طبعاً، ولولا دمك خفيف كنت أخليك تمشى معايا .  
 حسين : ده من حسن حظى يا مولاتى.  
 ناهد : ( بدلع ) كفاية بقه هزار .. خلينا فى الجد.  
 حسين : نرجع للجد ، ايه طلباتك ؟  
 ناهد : البنبت نجية الحراية ابنتت تسأل .عايزة تتدخل وتعرف  
 كل حاجة. خايفة على مال جوزها.
- حسين : من مين ؟  
 ناهد : منك ومن محمود !  
 حسين : وأنا شأنى ايه ؟

- ناهد : فتح مخك وأفهم اللي ها أقوله .  
حسين : قولى وفهمينى .  
ناهد : عايزاك تزود الغيرة بتاعتها.  
حسين : أنا؟ أزود غيرتها؟ ( ينظر إليها بشك ثم بيتسم ) تحصل  
ازاى دى ؟  
ناهد : ( بتركيز ) كبر الحكاية فى دماغها . اتكلم كثير قدامها  
قول محمود بيسافر كثير . وبيضيع كثير لغاية ما  
يتخانق حامد ومحمود ويقسموا الشركة.  
حسين : وده لزومه ايه ؟  
ناهد : ( تضحك ) لزومه ايه ازاى ؟ مش قلت لك فتح مخك !  
حقى ضايع بين الاتنين . ولما يقسموا الشركة ها  
أعرف آخذ حقى.  
حسين : ما فيش طريقة تانية غير البهذلة دى ؟  
ناهد : كل الطرق ما نفعتش معاهم ، وأنا عايزة أشوف  
مستقبلى . ( بدلع ) مش كده ولا ايه ؟  
مش كنت بتقول ان أبويا طمع على اخواته البنات  
وأكل حقهم فى الأرض . وأمك ضاع حقها كده . أهو  
أنا خايفة يعملوها معايا ويضيع حقى زى عمى .  
حسين : ( يتأثر ) آه ممكن . بس أنا وحدى مش كفاية . لازم  
تحركى محمود وتنبيهه أن الأجزاخانة القديمة  
والجديدة باسم حامد وحده .. وجايز يطمع عليه كده  
بيبدأ هو يدور على حقه برضه .  
ناهد : هایل . أهو كده مخك بدأ يشتغل .  
( يأتى الجارسون ويقدم أطباق الجيلاتى )  
حسين : اتفضلى الصنف اللى بتحبيه .  
ناهد : ( بسرور ) انشاء الله ما اتحرم منك .

أى!

- حسين : ( يضحك ) عضيتى لسانك ؟  
ناهد : ياريت . أسنانى شعلت  
حسين : نجيب حاجة سخنة .  
ناهد : لأ . أسنانى مش طايقة .  
حسين : قومى نشوف دكتور هنا .  
ناهد ] ما فيش داعى ، لما نروح البلد اطلع للخواجة كرياكو  
فى الشقة اللى فوقينا أحسن .  
حسين : تحبى نمشى .  
ناهد : يللا بينا - ( تتقدم منه فيضع يده على كتفها فى طريق  
الخروج )

( ستار )

## الفصل الثانى

### المشهد الأول:

شفة الدكتور كريكو كاتو نيللو طبيب الأسنان اليونانى فى جانب من الصالة انترية، وعلى الحائط خلقه لوحات عالمية لصور نساء عاريات. وفى الجانب الآخر تراييزة عليها طاولة وخلفها على الحائط صور تشريحية للأسنان. الخواجة يقوم بوضع زهور فى زهرية بينما تنبعث من الراديو موسيقى أجنبية. فجأة يدق جرس الباب وحين يفتح يفاجأ بناهد تدخل بسرعة.

ناهد : متأسفة يا دكتور. أنا بعث اسأل عنك فى العيادة قالوا أنك هنا وأسنانى ملتهبة. وعندى صداع.  
كريكو : (يضحك) أهلا ست ناهد . اتفضلى (يقدم لها كرسي)

ناهد : شكرا يا دكتور. أسنانى تعبانى. قلت اطلع لك فى الشقة.  
مش قادرة انتظر للصبح.

كريكو : سلامتكم ( يلاحظ ان الدكتور ينطق العربى بلهجة افرنجى وينطق الحاء خاء )

ناهد : بس يكون حضورى هنا هيزعجك . أنا عارفة أنك ما تحبش المرضى ييجوا هنا.  
كريكو : لا .. مش كل المرضى. أنا مبسوط أنك جبت هنا. أنا باسأل عليك كثير من الدكتور محمود.

ناهد : سألت عليك العافية . اصالك ابن حلال بتحب الناس  
وبتسأل.

كرياكو : ( يمد يده بمرآية صغيرة يكشف بها اطباء الأسنان عادة  
ويدخل المرأة فى فمها المفتوح ثم يدقق النظر فى  
أسنانها يفحصها واحدة بعد واحدة وهو يحرك وجهها  
بأصابعه وفى نفس الوقت يتأمل وجهها الجميل فى  
نور اللمبة القوى) أنت ما عندكش حاجة . أسانك  
حلوة أوى . دى شوية التهاب فى اللثة. أنت ما تخافش  
خالص.

ناهد : البركة فيك يا دكتور

كرياكو : عايزة مس كام يوم وتصحى ( يمد يده بقطعة قطن  
يمس بها ثم يعيد فتح جهاز التسجيل على موسيقى  
أجنبية خافتة). أنت بتخب المزيكا الأجنبية؟ دى  
بتريح الأعصاب وتبسط المزاج.

ناهد : يا بختك يا خواجه – مزاجك رايق على طول .  
كرياكو : بعد شوية اجيبلك حبتين ابتاليدون وفنجان شاي يحوش  
الصداع فى الخال.

ناهد : كمان هتسقينى شاي ... الله يكرمك يا دكتور، أنا هانزل  
أشرب عندنا .

كرياكو : مش ممكن .أنت أول مرة تيجى هنا . ولازم تقعد شوية.  
أنت بطلت تروح المنصورة؟

ناهد : لا بطلت ولا بروح .

كرياكو : ازای دی ؟ موش فاهم حاجة.  
ناهد : يعنى حسب الظروف .. لما با تعب ياخدونى للدكتور  
ولما ارتاح ابطل.

كرياكو : انت عايز فرغشة . موش دكتور. تعمل به ايه الدكتور  
واخذ شباب زيك جميل خلو أوى.

ناهد : ما بيدوناش فرصة عشان نهيص ولا ننبسط .  
كرياكو : ( يهز رأسه فى استنكار ) غلط ، وليه ما تروخش مع  
محمود بيه اسكندريه تتفسح .

ناهد : ما أحبش أروح معاه فى أى مكان . بيحبس دمي  
ويكدر نفسى .ولو حصل وضحكت بصوت عالى  
يثور ويتخانق معايا.

كرياكو : محمود بيه يعمل كده معاك . ازای دی؟ دی جنتل  
خالص. بيسهر معانا هنا بيبقى لطيف اوى أوى.

ناهد : ربنا يلطف بيه . ما حدش جاب لى النكبة غير  
المضروب فى قلبه ده.

كرياكو : معلىش ماتر علقش . أنت تتجوز وتسييه.  
ناهد : ( تضحك ) وفين اللي هيتجوزنى؟ تجوزنى يا خواجه؟

كرياكو : ( يضحك ) كان زمان .. خلاص أنا عجوز ما عنديش  
حاجة تنفع.

ناهد : مين قال كده . ده انت لسه شباب ( تلتفت للجمهور وهى  
تضحك ) تكونش خايف من العين.

كرياكو : ( يضحك ) أنا خلاص ما فيش حاجة للستات .  
ناهد : أمال الستات الحلوين اللي طالعين نازلين عندك دول  
بيعملوا ايه ؟

كرياكو : دى واخذ ست غلبان بتطبخ ليه . كان مجوز واخذ  
مدرس مزيكا وخلف منه بنت بعدين سابه وراح

أجوز واخذ تانى ، وبعدين سابه ( يتحرك للداخل  
يحضر الشاى ويقدمه لها )

ناهد : ما فيش داعى . أنا ها مضمض اسنانى وأشرب وبعدين  
لما أنزل المهم اسنانى مش عايزة دوا تكتبه؟  
كرياكو : ليه موش ترضى تتجوز الأستاذ سعيد ؟  
ناهد : مين قال كده ؟

كرياكو : أخوك محمود . قال انت موش عايز تتجوز.  
ناهد : ما جابليش سيرته ايدا – حلو العريس ده يا دكتو؟

كرياكو : أوى .. هو مدرس فى الثانوى . راجل فنان بيجى  
يسهر معنا هنا .

ناهد : ولسه بيجى هنا ؟ الأستاذ فريد بيعرفه؟

كرياكو : ده الصديق بتاعه – بيزوره كثير.

ناهد : مدام سامية ما جابليش سيرته ومحمود ما خدش رأى  
( تسرح قليلا ) شفت الواد مجرم أد ايه ؟

كرياكو : غلطان كثير. بس انت ما تزعلش . أنا نقوله تانى  
ناهد : يعنى العريس لسه موجود ؟

كرياكو : موجود ويمكن بيجى الليلة . آه الليلة هيجى هنا هو  
ومحمود اشان نسهر .

ناهد : والنبي يا دكتور تحاول تانى مع محمود عشان يوافق .  
ربنا يخليك . أصل دماغه ناشفة خالص.

كرياكو : دى أنانى . أنت لازم تتجوز. ما يصحش تقعد كده  
ناهد : قول له كده يا دكتور . فهمه والنبي.

( هنا يدق الجرس .يفتح الدكتور الباب ويدخل رجل  
طويل نسبيا يميل الى النحافة . فى حوالى الاربعين.

شعره طويل وخفيف. يرتدى نظارة سوداء سميقة  
وشارب طويل يتدلى على شفثيه)  
كرياكو : أهلا سعيد بيه. أعرفك بمدموزيل ناهد . أخت الدكتور

محمود

سعيد : أهلا ( يمد يده وينظر اليها بتمعن )  
ناهد : ( تمد يدها وهي تتفحصه ) أهلا يا باشمهندس .  
كرياكو : اتفضل يا أستاذ فى الأوده هناك شوية ( يبتعد ناحية  
الغرفة ويجلس هناك ) ايه رأيك ؟ ( لناهد )  
ناهد : ( وهي تضحك ) مش بطل على رأى المثل ، ضل  
راجل ولا ضل حيط .

كرياكو : دى كويس خالص .

ناهد : همتك يا خواجه . فتك بعافية. باى (يودعها وهي  
خارجة)

سعيد : ( بمجرد خروج ناهد يتقدم الى الخواجه وقبل أن ينطق  
بكلمة يبادره الخواجه بالكلام )

كرياكو : شفت أستاذ سعيد ناهد؟ واخذ ست كويس خالص. وخلو  
أوى

سعيد : خلوة فعلا . لكن اخواتها مش عايزين ليه يجوزوها؟

كرياكو : مسكين عايز يجوز واخواته عايزينه يقعد يخدمهم.

سعيد : غلطانين – وليه يقعدوها بعد السن ده ؟ ما يجوزوها  
بقه.

ابعت لهم الشغالة بتاعتي بس ياريت يجوزوها لى .  
البننت مستوية خالص (يتحرك فى الصالة) خالص  
عالسكين.

كرياكو : ( يضحك بسرور) تمام .دى كمان عنده عاطفة كثير  
أوى ( يحرك يديه محاولا أن يجعل بينهما مسافة  
ليجسد معنى الكثرة أو الكبر)

سعيد : وبعدين يا خواجه أنا حبيبتها.  
كرياكو : دكتور حامد أخوه الكبير بيجهز عشان يجوز، والدكتور  
محمود هو اللي متمسك بيه .

سعيد : عايز لها دكتور أو مهندس طبعاً .  
كرياكو :انتى يا خبيبي عليك تقول عايز أجوزه . ومستعد بكل  
حاجة.

سعيد : بس كده .  
كرياكو : بس انتى تقول كده، وبعدين تشوفى.  
سعيد : وأنا هاجيب منين كل حاجة .

كرياكو : هم مبسوطين ومعاهم فلوس كثير. انتى مدرس كبير  
وفاهم طبعاً لما تكون عايز سيجارة من واخذ تانى .  
ما تقوليش هات سيجارة من اللى معاك .انتى تديله  
هو سيجارة الأول .. بعد شوية يخلف عليك تأخذ  
سيجارة.

( يضحك) كده تمام . عايز تناسب واخذ غنى معاه  
فلوس كثير. قول أنا عنى زيه. ومش عايز حاجة منه  
...هو عايز يعمل انه أغنى منك يروخ يجيب حاجات  
غالية وجميلة وفخمة مش تخلم بيها. فهمنى يا أستاذ  
مغفل.

سعيد : ده انت عفريت مش خواجه.  
كرياكو : ( يضع أصبعه على رأسه ) أصل هنا فى واخذ مخ مش  
بسطرمة.

( يضحكان ويخرج سعيد ، وهنا تظهر فاطمة ) !

فاطمة : أيوه يا دكتور ( تتقدم من ناحية المطبخ امرأة طويلة  
ممتلئة الجسم خمرية اللون تفيض بالحيوية )  
كرياكو : اسمع . خلاص روخ نام مع بنتك  
فاطمة : واشمعنى الليلة عايزنى أمشى بدرى ؟  
كرياكو : فيه ناس جايين بسهروا الليلة وعايز ارتاخ شوية .  
فاطمة : فهمت .. ومش عايزهم يشوفونى؟ يا حبيبي يا خواجه  
انت بتغير عليه كتير الأيام دى؟  
كرياكو : موش عايزهم يشوفوا بطنك .  
فاطمة : (فى سخرية ولا مبالاة ) ابنك يا دكتور. ضناك، ولى  
العهد ياراجل. حد ينكسف من نعمة ربنا؟  
واحد عجوز ومقطوع زيك حقه يفرح.  
كرياكو : دى فضيحة أنت واخذ مش كويس .. مش مضبوط  
تروح بينك بسرعة.  
فاطمة : بعد ايه ؟ عايز تتهرب من الجريمة؟  
كرياكو : يللا .. بلاش كلام كتير ... دى بتاع الدكتور قواد. مش  
بتاع الأنا.  
فاطمة : ( تتصنع الغضب ) هنعيد الأسطوانة تانى . الدكتور  
فؤاد ما لوش دعوة. ده ابنك انت يا خواجه. عيب  
تتبرا منه.  
كرياكو :أنا ما فيش خاجة زى كده .. أنا ما عنديش عيال. عندى  
سكر وضغط بس شوف مين عمل فيك كده.  
فاطمة : الدكتور فؤاد كان هنا من أسبوعين لكن ده ( بقاله )  
تلات شهور يا لئيم وان ما سكتش هخليهم يحللوا دمك  
ودم الطفل ويكشفوا الحقيقة .

كرياكو : أنت واخذ بطل . كداب تضحك عليه وتدى نفسك  
للدكتور فؤاد البصباص الخاين. أشان يجى بيتى  
ويعمل كده .اشان عينك فارغة

فاطمة : عايز تستهبل عليه . ومن امتى الخواجات بيخافوا من  
الفضايح؟ الواد هاعلقه فى رقبتك. اشمعنى حبوبتك  
القديمة اياها اشتريت لها بيت وعايز ترمى ضناك يا  
عديم القلب! عيازنى اطلع فشوش.. ده بعدك يا  
خواجة كاتوينللو (تهز أكتافها وأردافها) والنبي ما  
يهيصل (الخواجة يتحرك نحو المطبخ ويأتى فى يده  
كأس براندى ولا يكاد يجلس فى مكانه حتى تتقدم منه  
فاطمة)

فاطمة : أيوه كده روق .. ينعل أبو الدنيا (تمسك الكأس وتقربه  
من فهمه ثم تسحبه بعيدا عنه) فين الكاس بتاعى؟  
(ينظر لها فى استعباط) ايه مش عيازنى أرقص لك  
الليلة .. ما عدش هز البطن يبسطك.

كرياكو : ( يضحك فى بلاهة ) روخ أرقص للدكتور فؤاد .أنت  
موش تمام .

فاطمة : ابقى تمام لما أسقط الجنين مش كده .

كرياكو : تبقى تمام خالص .. تبقى كويس

فاطمة : دى جريمة.

كرياكو : دى جريمة انك تجيب عيال . تعمل بيها ايه العيال. البلد  
مليان عيال مش لاقين يا كلوا.

فاطمة : ( تقف فى حركة تهريج ) مش كل العيال ... ده ابنى  
واين الدكتور كرياكو كاتو نوللى، أكبر طبيب أسنان  
فى الوجه البحرى واسكندرية.

كرياكو : ( يهز رأسه ) طظ . ما خليتوش حاجة . مافيش حاجة .  
كله راخ فى لعب الكونكان . أحسن لك تروخ للدكتور  
فؤاد البصباص أشان يديك حاجة تنزل الجنين .

فاطمة : مستعجل . عايز تتخلص بسرعة؟ ولما يحصل لى  
تسمم وأموت . أبقى فى ستين داهية . وانت يهملك ايه؟  
وأسيب بنتى تضيع وسط الكلاب زى ما ضيعتوني .

كرياكو : ( بلهجة هادئة ) ما تخافش .. أنت موش تموت فاطمة .  
أهت كوى أوى صحتك زى اليمب .

فاطمة : ( فجأة تغير لهجتها ) ولا يهملك يا خواجه .. وأنا ها  
خلصك خالص .

( تملأ كاسا وتشرب ) اضرب على البيانو .

كرياكو : ( بفرح صبياني ) برافو فاطمة لكن ازاي دى هيحصل  
؟

فاطمة : بأحدث طريقة .

كرياكو : أنت هتعمل عملية ؟

سعيد : عملية ايه يا راجل يا متخلف ؟ بالرقص . يهز البطن  
اخترع ما يعرفهوش الخواجات اللى زيك .

كرياكو : ( فى غاية الانبساط ) أنت عفريت فاطمة ( يقدم كأسا  
ثم بقرع كأسها بكأسه ) فى صختك يا فاطمة .

فاطمة : ( تفرغ الكأس فى جوفها ) مزيكا يا خواجه . اضرب  
مزيكا عشان أوريك .

كرياكو : ( يجلس على البيانو ويبدأ فى اختبار الأوتار والعزف  
محاوولا الوصول الى نغمة صحيحة ، وفى أثناء  
انشغاله بهذه العملية تتقدم فاطمة نحو الجمهور وتبدأ  
التحدث اليه )

فاطمة : ما عدش حد عبيط ولا حد أهبل . ما عدش طايش  
ومجنون الا أنا حتى الخواجة كرياكو بقى يعرف  
الفضيحة ويخاف منها. ما فيش فرق بين الخواجة  
كاتونيللو اليونانى وبين المعلم حمودة السنباطى  
مدرس المزيكا . كلهم أندال ( تنظر الى الخواجة )  
اخص على ده الصنف .. يعملوا العملة ويتهربوا  
منها. حتى الأولاد ينكروها ويتملصوا من مسئوليتها.  
ومن غير خجل، عاملين رجالة. رجالة آخر زمن ما  
يختشوش حتى من ربنا.

كرياكو : (يلتفت نحوها ) ايه ده بتقول ايه ؟

فاطمة : كلام ما يفهموش الخواجات . اعزف . اعزف مزيكا  
على طول سخن ( تعود للاتجاه نحو الجمهور )  
الاولانى حمودة السنباطى. كان فنان (تهز رأسها فى  
أسف) كان مدرس مزيكا لكن ياه! فنان بحق وحقيق  
. لما كان يعزف على العود كنت أحس بكيانى كله  
يرقص ويطير فى عالم تانى. عالم كله جمال وحب  
وسعادة. ومش كده بس ده علمنى الغنا والرقص. كان  
يحفظنى الأغنية احفظها وأغنيها وهو يعزف، أنا  
بارقص وهو سعيد .. خمس سنين كانوا حلم .. ياما  
حكالى عن ألف ليلة وليلة، وسمعنى الموشحات  
والأغاني القديمة. ماكانش فيه غير الحب والمزيكا  
والأغاني. نسينا كل شىء (تضحك ساخرة كنا  
عاشين فى ألف ليلة وليلة، ليالى بغداد والرشيد مش  
دريانة بتقسى. . ما فكرشى لا فى حاضر ولا  
مستقبل. وفجأة تغير كل شىء. فين وفين لما اشوف  
جوزى. أثاره أتعلق بواحدة تانية. شابة حلوة وشقرا

زى بنات الخواجات . ونسينى ونسى بنته – وكان لازم اسبيه. ما طقتش اشوف واحدة تانى تشاركنى فى جوزى .

كرياكو : ( كان قد توقف وسمع الجزء الأخير من كلامها ) لكن ما عندكش مانع يشترك فيك ثلاث رجالة .

فاطمة : اسكت يا خواجة يا بن الايه . كنت فاكرة انك انسان طلعت تعلب. كنت بتقول انك مودرن ومتحرر. عايز كل واحد يعيش على هواه وزى ما يحب. لغاية ما خدعتنى وطلعت زيهم كمان وألعن. آه لو كنت أقدر على القتل .كنت انتقمت منك ومن السنباطى ومن كل الرجالة اللى زيكم لكن اقول ايه ؟ مش قادرة أعمل شىء مش قادرة حتى اخلص نفسى منك. وازاى بعد اللى حصل وتعودت على الشرب والرقص والمتعة ( هنا ترتفع أنغام لحن راقص فتمسك بالشال تلفه حول خصرها وترقص . يندمج الخواجة فى العزف وتندمج هى فى الرقص بعنف ونشوه حوالى خمس دقائق تنتهى بان يقوم الخواجة كرياكو ويتقدم منها مبتهجا ومهلا يحاول ان يأخذها بين ذراعيه فترقص وتدفعه بعيدا عنها ثم تتكلم للمرة الأخيرة) كان زمان وجبر. أنا لى حساب لازم أصفيه.

(تنخرط فى البكاء ثم تنزل الستار)

## المشهد الثانى:

(شقة ناهد كما رأيناها فى الفصل الأول \. ناهد تفتح

الباب وتجد حسين)

ناهد : ادخل يا حسين

حسين : ايه يا ناهد . فيه حاجة , أسنانك ارتاحت عالدوا اللى جيته

ناهد : الحمد لله . ايدك فيها الشفا,

حسين : ايدى ولا ايد الخواجة اللى قال عالدواء

ناهد : لكن ايدك اللى جابت الدوا . انت الوحيد اللى بتهاودنى.

وبتقضى كل طلباتى.

حسين : عيب يا ناهد تقولى كده . ده انتى بنت خالى برضه.

لحمى ودمى أختى (يتغير صوته ويرق جدا) انتى لما

تعيبى بأحس ان أنا عيان . لما اشوفك مبسوطة

بتضحكى بأشوف الدنيا كلها فرحانة .

ناهد : (تضع يدها على كتفه ) صحيح يا حسين ؟ الكلام الطود ده

بتجيبه منين يا حسين؟ بتألفه ولا بتحفظه من الكتب.

حسين : الكلام طالع من قلبى . يا ناهد أنا غلبان طول عمرى فى

تعب وعرق ليل ونهار . باشقى كثير وبتعذب عشان

حاجات كثير نفسى فيها – ومش طايها . عشان كده

بأحس بيكى وبالألمك.

ناهد : بس كفاية لحسن هتفكرنى بالأخزان . وأنا قلت لك من

أيام أوع تشغل بالك عالفلوس . أنا معايا فلوس كثيرة

كلها تحت أمرك . خد دروس زى ما انت عايز وحقق

النجاح . ياريتهم كانوا سابونى أتعلم وأكافح . واشتغل

حتى بعشرة جنيه وأحس بكيانى زى بقية البنات الا

حبسونى زى القرد فى القفص.

حسين : زى القرد! ما تقوليش كده. انتى قمره منوره البيت ده  
من غيرك كان هيضلم.  
ناهد : وهو بيتى يا حسين ؟  
حسين : بكره يبقى لك بيت أحسن منه .  
ناهد : (تبتسم) صحيح يا حسين !!  
ايه ده اللي جبته فى الكرتونه. محمود وصل  
حسين : آه لسه واصل . وسبته فى الأجازة يجرده الحساب  
وجبت أنا الكرتونه . بس ما أعرفش فيها ايه زى ما  
قالى وديها أنا جبتها وجيت.  
ناهد : (تفتح الكرتونه ) دى فيها جاتوه وبسبوسة . أقعد يا وله  
كل حطة وخذ معاك حنتين لأمك واخوك.  
حسين : هأكل واخذ كمان لأمى وأخويا (تحط الجاتوه)  
ناهد : أمال – عمتى .كانت حنينه أكثر من خالتى  
حسين : بس مسكينة ما حيلتهاش حاجة . لكن خالتك برضه  
متريشة. احنا فين وانتوا فين.  
ناهد : (تضربه على صدره) ما تقولش كده . البركة فيك بكره  
تبقى دكتور زى حامد ومحمود ويمكن أحسن.  
حسين : مرة واحدة كده . انتى واخده مقلب فى. وانا لو جببت  
ستين فى المائة وانتسبت لكلية التجارة هابقى حققت  
المنى.  
ناهد : هتحقق باذن الله كل اللي انت عاوزه .  
حسين : يا سلام يا ناهد ، كلامك ده يفتح لى باب الأمل .  
بينسينى همومى.  
ناهد : وأنا كمان يا حسين . لكن قول لى اخواتى ليه مش  
عايزين يجزوني.  
حسين : مش معقول ؟

ناهد : كل ما يجى عريس يطفشوه . آخر واحد جابه الخواجة  
كرياكو قالوا ناهد مش راضية من غير ما أعرف  
ولا أسمع لما يفتنى القطر.

حسين : اطمنى . عمر القطر ده ما يفوتك. انتى حلوه وطيبة  
وصغيرة ولسه بدرى وكل سنة تقوت عليكى بتزيدى  
حلوة وأمارة.

ناهد : يا حبيبى يا حسين ، لو حد من اخواتى قال كلمة من دول  
كانت الدنيا ما تسعنيش.

حسين : ما تزعليش . أصل الحكاية محسوبة تمام. اللي معاهم  
كلام مامعاهمش فلوس. واللى معاه فلوس ما  
بيتعاملش بالكلام. اخواتك شافوا أيام قاسية كتيرة  
بس مش زى أنا طبعاً . لكن بقه عندهم قدرة وفلوس  
كتيرة ومكاسب من كل ناحية.

ناهد : وأنا تايهة مش عارفة مصيرى ايه . أو نصيبى فى ده  
كله . نفسى أعرف وانت يا حسين خليك جنبى.  
اعرف كل شىء وقوللى عايزة أعرف حقى. لما  
تشوف محمود وانت راجع قول له ان أنا راقدة  
تعبانة. لازم أدور على نفسى بسرعة. ساعدنى يا  
حسين وأكتم سرى.

حسين : اطمنى هاعمل كل اللي يرضيكى (يخرج )

ناهد : حسنية

حسنية : نعم يا ستى

ناهد : أنا هادخل أنام، لما يجى الدكتور محمود قولى له  
أسنانها تعباها ومصدعة . راحت ليلة أمبارح للدكتور  
كرياكو(تقرب منها وتهزها من كتفها ) حسنية حبيبتى  
فاهمة . أنا قلت ايه؟

حسنية : أيوه . عيانة ومش تقدرى تقومى من السرير  
ناهد : برافو ! وهاتى بوسة على كده. ( تقبلها) كمان حاجة  
النهار كله تعبانة ومزرجنة يعنى حاولى تتكدى  
عليه .

حسنية : ( تضحك على الآخر )  
ناهد : ادخلى المطبخ اتعشى . خدى جاتوه وكلى. وأبقى  
حضريله الأكل اذا طلب.

حسنية : تصبى على خير.  
ناهد : (تبتسم بحنية ) يا حبيبتى يا حسنية ، لولا وجودك معايا  
كنت انتحرت من زمان . (لا تكاد تدخل ناهد حجرة  
نومها وتغلق الباب حتى يدق الجرس دقة واحدة حتى  
تسرع حسنتية وتفتح الباب. ويدخل محمود)

محمود : أزيك يا حسنية ، ناهد فين ؟

حسنية : راقدة فى أودتها .

محمود : ايه يا بت ؟

حسنية : (تبدأ تمثل بيديها وعينيها وصوتها ) أسنانها يا حبة  
عيني بينقحوا عليها النهار كله ، مدوخينها من ليلة  
امبارح.

محمود : راحت للدكتور ؟

حسنية : الدكتور كريكو مس لها مرتين وعطاها حبوب . عندها  
صداع ومزاجها متعكن خالص من ساعة مانزلت  
من عنده.

محمود : آه ( يهز رأسه ) يمكن قال لها حاجة ( يفتح باب  
الحجرة وينادى عليها . تظهر ناهد نصف راقدة تنظر  
اليه فى عتب دون أن تتكلم) ناهد  
؟ مالك (يهزها) ردى على . فيه ايه؟

ناهد : تدفع يده بعيدا عنها وتستدير ثم تضع راسها على  
الوسادة)

محمود : قومي يا ناهد . اياك كرياكو قال لك حاجة تزعلك منى.  
قومي يا أختى قولى مالك، كرياكو أهبل وعبيط  
بيخرف باستمرار.

ناهد : ( فى السرير وهى تنتظر اليه نظرة لوم خفيف )  
مافيش حد عدل غيرك انت؟ كرياكو أهبل وأنا  
مجنونة وانت اسم الله عليك كامل الأوصاف.  
محمود : أيوه كده الله يفتح عليكى . خضتيني قومي. قومي.  
جهزت لك حنة مفاجأة.

ناهد : ( تفرح ) لي أنا ؟

محمود : أيوه . مفاجأة.

ناهد : هيه ايه ؟

محمود : حذرى فظرى . تقولى آيه؟

ناهد : ياترى اللى فى بالى ، معقول ؟

محمود : وأحسن .

ناهد : ما تحيرنيش . المفاجأة الوحيدة اللى تسرنى هيه اللى  
فى بالى أنا.

محمود : طيب قولى اللى فى بالك .

ناهد : عريس !!

محمود : يخى . هو ده طلب يا شخية ده أنا لو حبيت أجيب لك  
ميت عريس.

ناهد : صحيح ؟ أصل العرسان مرصصين فى الشوارع؟

محمود : فيه حاجات أهم .أنا جبت عربية مرسيدس .

ناهد : ( بسخرية ) مبروك عليك . بس دى أعمل بها ايه . ها  
تفسح فيها ولا هاروح بها الجامعة. دى تخصك أنت

تصيع بيها – أما أنا هافضل هنا زى الكلبة  
المسعورة.

محمود : اخص عليكى يا ناهد (يربت على كتفها) يا حبيبتى انتى  
طالمانى . أنا باجرى ورا الشغل، ورا المكاسب فى  
كل حتة . عيب أنا مش صايح . انتى عارفة من سنتين  
تلاثة كنا ايه وأصبحنا ايه. مين عمل ده كله ؟ أنا  
عامل صيدلى وتاجر كسب وسماد ورز وكل حاجة.

ناهد : اسمع بلاش لف ودوران أنا مين أنا ؟ فين نصيبى .  
أنت أخذتمونى مضيت على بيع الفدانين بتوعى. ما  
كتبوليش حاجة فى الهيصة اللى أنتم فيها – بعد حامد  
ما يجوز وأنت تتجوز, أنا هاعمل ايه ؟ أخدم مراتك  
ولا مراته ؟ وان ماخدمتش ايه اللى هيحصل لى ؟  
هابقى اشحت منك انت وهو؟

محمود : أخص عليكى يا ناهد . خدى اللى تطليه.

ناهد : ده كلام فك مجالس . الصبح يبقى غير كده.

محمود : طيب الصبح يبقى ايه ؟

ناهد : أنا دفعت رأسمال التجارة بتاعتكم دى ... مش كده؟

محمود : طبعا ما بنكرش ده --

ناهد : يبقى ليه نصيبى فيها – التلت . الربع . الخمس . السدس  
. حاجة تبقى محددة ومكتوب بها ورق عشان اضمن  
حياتى ومستقبلى.

محمود : كلام جميل . احنا رجلين وانتى نص. يبقى لك الخمس  
على طول . الكلام ده فيه عيب؟

ناهد : بس التنفيذ بالورق وانت لازم تعرف حقك . حامد كاتب  
كل شىء باسمه-

- محمود : بكرة زى دى الوقت تكون الورقة جاهزة . يجى حامد  
من المحلة الوقت ونقوله.
- ناهد : وينسجل كله فى الشهر العقارى . حامد ما ينضمناش  
الوقت وراه نجية وأمها زى التعابين . عايزة  
تعرف كل حاجة وتكوش عليها.
- محمود : ده كلام الناس العاقلين . فيه حاجة تانى.  
ناهد : تعشيت ولا لسه -- ؟
- محمود : ابدأ . قومى نتعشى مع بعض.  
ناهد : ( تتحرك وتترك السرير ) حسنية . حطى الأكل على  
الترابيزة.
- ( لمحمود ) العريس اللي جابه الخواجة كرياكو  
طفشته ليه من غير ما تقول لى ؟
- محمود : يا بنت الناس ده جدع شربة ما ينفعكيش.  
ناهد : يا ترى هو الى ما ينفعليش ولا انت شايف ان أنا ما  
أنفعلش عروسة.
- محمود : لأ . ده كبير عليكى ووظيفته مش قد كده.  
ناهد : بس أنا شفته ليلة امبارح داخل عند الخواجة . شكله  
مش بطل.
- محمود : بس ما حيلتوش حاجة . حته مدرس بتاع رسم.  
ناهد : وماله المدرس ؟ امال عايزلى دكتور.
- محمود : على الأقل صيدلى من اللي بيشتغلوا معنا فى  
الاجزاخانة . تبقى انتى صاحبة الاجزاخانة وهو  
صيدلى عندك.
- ناهد : وأن ماجاش الصيدلى . سييك من الكلام ده . قال  
عصفور فى ايدك.

محمود : بس اصبرى يا شيخة . مدرس ايه بس اللي تتجوزيه؟  
هم المدرسين بياخدوا مراتبات ده أنا بأضيع فى اليوم  
الواحد مرتب مدرس فى شهر.

ناهد : ليه يا أخويا . أستاذ فريد اهو مبسوط خالص.

محمود : ده بتاع انجليزى بيدي دروس . لكن ده بتاع رسم ما  
حليتوش غير الفرش.

ناهد : واحنا من كام سنة كان حيلتنا ايه.

محمود : أفهم من كده أنه عاجبك .

ناهد : أوى .

محمود : أدينى فرصة استشير حامد . ونشوف هيقول ايه بعد ما  
رفضناه .

ناهد : يا حبيبى يا محمود . أنت حنين الليلة خالص (تعانقة  
بفرح . يدخل ليغير ملابسه)

محمود : هاخلع هدومى عشان أتعشى . يتحرك ناحية حجرة  
النوم . وتبدأ ناهد ترقص فى عنف ونشوة ثم تبدأ  
تغنى ( ما تزوفينى يا ماما . أوام يا ماما ) بعد قليل  
تتذكر (

هيه فين بس ماما عشان تزوفنى ) تتوقف عن الغناء  
ثم تنخرط فى نوبة بكاء حار حتى تنزل الستار)

### المشهد الثالث:

- (شقة الأستاذ فريد جارهم. فى الصالة ناهد وسامية)
- ناهد : تعرفى يا مدام سامية الأستاذ سعيد بتاع الرسم جاى  
يخطبنى. عارفينه يا مدام؟
- سامية : ايوه ده زميل جوزى وصديقة الحميم.
- ناهد : ما قلتوليش قبل كده.
- سامية : يمكن ما جاتش مناسبة .
- ناهد : بعث الدكتور كرياتكو كلم محمود.
- سامية : على بركة الله .أنتى شفتيه وعجبك ؟
- ناهد : شفته على الطاير شكله مش بطل . بس شنبه طويل  
أوى.
- سامية : ( تضحك ) ابقى احلقيه.
- ناهد : تعرفى ايه عن أهله؟
- سامية : أهله ناس طبيين. واحدة من أخواته دكتورة فى الجامعة  
والثانية ناظرة مدرسة. وعندهم بيت فى اسكندرية  
كده من دورين فيه أربع شقق وأخته ساكنه فى شقه –  
والباقى متأجر. بس هو ما بياخودش حاجة.
- ناهد : زى بعضه . مستغنين عنه يعنى.
- سامية : آه . وأحياناً بيدوه مبالغ كده صغيرة.
- ناهد : طب والله عال . ده محمود فاهم انه شربه وما حيلتوش  
حاجة.
- سامية : لأ. أطمنى.  
( ستار )

## المشهد الرابع:

يتغير المشهد. صالة بمنزل الخواجة كرياكو. فريد  
وكرياكو يلعبان الطاولة.

يدخل محمود. كرياكو يرحب به.

كرياكو : أهلا أستاذ محود . متشكرين على الإزارة. النوع  
التانى كان أحسن.

محمود : ( بيتسم بغيظ ) النوع التانى مش موجود . ولو كنت  
عرفت اللى عملته قبل ما أبعثها كنت حطيت فيها سم  
فيران.

فريد : يا ترى جرى ايه ؟ عمل فيك مقلب؟

محمود : وأى مقلب يا استاذ ؟

كرياكو : ايه اللى بتقوله دى ( بحيرة وجدية ) لمين سم الفيران  
دى.

محمود : ( فى برودة ) لواحد خواجة ابن حرام.

كرياكو : مين دى ؟ عمل فيك مقلب ؟ زى الدكتور فؤاد دى ما  
عندوش أصل ولا أخلاق.

فريد : ( ينظر لمحود ويقهقه ) انا مش فاهم حاجة.

كرياكو : ( يضحك ) فاطمة دى واخذت كويس . كان مجوز  
واحد بتاع مزىكا . سابه وأجوز واحد ست تانى . شفت

يا فريد بيه . رجل ندل ما بيسألش فيه . ما فيش فلوس  
ولا بيديه حاجة هياكل منين هو وبنته؟ عشان كده

ابتدأ يشتغل . يعمل ايه ؟

فريد : لكن محمود بيقول أنك مجوزها.

محمود : دى حامل منه.

كرياكو : رجل بطل . مديه المفتاح بتاع الشقة أشان لما أموت  
كده فجأة يكفنى بالفلوس اللي عنده. أنا واخده صديق  
واثق فيه . بعدين يخلينى فى البلاج وييجى يضحك  
على فاطمة.

محمود : طب قول لنا عملت ايه لما عرفت؟

كرياكو : رخت على طول .قلت للست بتاعه. مراته واحد ست  
حلوه أوى . بنت ناس كويسين .متربية كانت بتستغل  
أبلة بتاع فرنساوى . وعنده ولدين لطاف أوى. أوى  
قلت جوزك دى راجل بطل نجس. بيعمل حاجات  
بطالة مع الشغالة بتاعى.

( محمود وفريد يضحكان على كلامه )

فريد : وفاطمة ازاي تسلم نفسها له ؟

كرياكو : ده ست طيب أوى . ما يقولش لأ ابدا ( يضع يديه على  
صدره ويحاول أن يشرح ) أصل عنده عاطفة كبيرة  
أوى . عاطفة حب يعنى.

محمود : عشان كده اتلمت عليك يا خواجه يا أهبل . ده فؤاد واد  
جن قدر يستكردك.

كرياكو : ( يدخل الحجرة الثانية . يحضر كتابا كبيرا . يقرأ باللغة  
اليونانية ويترجم ) دى كتاب فى علم النفس اسمع يا  
فريد بيه . سوف يقول ايه دى ( يقرأ بضعة سطور  
بصوت منخفض ثم يخلع النظارة ويبدأ يترجم )الست  
ده جسمه مليون أوى- يعنى كوى - فيه حيوية (   
يوضح بيديه ) شكله حلو أوى . وشه أحمر أوى  
.عنده عاطفة عايز يديها لواحد راجل . يعنى عنده  
هنية كثير أوى . أشان كده هو يخب الناس لما واحد

يقوله كلام حلو. يقول له باخبك . يخبه على طول  
أشان عايز يدى الخب اللى عنده.

محمود : وبعدين تسيب نفسها لأى واحد يا راجل يا تحفة.  
كرياكو : صحيح آه . أشان بيخب الناس. عنده أطفة كوية أوى  
(فجأة ) انت واحد غشسيم ما بتفهم.

فريد : لكن الحالة دى غريبة  
كرياكو : موش حالة غريبة ولا حاجة . دى مستوى أوى. وعايز  
واحد يخبه أشان ينبسط .اشان يشاركه فى مشاعره  
الأطفية . اشان يديه الخب اللى عنده . دى عامل زى  
واحد غنى عنده كتير فلوس وهو كريم عايز يدى  
الناس التانيين ( لمحمود ) اصله كريم موش غشسيم  
زيك .

محمود : ( يغمز لفريد ) يا جدع سيبك من الكلام الفاضى ده .  
خواجة أهبل مخه طاير.

كرياكو : انتى موش تفهم كتير . أمال انتى بتروح اسكندرية  
تعمل ايه.

فريد : أنا عايز أعرف بالضبط ايه اللى بينكم نازلين على  
بعض تلبىخ.

كرياكو : ( يضحك ) دى واخذ أفندى ما بيّفهمش. رجعى وموش  
بيؤمن بالعلم. ده عايز يمسك الشنب بتاعه ويبرمه  
ويشخط ويؤمر ويقول تكاليد.

محمود : أنت خواجة مخك طاير فى الهايفه.. لكن احنا شرقيين لنا  
طابعنا وتقاليدنا.

كرياكو : طظ فيك . ايه يعنى شركى أو غربى دى انسان ودى  
انسان ولا دى انسان ( يشير الى محمود ) ودى  
حيوان .

فريد : ( يضحك وهو ينظر لمحمود الذى يضحك أيضا ) رد  
يا أخ.

محمود : ده خواجه أهبل . البنت تيجى علشان تعالج أسنانها  
يقلبها علينا ويقول لها سعيد عايز يجوزك .

كرياكو : انتو موش عايزين أختك تتجوز ليه ؟ أنتى عندك خبط  
فى النفوخ بتاعك . ما فيش مخ . اشمعنى انتى  
تروخى اسكندرية تلعب مع الستات البطاليين زى  
الدكتور فؤاد وتقول شركى . شركى .

فريد : ودى حاجة تزعلك يا محمود . راجل ماشيلكم فى الخير .

محمود : طبعا . لأن البنت تعبانة . مريضة و عصبية وما تنفعلش .

كرياكو : ايه يعنى . لما ما ينفعلش . تبقى تطلق .

فريد : والله فكرة !

محمود : ازاي بس اهنا هنعملها حقل تجارب وان خلفت ؟

فريد : مش مشكلة . بلاش تخلف سنة أو سنتين لغاية ما تتأكد  
من نجاح الجواز .

كرياكو : خرام عليكم دى أختك واخذ ست حلو خسارة . لازم  
يجوز وينبسط دى عايز واخذ يخبه .

محمود : ( يقاطعة ) هات الطاولة فضنا من دى السيرة .

فريد : وليه ما نفكرش فى حل ، وتخلينا نفكر معاك . أصل  
مش معقول نقعدوها على طول كده .

كرياكو : ( يملأ كاس من البراندى ويقدمه لمحمود ) ياخذ واحد  
كاس الأول أشان مخعه يفتح ويعرف يفكر .

فريد : ( يشرب ) نوع ممناز يا دكتور .

كرياكو : دى جابه مخمود تيه ولو انه ما يفهمش .

محمود : انت شغال طبيب أسنان ولا طبيب قلوب ؟

كرياكو : انت مش مثقف انتى مخك مقفول انتى لازم تخب  
عشان نقدر تفهم .

محمود : كفاية انت نعملك أفوكاتو الحب فى العمارة . أمال  
متجوزتش ليه لما انت فالح.

فريد : آه صحيح يا دكتور؟

كرياكو : أنا كنت بأخب واخد ست كويس أوى . كان بيخبنى  
موت ( يهز رأسه ) كان ست نضيف خالص خالص.

كان يعمل كل حاجة فى البيت تمام . لما كان يشوف  
شراب مكطوع كان بيخيطه على طول.

محمود : انت متخصص فى الشغالات.

كرياكو : دى ست طيب كان متجوز راجل طيب.

محمود : وكانت بتحبك على جوزها !

كرياكو : جوزها كان راجل طيب.

فريد : كان بيحبك برضه ؟

محمود : كان يجى هنا مبسوط خالص ( يهز رأسه فى أسف )  
أنا بنيت لهم بيت ثلاث أدوار فى المنصورة.

محمود : وراحت فىن الحبوبة - يا كو توموتو يا حبيب.

كرياكو : راخ . راخ . مات من أربع سنين . شوف فريد بيه . كل  
يوم خد بازورها وأحط وردة حمرا على الكبربتاعه

.كان بيخب الورد الأحمر ( يمسك زهرية الورد )

هو اللي جاب الزهرية دى . أشان يحط فيه ورد كل

يوم . أشان كان بيخب الورد باخد له ورده كل

أسبوع.

فريد : ( بسخرية ) يا سلام على الوفاء يا خواجه .

محمود : قول يا سلام عالهيل . المهم البيت راح عليك؟

- كرياكو : ( يهز رأسه ) أنا سبته للبنت بتاعه وجوزها أشان  
 راجل طيب .
- محمود : أكمناك بتلخ كل يوم تجيب واحدة شكل .
- فريد : عشان بطل يحب ؟
- كرياكو : خلاص ( يهز رأسه فى ندم ) كنت مبسوط أوى أوى .  
 فلوس كتير أرض ومبان بتاع بابا . راخ كله عالقمار .
- محمود : خلصنا من السيرة دى . احنا مش ناقصين نسمع تاريخ  
 هياقتك . فضنا وهات الطاولة .
- كرياكو : اسمع قبل ما نلعب نتفق على يوم أشان نزورك احنا  
 والأستاذ سعيد .
- محمود : سيبك من الموضوع ده . اخلعه من دماغك . ولما تيجى  
 ناهد هنا ما تجبش السيرة قدامها .
- كرياكو : ( ينظر اليه بضحكة بلهاء ) انت واخذ أفندى غشيم .
- فريد : اسمع يا محمود . احنا نمشى فى الحكاية بتاع سعيد دى  
 ونحاول بينا وبين بعض وممكن من غير تعقيدات  
 يعنى لا مقدم ولا مؤخر ويجوزوا .
- محمود : ( بغضب ) يا أخواننا يتعبوا .
- فريد : يا أخى نجرى وان تعبنا نتطلق .
- محمود : والأولاد ؟
- فريد : ما فيش داعى للخلفة سنتين تلاتة مش مشكلة .
- كرياكو : فيه حاجة اسمها هبوب منع الحمل . ولا انتى ما  
 تعرفيهوش يا دكتور مغفل
- محمود : احنا قلنا دى حاجات ما يفهمهاش الخواجات اللى زيك  
 ما تفهمش تقاليدنا .
- كرياكو : تكاليد ايه دى اللى يمنع واخذ عايز يجوز ؟
- فريد : انتم خايفين أكثر من اللازم يا محمود .

- محمود : ازای ده لا . احنا ما نكرهش لها الجواز. بس بندور على راحتها. فى الأول وبعدين راحة اللي هيجوزها وطبعاً هو ما عندوش فكرة عن حالتها ؟
- فريد : ما فيش داعى نديه أى فكرة وأنا من رأى أن حالتها مش خطيرة . ولو اجوزت هتتغير تماماً.
- محمود : مين يضمن ؟ افرض قلبت حال الراجل الغلبان يبقى يعمل ايه ؟
- كرياكو : ( خارج الموضوع تماماً ) ده هينبسط كثير.
- فريد : ( لمحمود ) ممكن تساعدهم يتغلبوا على أى مشكلة
- محمود : بفلوس طبعاً ما فيش مانع كل اللي تطلبه.
- فريد : الفلوس مش كل حاجة . الفهم أولاً يعنى لما تظراً أى مشكلة تبقوا تفقوا جنبهم.
- محمود : وان منفعناش ، دى بتجيبها حالات تقعد أيام ما تكلمناش، وتجيب فى الدوا وفى العلاج حتى الكهربا يا جماعة أنا مش مرتاح للموضوع ده أبد.
- كرياكو : ليه يا غشيم افندى . عايز واخذ ست زى دى تقعد من غير خب ولا فرفشة.
- محمود : احنا قلنا تتلهى وتسكت شوية . ده كلام ما يفهموش الخواجات.
- كرياكو : خليه يجرب . ما ينفعش الجواز يبقى يطلق، فيه ايه دى . تكاليد . تكاليد . تاكل تكاليد تشرب تكاليد تتجوز تكاليد.
- محمود : الخواجة الأهبل عايزنا نعمل البنت حقل تجارب.
- فريد : لأ مش تجارب بالضبط . هو المطلوب شىء من الشجاعة اللازمة لكل مشروع . والجواز كله مغامرة ووجود الفهم مع حسن النية ممكن تنجح الجوازة دى.

وسعيد انسان طيب وعطوف جدا وده اللي مشجعنى.  
دى الشغالة بتاعتنا لما كانت تتعب شوية كان ياخذها  
فى الحال للدكتور. وكان يقضى ساعات بحالها ألقاه  
شايلى ابنا الصغير وببلاعه. انسان طيب بكل معانى  
الكلمة.

كرياكو : ( يملا الكاسات ) أفهم يا بتاع التكاليد ( يضحك )  
تعرف انه كان فيه زمان واحد وزير أيام الخديوى  
اسمه وزير التكاليد.

محمود : ( يقاطع الخواجة ) طيب يا فريد بيه الجدع الطيب ده  
ذنبه ايه نخط حياته ومستقبله فى الميزان.

فريد : ولا ميزان ولا حاجة واحنا عايزين مصلحة الاتنين  
يمكن تتحل عقدتهم . وهى لما تجرب حظها يبقى  
أحسن بدل ما تقعد تفكر طول الوقت فى الجواز.

محمود : ونبدأ فى المحاكم وهات محامين واحضر جلسات،  
يبقى المرض من جانب والقضايا من جانب تانى .

فريد : ولا محاكم ولا قضايا لو حصل خلاف واستحكم لا  
قدر الله تبقى الحكاية تنتهى ببساطة زى ما بدأت .  
يعنى انت فاهم وأنا فاهم دفنينه سوا . على ايه  
القضايا احنا قلنا ما نكتبش لا مقدم ولا مؤخر . مش  
معقول نخط الراجل فى مؤامرة وعلى العموم نقدم  
الخير الأول قلت ايه ؟

محمود : أرجوك يا فريد بيه بلاش الموضوع د تتكلم فيه تانى.  
ده خواجه أهبل ما يفهمش.

كرياكو : احنا نيجى ناخذ أهوة عندكم بعد بكرة ومعانا الأستاذ  
سعيد .

محمود : ( يوجه كلامه للخواجه ) هات الطاولة والازالة  
التانية وريح دماغنا شوية ، أوع تجيب سيرة  
الموضوع ده تانى على لسانك.

## المشهد الخامس:

### شقة ناهد

حسين : شوفى يا ناهد أنا نفذت الخطة اللى اتفقنا عليها . قلبتكم على بعض، خلّيت كل واحد بيدور على نفسه. فضلت اعبي فى نجية لما هبلتها وقلبت مخ جوزها. المهم أوعى تجيبى سيرة الفلوس أو سيرتى. حامد أخوكى هايح زى الطورالمجنون بيدور فى كل حتة. راح البنك شاف الحساب ورجع يدرج فى الأجزاخانة، وخذ منى المفاتيح وقال لى روح اقفل المخزن وهات مفاتيحه فجيبت على هنا عشان أديكى فكرة.

ناهد : ويعدين ؟ هنعمل ايه؟

حسين : ها شوف محمود وأديه فكرة قبل ما يبجى.

ناهد : وانت ها تيجى معاه ؟

حسين : لا طبعا . أنا ها ختفى خالص لحد ما تنتهى العاصفة.

ناهد : ازاي ؟ وتسيبنى فى الزنقة دى وحدى؟

حسين : خلينى بعيد أحسن لغاية ما يتحاسبوا . المهم أوعى تقعى بكلمة كده ولا كده. أنا عطيتك الفلوس كلها وما خدتش حاجة لنفسى.

ناهد : (تنظر له فى صمت )

حسين : أنا ماشى قبل حامد ما يوصل عشان أشوف محمود.

ناهد : ( تشيعة بنظرة احتقار) أخص عليك يا جبان . تسيبنى

وتهرب فى ساعة الكرب. طيب يا حسين يا عيل

كنت فاكراك راجل هتقف جنبى على طول.

(تدور حول نفسها فى حيرة )

طيب وأنا أعمل ايه وياهم؟ افرض انهم مسكوا فى بعض لكن استاهل أنا كل اللى يجراالى عشان أنا السبب، أنا اللى خدت الفلوس ووفعتهم فى بعض. لكن حسين كان موافقى وبيشجعنى وييجى فى الساعة دى ويهرب. أخص على صنف الرجالة كلهم أنانيين ( تفكر قليلا) بت يا حسنة.

ناهد : بسرعة خلصى اللى فى ايدك.

ناهد : ( ترفع سماعة التليفون ) مدام سامية الحمد لله اللى لقيتك . الأستاذ فريد موجود ! بركة اخواتى جاينن الوقت بيقولوا زعالانين وخايفه يتخانفوا ويمسكوا فى بعض . ابقوا خللوا حسكما معانا. متشكرة . ربنا يخليكوا لى ( تضع السماعة )  
حسنية. حتى الأطباق على الترابيزة عشان اللى يوصل منهم نلخمو بالاكل.

حسنية : ( تتحرك فى الصالة وترص الأطباق ) حالا . اطمنى.

( يدق جرس الباب )

ناهد : ( ترتجف مزعورة وتتحرك نحو الباب ببطء ثم تفتح ويدخل حامد مسرعا)

حامد : فلوسى . فلوسى يا أولاد الإيه؟ راحت فين؟ فين هو؟

ناهد : فلوس ايه ؟ اتسرقتم؟

حامد : آه أنا اللى انسرفت . رصيد الاجزاخانة والتجارة راح. حسابى فى البنك ما حطوش فيه مليم من ست شهور. اتاريه فاتح حساب باسمه.

ناهد : طيب وماله لما يبقى له حساب انتوا قسمتم؟

حامد : النهارده ها نقسم . أخوكى اشترى العربية قلت زى بعضه. أهى بتتفع لكن يشتري شقة فى اسكندرية بعشرين ألف جنيه من غير مايقوللى.

ناهد : ( تمسك فيه تحاول أن تهدئه) أقعد ارتاح وأتغدى وكله يتسوى هيجرى ايه ؟

( وهنا يدق جرس الباب)

بس أهو جه. أوع تتكلم الا بعد الغدا. افتحى الباب يا حسنية .

محمود : ( داخل من الباب بثقة) الأخ وصل ( يلتفت الى حامد ) ايه مالك ؟ جرا لك حاجة فى عقلك ؟ فلوس ايه اللى انت داير عليها ؟

حامد : فلوسى

محمود : نتحاسب وان طلع لك فلوس عندى خدها .

حامد : نتحاسب على ايه ؟ ها حاسبك على العربية ولا على الشقة.

محمود : نتحاسب على كل حاجة .

حامد : انت مالکش عندى حساب . دى فلوسى كلها. انت لو توظفت فى الحكومة من يوم ما تخرجت ما كنتش قدرت تغير البدلة. لكن خليتك بتغير العربيات.

محمود : حاسب شوية أنا مش موظف عندك . أنا شريك قدى قذك والفلوس جبتها أنا بشطارتى، من تجارة الكسب والرز والسماذ مش من الدوا اللى بتبيعه حضرتك وانت قاعد على الكرسي.

حامد : الاجزاخانة هى الأصل ، والاجزاخانة بتاعنى أنا .

محمود : الاجزاخانة اللى هنا ولا بتاع طنطا .

حامد : ( بانفعال ) الاثنين.

محمود : انت لك اجزاخانة واحدة بس لكن اللي هنا دى لأصحاب الفلوس.

ناهد : فلوسى أنا.

حامد : فلوسك تحاسبه عليها ، فلوسك عنده هو اشترى بها عربية وشقة وحاططها فى البنك . اما الاجزاخانة من النهاردة ما تدخلهاش انت.

محمود : يعنى ايه الكلام ده ؟

حامد : يعنى كفاية اللي خدتوه ابقى تاجر بيه بعيد عنى.

( يتحرك للخروج )

محمود : ( يمسك به ) هات مفاتيح الاجزاخانة أحسن لك .

حامد : ( يدفعه بقوة ) انت بتهددنى

محمود : ( يمسكه من كتفه ويشده )

حامد : يضربه بالقلم على وجهه

( محمود يرد الضربة بلكمة ويبدأ تبادل اللكمات ---

بسرعة وأخيرا ينجح حامد فى ايقاع محمود على

الارض . محمود ينهض باسرع منه شاهرا مسدسه

( نحوه )

محمود : طلع المفاتيح أحسن لك .

( يقف حامد جامدا وتتنبه ناهد للموقف فتتوسل

لمحمود )

ناهد : أوع تضرب أخوك يا محمود . أنا مش عايزة حاجة

حامد : ( يمد يده يمسك بطبق ليقذف به محمود وهنا ترتعش يد

محمود فتخرج الطلقة فترتمى ناهد على حامد الذى

يقف خلفها وتصرخ ثم ترتدى على الأرض وفى هذه

الأثناء ينهار الجميع وينفتح الباب ليدخل فريد وسامية

وخلفهم الخواجة كريكو )

فريد : ليه كده ؟  
سامية : يا مصيبتى ! وصلت لحد كده ( ترتدى على ناهد  
وتحاول أن توقظها . محمود يبكى على أخته . وحامد  
جالس مدهول . سامية تمسك يد ناهد وترفعها )  
الحقنى بقطنة يا حسنية ( ناهد تفتح عينها وتتنظر  
حولها نحو حامد ومحمود )

فريد : اطمنى . اخواتك بخير  
ناهد : ( تنفجر فى البكاء )  
سامية : ( تفحص جسمها كله ) ما فيش غير الجرح البسيط ده .  
حامد : يمسك يدها ويقبلها على جبهتها ( قومى يا ناهد . قومى  
ياختى خدى الاجزاخانة اللى تعجبك .  
كرياكو : أنا مش قلت ده لازم يجوز وينبسط .  
( يضحك فريد وسامية )  
حامد : خلاص يا دكتور . ورينا العريس بتاعك .  
( تطفأ الأنوار وتنتقل الى حجرة ناهد )

## المشهد السادس:

(ناهد فى حجرتها أمام المرأة. ترتدى ملابسها وتزين وهى  
تغنى. عريسي اهو اهو جاى اهو. وأنا حلوة كمان  
مش زى زمان.  
وعرفت أكيدهم، كل العزال)

- سامية : ( تدخل من الخلف ) أيوه يا ناهد عايزانى ليه؟  
ناهد : ( بفرح ) يا سلام ! وأنا اقدر استغنى عنك يا أحسن  
جارة فى الدنيا.  
سامية : ( بابتسامة ) مرة واحدة كده . فيه ايه؟  
ناهد : خير طبعا . العريس جاى فى معاده ولا بتسرحوا بي؟  
: ( تقفز نحوها ) والله طيب قوليلى ألبس ايه ؟ أخط أحمر  
كمان ولا أبيض , الرميل ده كفاية تعرفيش بيحب ايه؟  
ايه اللى بيعجبه؟  
سامية : انتى تعجبنى الملك . الحلاوة والسحر ده كله مش عايز  
لا أحمر ولا أبيض . والفتان عليكى بينطق . يجنن .  
ناهد : يسلم لسانك ( تقفز نحوها وتقبلها ) لما يبجى أقدم له  
شربات ولا كوكاكولا ؟  
سامية : الشربات أفضل طبعا .  
ناهد : أنا بأقول كده برضة ؟ أخش عليه والصينية فى أيدى  
أقول نهارك سعيد . وبعدين هيحصل ايه؟  
سامية : ( تضحك ) حلوة دى و أنا عارفة هيحصل إيه بأه .  
هيشرب الشربات .

ناهد : يعنى أقدم له الشرابات ولا أحطها قدامه وأقول له اتفضل

سامية : لا . قدمى له الشرابات على طول.

ناهد : ليه؟ هو مش يقوم يسلم علي الأول.

سامية : طبعا (تعود لتتظر فى المرأة ثم تسرح قليلا فى التفكير ثم تعود تكلم سامية)

ناهد : أقدم له الشرابات فى كبايات ايه ؟ الفضية.

ولا المدهبية. والشرابات أحسن تكون وردى ولا لمونى؟

سامية : لا يا عبيطة . وردى أحمر فاقع دليل الحب – والعوظف المشعللة.

ناهد : صحيح ( تبتسم فى بلاهة ) سؤال أخير – يا أبله سامية ؟

سامية : ( تفكر ) أعرف إنه مبسوط إزاي؟ لما يشرب كل اللى فى الكباية.ولا استنى ( تضحك ) احسن يعمل ابن ناس ويسيب شوية فى القعر.

سامية : ما يهمش . اطمنى احنا متأكدين انه هينبسط خالص. عن اذنك بقة.

ناهد : ما تسبنيش يا ابله سامية انتى عارفة أنا غلبانة ما عملتش الحكاية دى قبل كده .

سامية : لامش سيباكي ها نيجى لغاية ما نشرب الشرابات ونسيبك انتى وهو تتعرفوا على بعض كويس. ( تخرج سامية )

ناهد ما زالت أمام المرأة تنظر الى نفسها .

ناهد : حلوة خالص . ملعون ابو اللى ما يصلى على النبى. قال عايزين يدفنونى هنا. ده أنا لازم أجوز واتمتع وأجرب حظى.. ايه اللى يجبسنى هنا ويمرضنى ، ده

قال وده عاد حتى نجية الفلاحة اللي عاملة زى عروسة المولد ، هتتجوز وتبقى مرات راجل وست بيت حرة تمشى وتتأمر . تيجى ايه هنيه ولا نجية جنبى . ليه حظى ما يكنش زيهم أو احسن؟ الحكاية ايه يكونش اللي بيوزع الحظوظ أعمى ما عندوش نظر ( تضحك على نفسها تمشط شعرها مرة ثانية ) المهم ان الخطوة الأولى بدأت ( يدخل حسين وهو يتكلم بصوت عالى من الصلاة )

حسين : ناهد أنا جيت الجاتوة والبون بونى . انتى فىن؟

ناهد : أيوه يا حسين ؟

حسين : ( ينظر فى الحجرة ) اوه . ايه ده كله؟

(يمسك يدها ويدور فى الصلاة) ايه الحلاوة دى. اللهم صلى على النبى . ايه يا بت الخود الموردة. والعيون السمر والفتان الأبيض (تنظر اليه وهى تتحرك معه فى الحجرة فى سرور واضح) مقلتيش رايحة فىن، حفلة زفاف ولا مستنبة العريس.

ناهد : ما تعرفش؟

حسين : لا طبعا ( صمت ) صحيح ! أما أنا طلعت قفل أمال

اشترى فى شربات وحلويات من غير ما أعرف،

ناهد : ( تضحك ) طلعت مغفل لأنك مش مهتم بى.

حسين : أنا يمكن الدراسة شغلانى . معلىش يا ناهد حقك على

ناهد : ولا يهملك أنت تيجى الوقت تجلس فى الصلاة تعمل

عريس وأنا هقدم لك الشربات ونشوف هيحصل ايه (

تشده من يده . يسيران قفزا الى الخارج . حسين

يجلس فى الصلاة . تدخل ناهد ومعها الشربات

تضحك فى حياء ثم تضع الصينية أمامه) مساء الخير  
يا استاذ - اتفضل أشرب تحب تشرب شربات وردى  
ولا فزدقى (ترفع يدها بكوب)

حسين : ( يتصنع الجد ) مرسى يا مدموازيل . أنا با حب  
الاثنين لأنى شايف فيهم ذوقك الجميل - حتى الكباية  
اللى بتلسميها بصوابك أنا بحبها ( يمسك أول كوب  
وقبل أن يشرب يبوس حافة الكوب) نعمة كبيرة لازم  
أبوسها علشان ما اتحرمش منها أبدا .

ناهد : ( تسرح مع الكلمات وهى تنظر إليه فى حنان يكاد  
يطفر من عينيها. حسين يمسك يدها ثم يربت بيده  
على خدها)

حسين : ناهد ! فوقى ما تسرحيش.

ناهد : ( تنظر اليه فى حيرة ) احنا فى حلم يا حبيبي.

حسين : لا والله . ده حقيقة. قريب جدا ده هيحصل.

ناهد : ياريت يا حسين العريس يجبر بخاطرى . يا ريته  
يسمعنى كلمة زى اللى قلتها دى.

حسين : ( يفوق ) عريس ؟ الحكاية بقى جد؟

ناهد : أيوه يا حسين -

حسين : ولسه بنتكلمى ؟ أما واخدانى لعبة تتسلى بيها (يحاول  
الخروج فتمسك به)

ناهد : استنى ما تخرجش. انت أخويا وقريبى وأعز أصدقائى  
وأعلى انسان عندى.

حسين : كفاية بقى يا شيخة . أنا كنت فاهم ده كله. أيوه قريبك  
بس فقى. بس شغال عندك موظف ما انفعش (تتعلق  
به أكثر يتهدج صوتها بالبكاء)

ناهد : أخص عليك يا حسين طيب ما قتلش أبدا. أنا ما كنتش فاهمة انك بتحبنى للدرجة دى.

حسين : ربنا يسعدك يا ستى (يخرج) (صوت سامية من الخارج)

سامية : ناهد استعدى خلاص . العريس وصل عندنا (تنظر فى الحجرة نجد ناهد صامئة على الكرسي والدموع مازالت فى عينيها) الله! جرى ايه؟ سبحان مغير الأحوال (تربت على ذقنها) قومى يا أحدى عروسة فى القرن العشرين (تشدها تقف) نشفى عنيك الحلوة دى بسرعة. أوعى تفكرى فى حاجة النهاردة غير فى العريس. يلا بسرعة فين محمود؟

ناهد : (تجفف عينيها) ها اطلبه بالتليفون (تخرج سامية) حسنية؟

حسنية : أيوه يا ستى .

ناهد : كلمى محمود . قوليله الأستاذ فريد مستنيه وعايزه حالا.

حسنية : حالا.

(بعد قليل يدخل محمود ووراه العريس وفريد والخوافة ولا يكادوا يجلسوا حتى تدخل سامية تتبعها ناهد وهى تحمل صينية الشربات. من الملحوظ ان حالتها النفسية متكررة. تتضع الشربات أمام للعريس على المنضدة.

ناهد : اتفضلوا (تقولها وتجلس) -

العريس : شكرا

محمود : (تمد يدها بالأكواب للعريس ثم للضيوف) اتفضل يا استاذ سعيد.

- سامية : (تأخذ رشفة) تسلّم إيديكى يا ناهد شربات لذيدة قوى.
- ناهد : (تبتسم) هنيا يا أبلة سامية.
- سعيد : (يشرب قليلا من الشربات ثم يضع الكوب ليخرج علبة السجائر. فى نفس الوقت يقدم محمود سجائره فيحدث ارتباك ينقلب على اثره كوب شربات العريس فينفجر الجميع ضاحكين حتى ناهد لكن العريس سرعان ما يشعر بالحرج)
- ناهد : (تقوم برفع الصينية) ما يهمش .تعالى يا حسنية خدى الصينية (تأخذ حسنية الصينية وتخرج خلفها ناهد ثم تعود بكوب آخر) اتفضل اشرب دى بدلها.
- سعيد : معلش غرناكم كباية زيادة .
- فريد : ضربتين فى الراس توجع.
- محمود : لا احنا واخدين على كده .
- كرياكو : فين الطاولة يا دكتور محمود . تعالى عايز أخلص تار امبارح (يخرج ووراءه محمود)
- سامية : عن اذنك بقى يا أستاذ سعيد والبركة فى ناهد .
- سعيد : ما هو بدرى (تخرج سامية)
- ناهد : (تقف ورائها)
- سامية : لا خليكى مع العريس.
- ناهد : (تعود الى كوب الشربات تقدمه بيدها) اشرب يا استاذ ولا الشربات مش عاجباك .
- سعيد : ازاي دى شربات حلوة أوى.
- ناهد : أجيب لك قهوة.
- سعيد : (ينظر من خلف النضارة فى دهشة) ما فيش لزوم.

- ناهد : أمال ما تشرب ( وهو يتفرس فيها فتحملق فيه. تمد رقبتهأ نحوه. يعد قليل تنفجر فى الضحك بصوت عالى. يشعر بالحرص فىضحك بصوت منخفض ثم يبحث عن شىء يقوله)
- سعيد : أسنانك عاملين إيه؟
- ناهد : كويسين
- سعيد : ما رحتيش للدكتور تانى
- ناهد : لأ . دى كانت أول مرة وآخر مرة. عطانى دوا ومس وأسنانى كلها سليمة خالص.
- سعيد : ما هو باين . أسنانك زى اللولى الأبيض. ازاي ما تبقاش سليمة .
- ناهد : انت مخلص أسنان كتي؟
- سعيد : ( ينظر اليها بشك) لا مش كثير.
- ناهد : كم يعنى كده ؟
- سعيد : (يضحك فى خبث) اطمنى ثلاثة أربعة .
- ناهد : خلعت ضرر العقل طبعاً.
- سعيد : ( يضحك ) والعقل كمان خلعت.
- ناهد : (تفقهه ) يا ساتر استر.
- سعيد : ما تخافيش ما وصلش للدرجة دى (يضحكان)
- ناهد : يعنى العقول بتفيدنا فى ايه ؟ تقعد تفكر وتفكر طول النهار على ايه؟ ندى العقل أجازة شوية. أهو ترتاح وضحتك تتحسن.
- سعيد : اطمنى ! هياخذ أجازة طويلة (يضحك)
- ناهد : (تقف وتتجه ناحية الباب) عن اذنك شوية (تعود بعد قليل ووراءها الخادمة تحمل جاتوه وشاى) اتفضل يا أستاذ سعيد .

- سعيد : ( ينزل النظارة على أنفه ويتأمل جسدها الفائت ) ايه لزومه بس .
- ناهد : ( تحاول أن تقدمه له بيدها وهو يبخلق فيها ثم يمد يده ليمسك الطبق فيمسك بأيدها ويحدث ارتباك ) اسم الله عليك يا أستاذ . اتفضل .
- سعيد : سوري ده كرم كثير .
- ناهد : أصلنا فلاحين ودي حاجة ما تلقش بالمقام .
- سعيد : يا ست العفو . احنا كلنا فلاحين .
- ناهد : انت لك أخوات يا أستاذ سعيد؟
- سعيد : لى أختين
- ناهد : يا بختك . أنا ما ليش أخوات بنات .
- سعيد : كويس . ربنا بيحبك .
- ناهد : ليه هما البنات وحشين؟: يعنى الرجالة بيريحوا دول نفمة .
- سعيد : ( يضحك بصوت عال ) متقوليش كده اخواتك يسموكى .
- ناهد : اللى يسمع يسمع . أنا بقول رأى . لكن ما جبتش حد من أخواتك ليه .
- سعيد : وأجيبهم ليه .. أنا بحب أتصرف وحدى من غير رأى حد .
- ناهد : تعجبنى يا أستاذ ( تضحك ) لكن دول ستات بيوت ولا موظفات .
- سعيد : واحدة بتشتغل دكتورة فى الجامعة والتانية ناظرة مدرسة .
- ناهد : ودول مغليبينك فى ايه ؟

- سعيد : ولا حاجة . لكن قبل كده كنت مسئول عنهم. عن اللي طلعت واللى دخلت.
- ناهد : (بضيق) وايه يعنى لما واحدة تطلع ولا تدخل .
- سعيد : تطلع بس لمشوار محدد لأن الست مش زى الراجل.
- ناهد : انت شايف كده؟
- سعيد : كده ايه؟
- ناهد : ان الست ست والراجل راجل؟
- سعيد : (يضحك) انت شايفة حاجة غير كده ؟
- ناهد : شايفة ان الست بنى آدماية برضه . فيها عقل زى الراجل وليها عينين ورجلين وبتمشى. يعنى من حقها تطلع بره البيت تمشى رجليها بدل ما تعجز وتتكسح ولو كان ربنا عاوز يحجز الستات فى البيوت ماكنش خلق لهم رجلين زيكم ولا ايه؟
- سعيد : ( مندهشا ثم يتصنع الضحك) أيوه بس تطلع مع راجل مش لوحدها.
- ناهد: يعنى لازم تاخذ غفير معاها. تروح المدرسة بغفير وتروح الجامعة بغفير وحتى لو راحت لدكتور الأسنان تاخذ معاها غفير.
- سعيد : وده فيه ايه يز عحك.
- ناهد : فيه وفيه . فيه غم ونكد . فيه سجن وسجان.
- يعنى الست تبقى عبارة عن معزة لازم واحد يجريها من البيت للشارع وراه وبالعكس.
- ( يدخل حامد ووراءه الباقون )
- حامد : مساء الخير . أهلا يا أستاذ سعيد.
- سعيد : ( يهم بالوقوف) أهلا يادكتور.
- حامد : شرفت يا أستاذ ( يلتفت لناهد ) أزيك يا ناهد.

- ناهد ( فى شبه نرفزة) كويسة خالص.
- كرياكو : سعيد بيه يا دكتور حامد راجل ممتاز مدرس أول فى الثانوية . وشاب لطيف وابن حلال وفنان .
- حامد : يا مرحبا شرفت يا أستاذ سعيد.
- سعيد : الله يشرف قدرك.
- سامية : ( تأخذ ناهد على جنب) ايه يا ناهد ، ازاي الجو؟
- ناهد : ( تحملق عينيها وتحركها يمينا ويسارا وكذلك شفيتها وتمد يدها فى بانتوميم ) أهو مش بطل .
- سامية : (تضحك ثم تلتفت لسعيد) ايه يا أستاذ سعيد . سارح فين؟
- سعيد : أنا لأ .
- فريد : بيفكر طبعا. هو الواحد هيجوز كم مرة فى العمر.
- محمود : شوف يا أخ سعيد . فكر على مهلك واحنا نرحب بيك فى كل وقت واذا كنت .عايز تقعد مع ناهد أو تخرج معاها احنا مش بنمانع لغاية ما تفهموا بعض او تتأكدوا انكم تقدروا تعيشوا مع بعض.
- فريد : برافو يا أستاذ محمود . دى أول خطوة صحيحة.
- لازم العلاقة تقوم على فهم متبادل وانت يا سعيد ابن حلال والناس دول طيبين وناهد طيبة وصريحة.
- سعيد : واضح طبعا. والواقع أنا سعيد بمعرفتكم وربنا يفعل ما فيه الخير وأشكركم على حسن ظنكم.
- حامد : ازاي يا أستاذ انت راجل مربى كبير لازم تكون محل ثقة .
- كرياكو : كفاية كلام بتاع المجاملات دى اتفقوا على يوم تنفسحوا ولا تروخوا السينما .
- محمود : قلبك رايق انت ما فيش فى دماغك غير الفسح .

كرياكو : ايه دى بيقول ايه دى ( يمد أذنه لكى يسمع )  
محمود : ( يضحك ) ولا حاجة يا تحفة .  
كرياكو : أنا قلت انتى ما بتفهميش حاجة .  
حامد : اخواتك هيشرفونا امتى يا استاذ ؟  
سعيد : لازم يعنى ؟  
حامد : مش لازم . بس نتشرف بمعرفتهم برضه .  
فريد : بيقولوا النسب عصب وان صح يبقى قصب .  
سعيد : طيب يا جماعة تحت امركم . يوم الشبكة يعنى بعد  
اسبوعين .  
محمود : خلاص على كيفك .  
سامية : على بركة الله . مبروك يا ناهد مبروك يا سعيد

يللا يا فريد (يقف الجميع ويخرج فريد وزوجته  
والخواجة )

" ستار "

## الفصل الثالث

### المشهد الأول:

شقة سعيد – صالة طويلة بها ترابيزة صغيرة وبها عدة كراسى خرزان. ينفتح على الصالة حجرتان نوم بهما سراير سفري وفرش عادى. ترفع الستار نجد أمامنا سعيد واقف بينظلون بيجامة وفتلة بحملات وخالع النضارة. أمامه بنت اسمها شادية سنها حوالى 10 سنين وأخوها كمال سنه سبع سنوات. أمهما امرأة فى حوالى الأربعين تجلس بجوار الترابيزة تتفرج بسعادة على الحركات التى يجريها الأولاد بتوجيه ومساعدة الأستاذ سعيد. هى سيدة جميلة خمرية اللون تتمتع بصحة جيدة وتعمل شعالة عند الأستاذ سعيد وزملائه.

وفى الناحية الأخرى يجلس صلاح الجنائنى مدرس التربية الرياضية وعاطف مدرس الكيمياء صلاح قصير نحيف وجهه مخربش لا يبدو أن بينه وبين الرياضة أى علاقة. عاطف أبيض سمين الى درجة ما يرتدى نظارة.

سعيد : هيا ابتدئ ( كمال يضع رأسه على الأرض ويرفع  
رجليه من الخلف وسعيد يساعده حتى ينصب رجليه  
( برافو شاطر ( يلاحظ ان كمال يرتدى كلوت  
قصير وفنلة بدون أكمام ) كمان مرة . برافو وهكذا  
عدة مرات ثم يتشقلب على الأرض. بعد ذلك تبدأ لعبة  
أخرى حيث يمد سعيد يديه أمامه ويضع كمال رأسه  
بين يديه ثم يقفز الى أعلى ليلف رجليه حول رقبتة.

صلاح : برافو . انت ابن جنية يا سعيد.  
عاطف : هو كان نفسه يطلع بتاع ألعاب . غلط وطلع بتاع رسم.  
صلاح : ( يضربه على ايده ) بس ما تقولش ألعاب اسمها تربية  
رياضية

عاطف : طظ . ما تفرقش حاجة. ايه يعنى الألفاظ بطلوا  
العقد دى بتاع الألعاب يقول تربية رياضية وبتاع  
الرسم يقول ايه تربية فنية. بينى وبينك انت وهو لا  
لكم فى التربية ولا فى الفن.

صلاح : ( يخطف نضارة عاطف ويتركه مزعورا يتحرك  
كالأعمى ) اسكت انت يا بتاع الكيميا انت ما تفهمش  
فى الكلام ده . ولو أن كلامك صحيح على سعيد. هو  
آخر حاجة يفهم فيها الرسم.

عاطف : ( يمد يده ) هات النضارة بلاش الهزار البايخ .  
صلاح : ( يمد يده فيمسكها صلاح ويجره ) قلت لك ما نتش  
قدى.

سعيد : ( يتدخل ) ولد يا صلاح . اديله النضارة (يمسك  
بالنضارة ويسلمها لعاطف) أنا قلتك من زمان أعمل  
راجل واضربه خليه يحترمك.

صلاح : ( يضحك ) مجنون . خليه يطاوعك عشان أقتله.

- سعيد : اخرس انت وهو . مش عايز اسمع صوت فى البيت بدون اذن .
- كمال : اسكت يا استاذ صلاح أنت والأستاذ عاطف . خلىنا نكمل التمرين.
- سعيد : قول لهم يا كمال مين الرئيس هنا.
- كمال : انت طبعا .
- صلاح : (يضحك) رجعت له الحالة يا واد يا عاطف.
- سعيد : قول يا واد يا عاطف . مين الرئيس هنا.
- صلاح : أوع تقول . اعمل راجل مرة. ما عدش فيه ريس ولا مريسة هنا.
- عاطف : ( يبتسم ثم يخلع النظارة ويتلفت حوله فى حيرة .دون أن يتكلم )
- سعيد : ( يضربه بيده على صدره ) هتتعترف ولا لأ . انت شايف الحبل اللى فى السقف ده . ها علقك فيه
- ( يوجه كلامه لزينب ) انتى يا ولية مين الرئيس هنا ؟
- زينب : ( تضحك حتى تأخذها الشنقة )
- سعيد : ( بصوت الأمر ) انطقى بسرعة. أنا ما احبش المياعة.
- زينب : انت يا أستاذ سعيد. هو فيه حد ريس غيرك هنا.
- صلاح : (بضحك ) اخص عليكى يا زينب . انتى بتخافى من شنبه اللى عامل زى المقشدة.
- سعيد : اسكت يا واد يا زولط ( يشد عاطف من كتفه ) تعالى هنا . انت ما بتنطقش ليه.
- (عاطف ينكمش خوفا)
- شادية : (تنظر فى وجه عاطف بسخرية) يا عينى يا أستاذ عاطف . انت بتحكم العيال ازاي فى الفصل؟

- عاطف : ( بصوت قاطع ) ومين قالك أنا بحكمهم . ده هم اللي بيحكمونى.
- زينب : ( تضحك ) ازاي يا أستاذ عاطف.
- عاطف : ها حكمهم ازاي ؟ أنا عندي فى تالته تالت كل طور وطور ينطح أخوه.
- سعيد : ( يضحك ويتركه . كمال وشادية يصفقان ويهرجان )  
شادية : ( تشد سعيد من يده ) جه دورى بقه .
- سعيد : أيوه استنى لما يستتب النظام ونعرف أولامين الرئيس هنا؟
- صلاح : علشان خاطر شادية هنوافق انك ريس، يللا مارس هوايتك وحاول تبطل الجنون بتاع المريسة أحسن لك.
- سعيد : ( يعود الى تمرين شادية تمرينات حركة ) رفع . مد ثنى الجذع. شقلبية.
- صلاح : ( يضرب كف على كف ) ربنا يشفيك . انت تنفع قرداتى. كنت تكسب كل يوم ثلاثين أربعين جنيه بالراحة.
- شادية : حسن ملافظك يا أستاذ صلاح . هو أنا قرده ؟
- صلاح : ( يضحك ) مين قال كده .
- شادية : مش هو بيلاعبنى ؟ وأنا كمان هابقى زوجته الثامنة عشر.
- (يرن الجرس تفتح زينب الباب يدخل كريكو ومحمود ويريان المنظر دون أن يراهم سعيد لأن ظهره كان ناحيتهم وهم يضحكان.)
- صلاح : ( يوجه كلامه لهما بلهجة هزار ) دى حالة خفيفة

بتجيلة كده مرة كل يوم وتروح.

- محمود : نهارك سعيد يا أستاذ سعيد .  
سعيد : ( يلتفت فجأة ) أه لا مؤاخذة . اتفضلوا (يصافحهم)  
عن اذنكم البس جاكته البيجاما ( يجلس الجميع )  
شادية : أهلا يا أستاذ محمود. أنت اخو الست ناهد.  
كرياكو : أمورة البننت دى .  
زينب : اتفضل يا خواجه.  
كرياكو : تتجوزينى ؟  
صلاح : لا دى محجوزة .  
شادية : أيوه . أنا هجوز الأستاذ سعيد.  
محمود : مرة واحدة كده ؟ انتى لسة صغيرة.  
شادية : بكرة أكبر وأنا منتظرة دورى طبعاً .  
محمود : ( يضحك بانبساط ) هو بيحوزهم بالدور .  
شادية : أنا الزوجة الثامنة عشر .  
صلاح : بعد المائة .  
شادية : ( تضحك فى عبت ) لا يا أستاذ صلاح الثامنة  
عشر فقط .  
كرياكو : ايه دى ؟ هو سعيد هيجوز تمناطاشر .  
محمود : على طريقة شهريار ( يلتفت للخواجه ) شورتك كحل  
( لشادية ) وكنتى بتعملى ايه ؟  
شادية : كنت باتمرن عشان الريس يؤمن ان العقل السليم فى  
الجسم السليم .  
صلاح : أصلة غاوى كده يربى العرايس ويسيبها لغيره .  
شادية : ما تقولش كده ( يدخل سعيد ) سامع يا ريس -

- سعيد : ما تصدقش ( تجلس شادية بجواره وهو يقدم  
السجاير )
- محمود : انتى بطلتى التمارين ليه؟
- سعيد : خلاص بقه نقعد معاكم شوية.
- شادية : الأستاذ صلاح بيقول انك هتسينى.
- سعيد : وانتى تصدقى برضه صلاح.
- صلاح : طب اسألنى الأستاذ محمود أخو العروسة كمان.
- محمود : بس احنا ما نقدرش نتعدى على حقا .
- شادية : ماهو أنا الثامنة عشر ( يضحك الجميع ) ( تأتى زينب  
بالشاي )
- سعيد : عارفين بعض طبعاً يا صلاح ؟
- صلاح : أنا بأعرف الخواجة والأستاذ محمود صاحب  
الأجراخانة -
- سعيد : الأستاذ صلاح الجنائى مدرس التربية الرياضية .
- صلاح : ما تتساش اسكندرانى.
- محمود : اجدع ناس الاسكندرانية . أنا اتعلمت فى اسكندرية.  
وفى كل اسبوع باقضى يوم أو يومين هناك.
- صلاح : أنا مش اسكندرانى أصلاً . احنا صعايدة عيلتنا  
استوطنت الاسكندرية من أيام محمد على.
- كرياكو : دى كديم أوى -
- صلاح : أه . أنا جدى هو اللى ادخل فلاحه البساتين فى مصر.
- عاطف ( بصون منخفض ) واسعة شوية.
- صلاح : ( بغیظ ) ايه مش عاجبك يا عجر انت وهو (يهز  
عاطف من كتفه) بتضحك على ايه؟
- عاطف : أبدا .
- سعيد : ما تقول يا عاطف بتضحك ليه خايف منه ؟

- عاطف : لا طبعا . هو احنا شفنا مين أدخل فلاحه البساتين ( لصالح ) بحبح يا شيخ بحبح ولا يهملك .
- صالح : ( يزداد غيظا ) يعنى أنا كداب ( يوجه كلامه لمحمود ) انت سيادتك ، أول ما تنزل من محطة سيدي جابر اسال بس وهم يوصلوك لبيتنا . هناك حتلقى أخويا مش شقيقى زنده اد الصدغ ده ( يشير الى كتف الباب ) أخويا ده انقذ عشرين واحد من الغرق لولاه كانوا راحوا فطيس ( الجميع تقريبا يضحك )
- سعيد : لولا جدك وأخوك ده كان اتغير تاريخ العالم.
- صالح : كده يا أبو شنب لف عايز تكسر معايا كمان ؟ انت شفته ولا لأ ؟ تقدر تكح قدامه؟
- سعيد : ( يضحك ) لأ طبعا
- عاطف : بس أبوك يعنى هو اللي أدخل فلاحه البساتين فى مصر ( يصمت قليلا ) فهمت آه صح يعنى كان جنائنى فى البلدية.
- صالح : اسكت يا عجر فاكره زى أبوك الكحيان ( يضحك ويوجه كلامه لمحمود ) سيبك منه أول ما تنزل اسكندرية اسأل أى شيال أى عربجى قول له تعرف صلاح الجنائنى وعيلته هيقولك طبعا أعرفه . فيه حد ما يعرفش الجنائنية؟
- عاطف : طبعا كل الشيالين والعربجية عارفينكم ( يضحك عاطف ويجرى خلفه صلاح ومحمود والخواجة وسعيد يضحكون )
- محمود : اعتقد كفاية كده . نستأذن يا أستاذ سعيد.
- سعيد : ثوان ألبس البدلة وأطلع معاكم ( يدخل حجرة نومه )

- صلاح : ( يعود الى مكانه ) ما تتخضش خلى قلبك جامد .  
محمود : ( فى حرج ) بس ده ( يتوقف دون أن يكمل جملته )  
صلاح : ( يقاطعه ) بيتسلى . أصله بيحب الأولاد دول ومربيهم  
من ست سنين .  
كريكو : مش قلت لك يا محمود بيه دى طيب وابن خلال .  
محمود : ( يهز رأسه بغیظ ) ابن حلال زيك . ما أنا عارف مخك  
مهروش انت رآخر .  
سعيد : ( يخرج من حجرة النوم ) اتفضلوا .  
( ينجهون نحو باب الخروج وتنزل الستة )

## المشهد الثانى:

(ناهد وحسين فى شقتها)

- ناهد : عاش من شافك .  
حسين : ( ينظر لها فى حزن ) نعم طلباتك .  
ناهد : أخص عليك يا حسين . زعلان منى ليه؟ لازم أبعت لك  
وأترجاك عشان تيجى .  
حسين : مش فاضى بأذاكر .  
ناهد : لآ مش ده السبب . انت زعلان ومش عايز تقول ليه؟  
حسين : لا مش زعلان من حاجة . انتى طلبانى عشان تفتح لى  
تحقيق؟  
ناهد : كده كده ! بقيت تتكلم بالنحوى (تمسك بيده وتربت  
على كتفه) ناهد الغلبانة اللى كنت بتعطف عليها  
وتسليها بحكاتك وأغانيك تقسى عليها كده يا حسين؟  
حسين : ( بيتسم فى سخريه ) كان زمان .  
ناهد : والوقت جرى ايه يامضروب؟  
حسين : مش عارفه البركة فى العريس . أنا اللى بقيت عايز  
العطف .  
ناهد : ( تضحك وتكاد تحتضنه ) أخص عليك يا حسين أول  
فرحة فى حياتى تزعلك .  
حسين : ( فى صوت باكى ) طبعا لا . أنا بأتمنى لكى السعادة .  
ناهد : ( تنظر اليه فى تلذذ ) أعمل ايه يا حسين . ما صدقت  
اخواتى وافقوا على الجواز وبعدين احنا لسه ما  
عملناش حاجة .  
حسين : ليه مش بكرة الشبكة .  
ناهد : وايه يعنى؟ أنا لسه بافكرواللى يعمله ربنا .

- حسين : ليه لعب عيال ؟
- ناهد : يمكن ما اعجبوش حد ضمن .
- حسين : وبعدين ؟
- ناهد : مش انت عايز كده؟
- حسين : أنا مش عايز حاجة .
- ناهد : ازاي ؟ ده انت بكره هتيجى معانا بالعربية نشترى الشبكة ولوازم الحفلة.
- حسين : طبعا . أنا لى شغلة غير دى؟ شيال سواق خدام – حاضر يا ستى علم .
- ناهد : ( تنظر فى وجهه بتمعن ثم تشده نحوها ) انت تبقى وحش خالص لما تتكلم جد . يا أخى فرفش. فرحنى شوية. غنى لى غنوة. قول يا بنت عمتى أنا فرحان لك. ربنا يسعدك. قول أنا هارقص معاكى بكره فى الحفلة. قول لى ها غنيلك غنوة جديدة – ولا راح الحزين يفرح ما النقاش مطرح ( تتحول الى البكاء ثم تجلس)
- حسين : ( تياثر جدا فيقترب منها ويبدأ يربت على كتفها ) معلش يا ناهد . ما تزعليش. أنا كان عشمى فيكى كبير. أنا فاكرك بتحبينى.
- ناهد : طبعا بأحبك قد الدنيا دى كلها . انت الوحيد للى باحبه فى الدنيا وبألقى نفسى جنبه.
- حسين : ( بحنية ) صحيح يا ناهد طيب ليه عملتى كده.
- ناهد : ( مخنوقة بالدموع ) أنا ما عملتش حاجة. أنا باتعلق فى قشاية زى الغرقان أعمل ايه فكر معايا.
- حسين : اهدى وبعدين نفكر

- ناهد : ( بعد قليل ) ايه رأيك بلاش أروح أجيب الشبكة  
حسين : ( بعد تفكير ) لا ازاي هتقولى ايه ؟  
ناهد : أقول مش عايزاه . أقول بأحب حسين.  
حسين : مرة واحدة كده ؟  
ناهد : أمال ايه غريبة! انت مش بتحبني؟  
حسين : بأحبك طبعاً.  
ناهد : أمال خايف ليه؟  
حسين : مش خايف من حاجة . بس هيقولوا ايه ؟ بتحبنيه؟  
بيحبك؟ من امتي؟ ما قلتيش ليه قبل كده؟  
ناهد : هو انك تقول بأحبك ولا أنا أقول بأحبك جريمة.  
حسين : ( فى تذكر ) أيوه صحيح . لآ ولا يهملك . قولى اللى  
يعجبك وليكن ما يكون.  
ناهد : مش كتير أقول لمحمود الكلام ده أنا ؟  
حسين : يعنى الحب حرام . التجارة فى قوت الخلق والبيع  
والشراء فى السوق السوده حلال؟  
ناهد : أحوال مقلوية . بيدنا ايه نعمله . الحرام بقى ماشى عيني  
عينك والحلال بقى يدارى، وأنا أخذت نصيبي من  
الهم والغم عشان أتسرعت وصارحتهم مرة (تتروى  
قبلا) اسمع يا حسين . احنا نروح بكره وأنا هاتصرف  
وافضها.  
حسين : ازاي؟  
ناهد : العريس أصله كبير فى السن وبابن عليه غيار وعقله  
كهنة خالص . عايز واحدة ست يقفل عليها الببان  
والشبابيك.  
حسين : خلاص طفشيه .

ناهد : بس ضاعت ولقناها بكره ما تسبنيش لحظة واحدة  
نشوفه هيقول ايه ؟  
حسين : ( بفرح ) يا بنت الإيه ؟ (يربت على خدها بيده)  
باى . باى  
(يخرج ونطفىء الأضواء)

المشهد الثالث:

كازينو على النيل بالمنصورة

ناهد وحسين وسعيد ومحمود جالسين على ترايبيزة  
وحولهم آخرين)

محمود : نقوم أنا وحسين نجيب شوية طلبات ونيجي (يخرجون)

سعيد : (يلتفت لناهد ) انتى بتبصى فين ؟

ناهد : باتفرج على النيل والخضرة .

سعيد : مشتاقة أوى للحاجات دى؟

ناهد : قوى. بعيد عنك محبوسة طول اليوم تفتكرها أشتاق لإيه  
؟

سعيد : لكن انتى كنتى بتقولى انك بتيجى كثير هنا انتى  
وحسين؟

ناهد : آه الحقيقة حسين ده صاحب فضل على كان  
دايما جنبى بيواسينى وبيسلينى.

سعيد : وهيفضل على طول كده جنبك؟

ناهد : طبعاً. أنا لى مين غيره!

سعيد : ( فى عصبية ) ازاي ده؟

ناهد : ابن عمتى ومتربيين سوا فى بيت واحد.

سعيد : ( يهز رأسه ) لا. ده حال ما يعجبش. حسين ده ما  
يدخلكيش بيت

ناهد : ( تضحك بقهقه ) حلوة دى انت بتغيرولا ايه ؟

سعيد : صوتك الناس حوالينا.

ناهد : أنا ما يهمنيش الناس.

سعيد : لأ أنا يهمنى. وكلامى لازم يتنفذ حرفياً.

ناهد : (تقف وتضرب تعظيم سلام) حاضر يا أفندم . من امتي انشاءالله ؟

سعيد : من الآن .

ناهد : ( تضحك فى دلال) لأ بقه ما تبقاش ظالم . لما نجوز هاكون تحت أمرك (تقف وتمثل) أول ما تيجى طالع أقف أودعك على الباب وأقولك مع السلامة بعدين تقفل الشباييك والبيان وتأخذ المفاتيح. ايه رأيك فى الكلام ده - ؟

سعيد : انتى واخدة الأمور سبهلة على طول.

ناهد : ليه مجنونة؟

سعيد : مين قال كده؟

ناهد : كلامك.

سعيد : ( متأثر بضيق) أقعدى وأتكلمى عيب الناس حوالينا.

ناهد : أنا تعبت من كلمة عيب والناس. عايزة أحس بالحرية

يوم واحد فى حياتى.

سعيد : وانت فاكرة الجواز بيدى حرية؟

ناهد : طبعا أمال الستات بيحوزوا ليه.

سعيد : الجواز مسئولية يا ناهد.

ناهد : للراجل ولا للست؟

سعيد : للاتنين طبعا.

ناهد : أنا عارفة مسئوليتى أكنس وأغسل وأطبخ وأكويك

الهدوم وأخلعك الجزمة عند النوم- فاهمة أنا الحكاية

دى .

سعيد : طيب ما احنا متفقين .

ناهد : على ايه؟ على انى خدامة، مش كده؟

سعيد : لا- ست بيت ( بيتسم)

ناهد : ( تجلس ) زى بعضه . على كيفك .  
سعید : قومى محمود بيشاور ( يخرجون )  
( ستار )

## المشهد الرابع:

(ناهد وحسين فى شقة ناهد)

- حسين : لكن ما وصلناش لحل.  
ناهد : الصبر طيب ، شوف الحلق ده والدبلة دى،  
شوف البروش عامل ايه على الفستان.  
حسين : ( تتحرك أمامه وهو يتأملها ) رائع رائع بس يا  
خسارة. أنا كنت عايز أخذ لك صورة انتى وعريس  
الغفلة بتاعك وأكبرها وأخليكى تشوفها عشان تضحكى  
على خيبة أملك لما تشبعى.  
ناهد : اخرس يا ولد . فشر ده راجل عاقل وفنان مش مغنواتى  
طائش زى حضرتك.  
حسين : هو قنان بصحيح ، وده باين خالص فى شنبه المددل  
على حنكه زى الفرقلة.  
(يضحكان)  
ناهد : (تحاول أن تثير غيرته بحركات يدها ) ايه رايك منظره  
عاجبنى خالص. انت وشك مربع وتقاطيعه صغيرة.  
لكن عامل زى المية ما لهاش لون ولا طعم لكن الأستاذ  
سعيد شكله كوميدى، فيه ارتفاعات وانخفاضات ، فيه  
تنويع يريح النفس ويحركها.  
حسين : ( فى صوت حالم ساخر) سبحان الله وايه تانى؟  
ناهد : ( تقفز فى سرور) وفيه نواحي حزائى بتشدنى قوى  
تصور عنيه السوده الصغيرة اللى داخلين جوه فى

أعماق رأسه ، والنضارة السوداء السميقة بتفكرنى  
بالكوابيس اللى انا عايشة فيها من سنين لكن لما أبص  
لشئبه بانسى كل شىء وأموت على نفسى من الضحك .  
حسين : الله يهنكى ويرضى عليكى أنا بقه ما بقاليش لزوم .  
عن اذنك.

( يهم بالخروج فتمسكه من يده )

ناهد : استنى . يعنى ايه مالکش لزوم ده احنا لسه فى  
أول خطوة.

حسين : يا نهارك مش فايت . انتى مجنونة. بقه بتحسبى ده  
كله أول خطوة؟ انتى فاكرة الناس لعبة فى أيديك؟

ناهد : احنا لازم نلعبهم . أنا وأنت لازم نلعب ونخليهم يلعبوا  
معانا.

حسين : بس مش على حساب الراجل المسكين اللى فتحلك قلبه.  
ناهد : فتح لى قلبه ! هو كان قالك؟

حسين : لا يعنى وافق يجوزك.

ناهد : ليه ياولد أنا كنت مرمية . أنا جانى ميت واحد أحسن منه  
لكن طفشوهم اخواتى.

حسين : ما اقصدش يا أختى .

ناهد : أمال ايه ؟

حسين : أقصد أنه جه وطلبك واشترى شبكة ، وراح يجيب أهله.  
ده كله يدل على اخلاصه.

ناهد : يا مرحب وانت عايز ايه ؟

حسين : يا نهارك أسود؟

ناهد : على دماغك انت بتلف على ليه؟

حسين : (فى دهشة) بنت يا ناهد انتى بتسخرى بى؟

ناهد : أصالك بتلف وتدور عايزاك تكون صريح وتكلم دوغرى.

حسين : انا ما تكلمت دوغرى فيه ايه تانى ما قلتوش؟  
ناهد : قول باحبك قول أنا لازم أجوزك ولو بالقوة . قول أنا على استعداد انى أقتل ميت راجل عشان أجوزك ده الحب الصحيح مش حب كده على الطاير مالوش أثر ولا طعم.

حسين : ده كان زمان ... كل الأغانى والأشعار اللى بأفها وأقولها لك ما تكفيش؟ زمان كانوا بيتصرفوا زى الوحوش يقتل الواحد غريمه عشان يفوز هو بالمجوبة . لكن اللى كان بيحصل ان واحد يموت والتانى يقضى عمره فى السجن أو يعدم وتفضل هى فى حزن وغم طول العمر. ما فيش حد يهوب جنبها وياريت الناس يسكتوا عنها دول كانوا يقولوا دى وشها نحس قتلت واحد والتانى وددته السجن.

ناهد : يا شيخ انت خايف على نفسك ولا خايف على .  
حسين : خايف عليكى وعلى نفسى. عملت اللى ما كانش يقدر عشاق زمان يعملوه صورت حبي فى أغانى وقصائد هيفضل الناس يرددوها طول العمر، وده اللى بيميز الحب بتاعنا ويخلى سيرتنا حلوة.

ناهد : زى عنتر وعبلة وروميو وجوليت .  
حسين : لا دى حاجات عتيقة عفى عليها الزمن حتى حب ليلى والمجنون ما ينفعش احنا لازم نكون أحسن .

ناهد : ولا مجنون ليلى  
حسين : حبنا ما فهيش جنون حب عاقل حب عصرى .  
ناهد : يعنى ما فهيش عواطف ولا أشواق ولا آهات.

- حسين : مين قال كده ؟ ده مليون عواطف واشواق أمال الشعر هيجى منين؟ بس ما فيهمش جنون ولا قتل.
- ناهد : طيب قول لى حاجة . ورينى عواطفك فين.
- حسين : فى اليومين اللى فاتوا أنا عشت فى منتهى الحزن والنكد . كنت بأفكر فيك. تصورت انك غدرت بى وكتبت غنوة حزينة صورت فيها مشاعرى.
- ناهد : (تقفز نحوه وتعانقه) يا حبيبي يا حسين (بعطف) سمعنى قول .
- حسين : يبدأ الأغنية وهى تسمع فى عشق وهيام وتأثر (بعد قليل يدخل محمود)
- ناهد : (تقف للقائه فى فرح ) أبوه يا حوده ازاي الحال؟
- محمود : (يهز رأسه فى ضيق)
- ناهد : مالك ما تتكلم.
- محمود : ها أقول ايه بس الخواجة الأهل يميل عقلى .
- ناهد : ليه بس يا محمود ؟
- محمود : العريس طلع شربة - عقله مهروش على الآخر .
- حسين : باين على شكله . أنا كلمتى ما تقعش الأرض.
- ناهد : أحكى لى شفت ايه ؟
- محمود : (يضحك) لقيته طالع بالفنلة وبيلاعب أولاد زينب الشغالة زى الحاوى بالضبط .
- ناهد : يمكن بيحب العيال .
- حسين : آه ده صحيح .
- محمود : بس مش عايزينك تجيبى عيال عشان صحتك .
- حسين : آه ده مهم
- ناهد : (تبص لحسين فى فهم) بلاش يا أخويا ما تشغلش نفسك نفرکش العملية دى كلها .

حسين : بسيطة سيب ناهد تستهبل عليهم لما تطفشهم .  
محمود : وده كلام؟  
ناهد : اظمن يجوا نشوفهم ونفكر على مهلنا يمكن احنا ما  
نعجبهمش .  
حسين : من هنا لكره تفرج . عن اذنكم أنا مروح .  
ناهد : مع السلامة فكر معايا يا حسين .  
( يخرج حسين وتنطفىء الأضواء ثم يضاء مرة أخرى )

المشهد الخامس:

(المنظر السابق)

( سعيد واخواته سعاد ومديحة وسامية وفريد )

سعاد : ( سنها فوق الخمسين تبدو . غير جميلة)  
محمود : أهلا .

ناهد : ( تدخل – يقفون لمصافحتها )

سامية : دكتورة سعاد أخت سعيد . أبله مديحة أخته برضه

سعاد : ( تنظر لها بعدم ارتياح ) أهلا يا عروسة . أختي مديحة  
بكالوريوس علوم وناظرة مدرسة وعندها بنتين حلوين  
زيك.

ناهد : ( تبتسم ) متشكرة . أنتم شرفتنا وأخويا محمود  
بكالوريوس تجارة وصاحب إجازانة وأخويا حامد  
صيدلي وعنده اجزخانه ثانية فى طنطا.

مديحة : حاجة عظيمة ، مالكيش أخوات بنات .

ناهد : لا طبعا .

محمود : كفاية كده .

سعاد : انت ما تحبش البنات زى سعيد .

محمود : ( يضحك ) لا بأحب ناهد طبعا .

سعيد : أنت زوجت من السؤال .

سعاد : حظنا كده رحنا الجامعة واحتلينا أكبر المناصب وبرضه  
مش عايزين تغييروا نظرتكم لنا .

محمود : لا طبعا . ازاي ده انتوا الخير والبركة.

سامية : مش كلهم طبعا.

- مديحة : لازم الأستاذ فريد له رأى آخر.
- فريد : أمال ! البنت زى الولد عندى ما أفرقش بينهم. هى بتتعلم وتطلع زيه.. بتخدم البلد ومن حقها تتمتع بحقوق مساوية.
- سعاد : عشان كده مجوز موظفة .
- سامية : ده صحيح . لكن برضه كل واحد له ظروفه. الجواز بغير موظفة ما يعنیش العكس.
- سعاد : بس أنا أقصد ان اللى يجوز بموظفة بياكد فعلا ايمانه بدور المرأة وحقها فى أن تخرج للحياة وتتصرف بحرية.
- سعید : (بيتسم ) ما تسيبونا من الموضوع ده .
- ناهد : هو انتى بتشتغلى دكتورة فين؟
- سامية : فى الجامعة فى كلية الآداب .
- سعاد : أنا معايا دكتوراه باطلع مدرسين ومدرسات الثانوى .
- ناهد : والله ده أنا فاكراك دكتورة فى الطب .
- مديحة : أختى سعاد رفضت تخش الطب ودخلت الآداب قسم آثار ليسانس وماجستير فى الآثار واللغات القديمة والدكتوراه من أكبر جامعات أمريكا .
- فريد : حاجة هائلة والآثار متعة.
- محمود : (يضحك وهو ينظر لفريد) باين باين لازم غاوية انتيكات .
- سعاد : آه عندى تحف كتيرة . رأس نفرتيتى وحتشبسوت.
- ناهد : (بنبرة ساخرة) الا حتشبسوت دى شكلها يخوف .
- سعاد : انتى شفتيها فين؟
- ناهد : ( يتراجع ) لا ما شفتهاش . لما كانوا يضحكوا على واحدة فى المدرسة يقولوا دى زى حتشبسوت.

سعاد : (تمط شفايفها فى غيظ) هو ايه الجمال ؟ الحمار والبياض . الجمال هو جمال الروح والأخلاق والعلم . أنا اشتغلت مفتشة فى التربية والتعليم وكنت باحرم على المدرسات أنهم يحطوا الأحمر والأبيض على وشهم خصوصا وأنا ناظرة .

( يتكهرب الجو يحاول فريد ان يلطفه )  
فريد : بعض الناظرات بتهتم بمظهر المدرسات برضه عشان البنات بتقلدهم .

مديحة : ( تأخذ موقف وسط ) بعض المدرسات بتزودها أوى . كأنها رايحة حفلة والبنات طبعا بيلقطنه المناظر دى ويكرروها

سامية : المدرسات اللى بيعملوا كده عددهم قليل وبعدين دى مسألة ذوق .

سعاد : الواحدة تبقى جاهلة وفرحانة بشبابها وتيجى لابسالى فستان مبين جسمها وحاطة أبيض وأحمر بالكوم زى البلياتشو احنا كنا ملايكة وما عجبناش حد .

محمود : بعض الرجاله بتعجبهم الألوان .

مديحة : كلهم .

فريد : مش كلهم طبعا .

سعاد : أيوه انت مالك مراتك حلوة وأمورة ومش عايزة كلام .

فريد : لو تسمحى يا دكتورة أسألك عن حاجة أحب أعرفها .

سعاد : اتفضل ؟

فريد : ايه هى أغرب عادات للزواج اللى قرىتى عنها أثناء

دراستك للآثار والتاريخ؟

سعاد : هو مش غريب أوى لأنه مستمر فى بعض عادات

الصعايدة ان الست ما توريش وشها للراجل الاليلة

الزفاف (يضحك الجميع)

كرياكو : جواز ايه دى ؟

فريد : جواز فى الضلمة.

ناهد : دى كانت فرصة للسيدات المعقربين.

كرياكو : أنا قرئت فى كتاب عن الرقص البدائى فى جزر

البلونينيز، لما كان واحد يخب واخدة كانوا يقلعوا

ملايسهم الراجل والست يروخوا الجبل يشيلوا

الهدوم خالص خالص مالمص. يقفوا عرايا زى آدم

وخوا

فريد : أيوه يا خواجة ، كمل اتحفنا باللطائف بتاعتك الحلوة.

كرياكو : بعد ما يخلعوا كل الهدوم .

محمود : حلصنا بقه .

كرياكو : يلعبوا رياضة . يبدأ العريس والعروسة يرقصوا . هم

طبعاً مش عريانين خالص فيه ورقة توت..

مديحة : ( تضحك ) الخواجة بيقدم كل حاجة على المكشوف )

(الجميع يضحكون)

فريد : أيوه يا خواجة كمل كمل .

كرياكو : الناس واقفين يغنوا ويحيوهم .

محمود : وبعد الرقصة؟

كرياكو : انتى ما تقاطعنيش. انتى موش بتفهم.

حامد : اسكت يا محمود خلليه يضحكنا

كرياكو : فى آخر الرقصة يروخ العريس ماسك العروسة فى أيده

ويتقدم لرد التحية.

محمود : الله يخيبك. هى دى حكاية.

كرياكو : لا مش بس استنى . بعدين يبدأ طقس جديد اسمه.

صراع الأجناس يمشوا عكس بعض. تمشى

- الزوجة فى اتجاه معاكس للزوج دى يشرق دى  
 يغرب بسرعة خالص. بعدين يقفوا يبخلقوا.  
 يفضلوا يبخلقوا لبعض مدة طويلة لغاية ما يضحكوا  
 محمود : الله ينكبك يا كريكو يا أهبل يا عبيط.  
 كريكو : ( مندمج فى سعادة) المرحلة الأخيرة تبدأ بأسئلة  
 للراجل والست  
 فريد : امتحان ؟  
 كريكو : لا موش امتحان دى حاجة زى اللى فى التلفزيون  
 ناهد : ازاي ؟  
 كريكو : يعنى يجى العريس يسأل العروس هى بتحبه ولا لأ  
 ان قالت لا ما تخبوش ما تقدرش تعيش معاه ما  
 يجوز هاش.  
 ناهد : طريقة حلوة  
 سعاد : ( فى غيظ ) عجاكى يا عروسة الطريقة.  
 ناهد : أه والله حاجة مسلية خالص .  
 مديحة : قوم يا سعيد انت والعروسة فرجونا .  
 سعيد : ده كان زمان .  
 فريد : وايه اللى يمنع الوقت .  
 سامية : وايه راىكم تقوموا ما ضيعوش وقت وتورونا تنمشوا  
 بالعكس وتبخلقوا شوية لبعض.  
 الجميع : ( بصوت واحد ) هيه هيه يلا يلا  
 سامية : (تشد ناهد من يدها) يلا يا ناهد ( ناهد تقف وهى  
 تضحك)  
 فريد : (يشد سعيد لكنه يرفض باصرار) قوم يا سعيد يلا  
 اتبت وجودك.  
 مديحة : ايه يا سعيد هو مين اللى ينكسف؟ قوم يا أخويا قوم.

(تبتسم وتحاول معه لكنه يزداد كسوف)

سامية : بقه كده تكسفنا يا عريس بلاش تبخلقوا ممكن  
تكتفوا بالأسئلة.

كريكو : (يقف) والله يا سعيد بيه ، دى لعبة خلوة أمال هتعرفوا  
بعض ازاي.

سعيد : ( لسامية ) ايه رأيك تقومى أنت بالأسئلة واحنا نجواب.  
حسين : لا يا استاذ دى لازم يقوم بيها راجل وأنا هقوم بالدور ده  
( يمسك بكوب ماء ليستعمله كمكرفون ) لو تسمحي يا  
آنسة تردي على أسئلتى بس بسرعة ودون تفكير كثير .  
يعنى عايزك تتكلمى بسرعة من غير لف ولا دوران.  
موافقة؟

ناهد : ( بدلال ) بس أسئلة تكون واضحة وغير محرجة .

حسين : اتفقنا . نبدأ انتى بتحبى العريس؟

ناهد : (بسرعة) ما حصلش لسه .

حسين : ايه اللي بيعجبك فى العريس؟ بسرعة من فضلك.

ناهد : (تلتفت نحو العريس ثم الى الآخرين) عنيه الحزينة جدا

حسين : ( يشجع ) برافو الجميع ( ضحك وتهريج .

(للباقيين) سكوت من فضلكم (لناهد) السؤال ده

عايزك تجاوبى عليه فى ثانية بلا تردد لأنه سؤال مهم  
شوية.

ناهد : ( تتماسك ) اسأل وخلصنى .

حسين : قولى لى ايه الشىء اللي مش عاجبك فى العريس؟

ناهد : حاجة بتترفزنى خالص وتطير عقلى.

(الجميع يستعجلوها)

حسين : قولى بسرعة.

ناهد : شنباته يا عمرى .(الجميع يصفق ما عدا العريس

واخواته)

سعاد : لا دى اهانة لا أقبلها عن اذنكم ( تشد اختها وتتجه نحو باب الخروج ثم تكلم أخيها ) احنا ماشيين وان كان عاجبك الكلام خليك انت.

( محمود وفريد وسامية يحاولون تلطيف الجو) دى مجرد ضحكة يا دكتورة استنى شوية. ما يصحش حاجة زى دى تزعلك)

سعاد : ( اسفة لا يمكن انتظر ثانية) ( لأختها ) يللا بينا  
(يخرجون ومعهم العريس)  
(اظلام)

(شقة سعيد اخواته سعيد مع الشغالة زينب)

- سعاد : (متكدرة حظ) أمال حظنا مال ليه .  
مديحة : ودى عاجبك فيها ايه ؟  
سعاد : الحمار والبياض واحدة ممعهاش شهادة الابتدائية.  
فريد ضحك عليك.  
زينب : ما تظلموش حد. رغبة الأستاذ سعيد هو اللى  
عايز كده عايزة واحدة مش متعلمة.  
سعاد : عايز كده ليه . أبقى أستاذة فى الجامعة وأخته الثانية  
ناظرة مدرسة وباخد واحدة جاهلة؟  
زينب : أخوكى شرطه كده . واحدة صغيرة ما تعرفش تقرأ ولا  
موظفة.  
سعاد : ليه ؟ عملت له ايه.  
زينب : هو مخه كده. ده مرة بعنتنى أخطب واحدة كانت أوحش  
من كده قال لى روى كلميهم عنى (تضحك)  
مديحة : بتضحكى ليه ؟ افكرتى ايه؟  
سعاد : افكرت ميلة عقله.  
زينب : تعرف قال لى ايه قوليلهم يكتبوا لها العشر فدادين اللى  
حيلتهم.  
سعاد : ورحتى؟  
زينب : (تضحك) قعدت أفكر فى الكلام لكن عقلى دلنى على  
كذبة وخلصت نفسى.  
مديحة : وايه اللى يخلىكى تكذبى .  
زينب : الناس ما حيلتهمش غير العشر فدادين أروح ازاي

- أقول لهم اكتبوها للبننت دى وليها أختين وتلات أخوة.
- سعاد : برضه دى لازم يتخلص منها طظ فى الشبكة اللى خدوها  
أنا أذفع ثمنها,
- زينب : ليه بس ؟ دى عروسة حلوة وأهلها مبسوطين.
- مديحة : حلوة بس حيلتها ايه .
- سعاد : حلوة ايه دى . يودرة ده جبر – ده مديحة مرة جابت  
علبة بنكيك وأول أبوها ما شاقها دهسها برجله.
- سعيد : (يدخل ويراهم منفعلين) ايه مالكم .
- مديحة : العروسة دى عاجباك يا سعيد .
- سعيد : مالها .
- سعاد : مش من مقامك . جاهلة وما حيلتهاش حاجة.
- سعيد : مش عايز أنا لا تعليم ولا حاجة .
- سعاد : لك حق تكره المتعلمات علشان احنا معولينك الهموم .
- سعيد : بلاش لك انتى وهيه . دى مش أول واحدة تطيروها  
وأنا عارف ان ده هيحصل.
- مديحة : انت حر واللى يشيل قربة تشر على قفاه .
- سعاد : بس دى هنلعب بيك . دى جريئة وسنها صغير.
- مديحة : أيوه صغيرة قوى يا سعيد بتاع عشرين سنة على الأكثر  
يعنى بينكم عشرين سنة.
- سعاد : يعنى لو اتجوزت من عشرين سنة كان بقى عندك بنت  
فى سنها.
- مديحة : أيوه فكر بعقل . يا حبيبي دى مغامرة مش مأمونة  
العواقب.
- سعيد : ( كالتائه ) بلاش يا ستى جواز.
- سعاد : لا بلاش دى . أنا عندى واحدة أحسن منها موظفة.
- مديحة : نادية يا سعاد. يا ريت يا خويا دى بنت منكسرة

وتعيش.

- سعيد : خلاص فضونا من السيرة دي . لادى ولا غيرها.  
زينب : ازاي ؟ هتقول ايه يا أستاذ سعيد؟  
سعيد : اسكتى بلاش كلام . أنا اللي هتصرف.  
مديحة : نمشى احنا بقى تخرج هي وسعاد) .  
(اظلام)

## المشهد السابع:

(شقة ناهد)

- حسين : (فى سخريه) أما أنا جهزت لك حته غنوة للحفلة .  
ناهد : صحيح يا حسين؟  
حسين : آه وحياة امى اللى ما حلتيش غيرها – غنوة على الجرح.  
ناهد : هو الجرح ما صحيح لسه؟  
حسين : ايه اللى حصل عشان يصحى؟  
ناهد : على رأيك . الجو اتعكر . وأنا قلت لمحمود امبارح أنا مش مرتاحة للشورة دى.  
حسين : وقال لك ايه؟  
ناهد : قال انتى حرة ( يدخل حامد ومحمود ويبدو عليهما الانشغال).  
حامد : ايه يا ناهد – الناس دول مش عاجبينك؟  
ناهد : أنا محتارة ومش عارفة أقول ايه.  
محمود : يا ناهد يا أختى ده جواز – لازم يكون برغبتك وبمنتهى الحرية.  
ناهد : اخواته باين عليهم الشدة . متعقرين قوى هاروح فيهم فين؟  
حسين : انتى هتعيشى معاهم؟  
محمود : ولو.. برضة دول مش سهلين والدكتورة بتاع الجامعة دى فيها عقد الدنيا والآخرة.  
حسين : دى عاملة زى أم سحلول اللى بيخوفوا بيها العيال.  
ناهد : والدعاوى بتاع الخطوبة اللى وزعناها؟

- محمود : ما يهكميش نعنذر للناس .
- حامد : مش مشكلة كل المدعوين من أهلنا --
- حسين : ( يضحك فى سخريية ) قدر أخف من قدر . واحنا ما  
نقدرش على تعبك يا ست ناهد.
- ناهد : ( تضحك ) يا شيخ ! أمال جهزت غنوة الحفلة بسرعة  
ليه؟
- حسين : بنت عمى الوحيدة لازم أحييها فى ليلة العمر.
- ناهد : يعنى مش عايز تتخلص منى .
- محمود : ليه ! كنت مرمية عليه؟
- حسين : أنتم حتخطوا على ليه حلوا عنى أنا مش قدكم . ده انا  
غلبان.
- حامد : مالكم ومال حسين .
- ناهد : أنا باضحك بس.. أنا لى بركة غير حسين. هو اللى  
مسلىنى ومواسينى.
- محمود : خلاص تجوزيه وتفضوها سيرة.
- حسين : ( ينظر اليه بشك ) ايه ؟ مش قد المقام يا سى محمود؟  
بكره أخذ الشهادة وأبقى زيك.
- محمود : ( يضحك بصوت ملىان ) ما أنت زى من النهاردة .  
وقبل ما تاخذ الشهادة.
- حامد : ما تزعلش يا حسين بيهزر معاك.
- محمود : لا مش هذار . وحياة أبويا باتكلم جد. بس توافق ناهد  
والشبكة موجودة والحفلة بكره فى موعدها.
- حامد : أنا ما عنديش مانع على الأقل يبقى زيتنا فى دقيقنا.  
أنت ابن عممتنا وأخونا التالت.
- محمود : ايه رأيك يا ناهد . ده حل كويس للمأزق اللى احنا فيه.
- ناهد : هو حسين كان قال لكم هاجوز؟

- حامد : ليه ما هو قدك فى السن وأكبر ما يجوزش ليه .  
 حسين : (ينظر بحيرة ) انا مش مصدق .  
 محمود : وحسين كان طال حاجة بس ما قلش ؟ دى فرصة ما  
 يحلمش بيها.  
 حسين : (فى حياء) فعلا دى فرصة العمر بالنسبة لى .  
 انا طول عمرى باحب ناهد . وأتمنى أسعدها.  
 ناهد : (فى تهور؟ يا حبيبي يا حسين.  
 حامد : ( بسرور) أمال كنتم ساكتين ليه من زمان.  
 محمود : شفتم أنا كاشفكم ازاي ؟  
 ناهد : تجرى نحو محمود وتعانقه ثم تعانق حامد) يا حبايبي  
 يا اخواتى الهى ما اتحرم منكم.  
 حسين : ( فى نشوة وحيرة ) مش عارف أقول ايه؟ احنا فى حلم  
 ولا فى علم. ما كتنش فاكر انكم طيبين بالشكل ده.  
 (يعانقهم واحد بعد واحد ثم يقترب من ناهد فيفتح ذراعيه  
 لها فتميل نحوه وبسرعة تجرى بعيدا عنه)  
 ناهد : اختشى بقه مش وقته.  
 (يدخل الأستاذ فريد)  
 فريد : يا ترى ايه رأيكم فى العريس؟ أنا شايف انكم مش  
 مبسوطين من اخواته.  
 محمود : ما فيش نصيب.  
 فريد : كده يعنى أبلغه الكلام ده وحفلة بكره؟  
 محمود : هنتعملها باذن الله .  
 فريد : لمين؟  
 حامد : (يضحك) لكتب الكتاب عقبال أولادك .  
 فريد : (يضحك) حيرتوني.  
 محمود : ما تحترش هنكتب لها على حسين.

فريد : الف مبروك أحسن حل (يتجه الى باب الخروج) عن  
أذنك.

ناهد : استنى يا أستاذ فريد (فى نفس اللحظة تدخل سامية)  
وأبلة سامية جت كمان. يللا يا حسين ابدأ.

حسين : (يضحك) ابدأ ايه.

ناهد : غنى . لازم نسمعنا الغنوة اللى كنت مجهزها للحفلة.  
(الجميع يشجع) أيوه سمعنا. سمع (يصفقون)

حسين : بكره بقه فى الحفلة.

محمود : وده كلام بكره نسمعها تانى مع الناس . لكن ده طلب  
خصوصى للعروسة.

سامية : أيوه يا أخى يللا فرح العروسة يللا.

فريد : ممكن نسجلها عشان نسمعها مرة تانى بكره.

حامد : اتكل على الله وغنى خلىنا نفرح عروسة حلوة وأمورة  
لازم تلبى طلبها وده شرطنا.

حسين : على عيني . غنوة مش بطالة أهديها للمحبين والعزال  
اسمها " من امتى كان اللى انكوى بالحب تاب "

ضيعت أملى فى الهوى وصبحت يا قلبى فى عذاب  
وطيف حبك بطول الليل يحاورنى.  
أبات وياه يبادلنى  
حنين الشوق بنار وعتاب  
يللى تلومونى كلكم – وتجرحونى فى وحدتى  
أنا بأعود وأرجع وأقول  
من امتى كان اللى انكوى بالحب تاب ؟  
\*\*\*

صحيح فى الحب ناس قدروا على التوبة  
وناس دابوا  
وناس على الود متعاهدين  
وأنا وأنت بقالنا سنين  
ومتعاندين  
نفيد النار ونطفئها  
ونحرق شمعنا فيها  
ودنيا خشنا نبنيها بتتحول رماد وتراب  
ومن حيرتى ونار حيرتى  
أعود وأقول:  
من امتى كان اللى انكوى بالحب تاب؟

\*\*\*

أه يا قلبى  
صابر على ايه - أحوالك بقت تصعب  
ده اللى يطاوع عنادك - لازم فى يوم يتعب  
سر الزمن قسوته عمره ما لهش حبيب  
والحب ده لعب ساعة يكسب وساعة يخيب  
وجرح خلفتهولى فى الحشا قايد  
ان جه طبيب يعرفه قلت الطبيب كداب  
ومن حيرتى ونار حيرتى أعود وأقول:  
من امتى كان اللى انكوى بالحب تاب  
" ستار "